

सुनील गङ्गापाथाय

# दादाकृष्ण



প্রথম সংস্করণ নভেম্বর ১৯৭৬ থেকে  
ষষ্ঠ মুদ্রণ জানুয়ারি ১৯৯৯ পর্যন্ত  
মুদ্রণ সংখ্যা ২৭০০০  
সপ্তম মুদ্রণ ডিসেম্বর ২০০৮

প্রচ্ছদ ও অলংকরণ বিপুল গুহ  
© সুনীল গঙ্গোপাধ্যায়

সর্বস্বত্ব সংরক্ষিত

প্রকাশক এবং স্বত্বাধিকারীর লিখিত অনুমতি ছাড়া এই বইয়ের কোনও অংশেরই কোনও রূপ পুনরুৎপাদন বা প্রতিলিপি করা যাবে না, কোনও যান্ত্রিক উপায়ের (গ্রাফিক, ইলেকট্রনিক বা অন্য কোনও মাধ্যম, যেমন ফোটোকপি, টেপ বা পুনরুদ্ধারের সুযোগ সবেলিত ডথা-সঙ্কয় করে রাখার কোনও পদ্ধতি) মাধ্যমে প্রতিলিপি করা যাবে না বা কোনও ভিত্ত, টেপ, পারফোরেটেড মিডিয়া বা কোনও ডথা সংরক্ষণের যান্ত্রিক পদ্ধতিতে পুনরুৎপাদন করা যাবে না। এই শর্ত লঙ্ঘিত হলে উপযুক্ত আইনি ব্যবস্থা গ্রহণ করা যাবে।

ISBN 81-7066-498-5

আনন্দ পাবলিশার্স প্রাইভেট লিমিটেডের পক্ষে ৪৫ বেনিঘাটোলা সেন  
কলকাতা ৭০০ ০০৯ থেকে সুবীরকুমার মিত্র কর্তৃক প্রকাশিত এবং  
বসু মুদ্রণ ১৯এ সিকদার বাগান স্ট্রিট কলকাতা ৭০০ ০০৪  
থেকে মুদ্রিত।

১২৫.০০



---

সুন্দর গল্পোপাখ্যান

**বায়োফর্ম**

অম্লান দত্ত  
শ্রদ্ধাস্পদেষু

আমাদের প্রকাশিত এই লেখকের অন্যান্য উপন্যাস

অন্য জীবনের স্বাস	পূর্বপশ্চিম ১-২
অর্জুন	প্রথম আলো ১-২
অমৃতের পুত্রকন্যা	প্রবাসী পাখি
অরণ্যের দিনরাত্রি	বিজনে নিজের সঙ্গে • আমাদের
আত্মপ্রকাশ	ছোট নদী
আমিই সে	বিশাখার জন্মদিন ও মনোভূমি
উপন্যাস সমগ্র ১-৮	বৃক্কের পাথর
একা এবং কয়েকজন	বেঁচে থাকা
কিশোর ও সন্ত্যাসিনী	স্বাকা
গড়বন্দীপুরের কাহিনী	মাণু ও ভানু
জীবন যেরকম	স্বাধাকৃষ্ণ
জোছনাকুমারী	রূপকথার মানুষ
টান	রূপটান
দশটি উপন্যাস	শাস্ত্রনুর ছবি
দুই নারী হাতে তরবারি	শিখর থেকে শিখরে
ধূলিবসন	শ্যামসাহেব
নাটক ও কাব্যনাটক সমগ্র	সপ্তম অভিযান
নিঃসঙ্গ সত্রাট	সেই সময় অথও
পাঁচটি প্রেমের কাহিনী	হে মহাজীবন





গাছগুলোর মাথায় এসে পড়েছে নতুন সূর্যের আলো, কিন্তু নীচে এখনও অন্ধকার। রাতের ঘুম এখনও ভাঙেনি, এর মধ্যে ভোর এসেছে। বাগানে শিশিরভেজা কুসুমকলি সবেমাত্র ফুটি ফুটি, বাসা থেকে পাখিরা মুখ বার করে ভাবছে, ডাকবে কি ডাকবে না, এ কি পূর্ণচাঁদের জ্যোৎস্না না দিনমণির আলো? গোয়ালে গোরুগুলো শিং নেড়ে নেড়ে মশা তাড়াচ্ছে। এই সময় দূরে শোনা গেল ঘোড়ার ক্ষুরের শব্দ।

সেই শব্দে ঘুম ভেঙে গেল গোয়ালিনী যশোমতীর। তড়িঘড়ি উঠে পড়ল। তার স্বামী তখনও গভীর ঘুমে মগ্ন, বুকের কাছে জড়িয়ে আছে তাদের একমাত্র শিশুটিকে। শিশুটির ঠোঁটে হাসির লেখা। ঘুমিয়ে ঘুমিয়েও সে হাসে।

ছোট্ট মাটির ঘরটি হাঁড়ি-সরায় ঠাসাঠাসি। ঘরের চাল থেকেও ঝোলানো রয়েছে বিক। চোখ মুছতে মুছতে

যশোমতী এসে দাঁড়াল গবাক্ষের কাছে। কান খাড়া করে রইল। হ্যা, সন্দেহ নেই, ঘোড়ার ক্ষুরের শব্দই এগিয়ে আসছে ক্রমশ। একটি নয়, অনেক।

পক্ষিমাতার মতন ব্যাকুল হয়ে যশোমতী প্রায় ছোঁ দিয়ে ছেলেকে তুলে নিল বৃকে। রাজার সৈন্য আসছে তার ছেলেকে কেড়ে নিতে। কী করে লুকোবে, কোথায় লুকোবে এই সাত রাজার ধন এক মানিক? শিশুটি এখনও জাগেনি। যদি হঠাৎ জেগে উঠে কাঁদতে শুরু করে? যদি সেই কান্নার শব্দ বাইরে পৌঁছোয়?

মাটিতে হাঁটু গেড়ে বসে যশোমতী স্বামীর কপালে হাত রেখে বলল, ওগো, ওঠো! ওঠো!

তার স্বামীর নিদ্রা সহজে ভাঙে না।

তখন যশোমতী হাত জোড় করে প্রার্থনার সুরে বলল, ওগো ঘুমঠাকরুন, তোমার পায়ে ধরে মিনতি করি, আমার পতিকে এখন ছেড়ে যাও। আবার রাত আসুক, তখন আবার তুমি এসো। এখন আমি গুঁর চোখ খুলে দিলে অপরাধ নিয়ো না। নিয়ো না।

চৌপাইয়ের তলায় মাটির সরায় জল রাখা ছিল। সেই জল আঁজলা ভরে নিয়ে যশোমতী ঝাপটা মারল তার স্বামীর চোখে। একবার, দু'বার, তিনবার। এদিকে ঘোড়ার ক্ষুরের শব্দ বেশ জোর।

নন্দ গোয়লা বিরক্তিসূচক উঃ শব্দ করে চোখ মেলল। তারপর দেখল, পরমান্ন-ভরা সোনার থালায় পিপড়ে ধরার মতন তার স্ত্রীর শান্ত, সুন্দর মুখ-ভরা উদ্বেগ। ছেলে তার পাশে নেই, মায়ের কোলে। কনুই ভর দিয়ে অর্ধেক শরীর

উঁচু করে সে জিঞ্জেরস করল, কী হয়েছে? বাছার গায়ের আবার তাপ বেড়েছে?

ওগো না! কান পেতে শোনো! তারা আসছে।

নন্দ শুনল। তড়াক করে এক লাফে উঠে পড়ে, দরজার কোণ থেকে সড়কিখানা হাতে নিয়ে বলল, আসুক। আমার ঘর থেকে কেউ আমার ছেলেকে নিয়ে যেতে পারবে না।

যশোমতী আরও ভয় পেয়ে গেল। একা নন্দ সড়কি হাতে রাজার সৈন্যদলের সঙ্গে লড়বে নাকি? রাজা উগ্রসেনের নিজের হাতে গড়া এই সৈন্যবাহিনী দেখে স্বয়ং মহাবল জরাসন্ধ পর্যন্ত প্রশংসা করেছিলেন। একথা কে না জানে এই সৈন্যরা কত নৃশংস।

শেষ পর্যন্ত যুক্তি মানল নন্দ। সত্যি, গোঁয়ারতুমিতে কোনও লাভ নেই। যদিও তারা স্বামী-স্ত্রী নিরপরাধ, তবু রাজার উৎকট খেয়াল থেকে শিশুপুত্রকে বাঁচাবার জন্য তাকে পালাতেই হবে।

পুঞ্জের জন্য স্থলপন্থ আহরণ করতে গিয়ে মেয়েরা যেমন অতি সাবধানে ফুলগুলো কোঁচড়ে রাখে, তেমন সাবধানে শিশুটিকে কোলে নিয়ে নন্দ বেরিয়ে গেল বাড়ি থেকে।

পেছনের উঠোন পার হয়ে, লিচু আর জামরুল বাগানের মধ্য দিয়ে সে দৌড়োতে লাগল। দৌড়োতে দৌড়োতে পার হয়ে গেল আরও কত বাগান, তারপর ঘোর বন, তবু সে থামল না।

যতক্ষণ স্বামী-পুত্রকে দেখা যায়, ততক্ষণ যশোমতী দাঁড়িয়ে রইল দরজায়, তারপর ফিরে এল জানলার কাছে।



বাইরে থেকে তাকে দেখে মনে হয়, ঠিক যেন কাঠের পুস্তলি, যদিও তার বুকের মধ্যে ঝড় বইছে।

এখন অনেক ঘোড়ার শব্দ, মাঝে মাঝে চিহি চিহি ডাক, অস্ত্রের ঝঙ্কনা, সৈনিক পুরুষদের হাসাকৌতুক সবই স্পষ্ট শোনা যায়। ক্রমে, রাজপথে ধুলো উড়িয়ে তারা দৃশ্যমান হল, তাদের সোনার জল করা ঝকমকে শিরস্রাণ দেখলে মনে হয় ঠিক যেন নদীর জলের সকালের সূর্যকিরণ। তাদের কোমরবন্ধে তলোয়ার, পাশে গোঁজা বর্শা, তাদের দৃষ্টি বাজপাখির মতন। রাজা উগ্রসেনের আমলে এই সেনাবাহিনী দেখলে বৃকে ভরসা জাগত, মনে হত বাইরের যে-কোনও শত্রুকেই এরা দমন করতে পারবে। উগ্রসেনের ছেলের আমলে এদের দেখলেই তরাসে বৃক কাঁপে, কখন কার সর্বনাশ করবে তার ঠিক নেই।

একটু বাদেই ঘোষণার বিভিন্ন বাড়িতে হাহাকাকার পড়ে গেল, সৈন্যরা নানান বাড়িতে ঢুকে, জিনিসপত্র তছনছ করে খুঁজে দেখছে কোনও অল্পবয়সি শিশু আছে কিনা। যারা পেরেছে, আগেই তারা নন্দর মতন কোলের ছেলেকে নিয়ে পালিয়েছে। যাদের ঘুম ভাঙেনি, তাদের কপাল পুড়ল। সৈনিকের নিষ্ঠুর হাত মা-বাবার কোল থেকে ছিনিয়ে নিয়ে গেল শিশুপুত্র। কী অদ্ভুত খেয়াল হয়েছে নতুন রাজার, শিশুরক্ত না দেখলে তৃপ্তি হয় না!

যশোমতীর ঘরেও এল ওরা। যশোমতী একটাও কথা বলল না, দরজা ছেড়ে এক পাশে দাঁড়িয়ে রইল। ওরা এসে খাট-বিছানা উলটেপালটে, হাঁড়ি-সরা ভেঙে তন্ন তন্ন করে দেখল। একটা হাঁড়িতে ভরা ছিল ক্ষীরের লাড্ডু, সেগুলো

নিয়ে লোফালুফি করতে করতে বেরিয়ে গেল তারা। তখন যশোদা বুকের কাছে হাত জোড় করে বিড়বিড় করতে লাগল, কত দূরে; কত দূরে গেছে ওরা? ওদের কেউ দেখেনি তো? হে ঠাকুর, তুমি ওদের দেখো।

এদিকে কত দূরে যে ছুটে চলেছে নন্দ, তার খেয়াল নেই। অস্বারোহী সৈনিকদের নাগালের বাইরে যেতে হবে। এক সময় হাঁপাতে হাঁপাতে হাত পা অবশ্য হয়ে এল। চারদিকে ঘোর জঙ্গল। এখানে কেউ দেখতে পাবে না। ছেলেকে কোলে রেখেই নন্দ একটা বড় গাছের গুঁড়ির কাছে বসল।

ছেলে জেগে উঠেছে এর মধ্যে। পিট পিট করে চাইছে। রীতিমতন দিনের আলো ফুটে গেছে, এক্ষুনি ছেলে কিছু খেতে চাইবে। নন্দরও খুব খিদে পেয়েছে। খিদের জ্বালায় ছেলে যদি কাঁদতে শুরু করে এখানে কী খাওয়াবে ছেলেকে! এখানে কোনও গাছের ফল কি বিশ্বাস করে খাওয়ানো যায়? নন্দ গাছগুলোকে চেনবার চেষ্টা করল। কয়েকটা গাছ চেনা, কয়েকটা অচেনা। কদম ফুলে ভরা গাছটি চেনা যায়, একটু দূরে দেখা যায় কয়েকটা বেল আর নারকেল গাছ, সবচেয়ে উঁচু গাছটি পিয়াল। একটি গাছের গা থেকে ভারী সুন্দর গন্ধ আসছে, এটাই কি চন্দনগাছ? আর ওই যে গাছের গুঁড়ির রং একেবারে কালো, এটার নাম কী? লোকমুখে সেও তমাল গাছের নাম শুনেছে, এই কি সেই তমাল? হবেও বা।

ছেলে আর কোলে থাকতে চাইছে না, ছটফট করছে। নন্দ তাকে নামিয়ে দিতে বাধ্য হল। দু'-আড়াই বছর বয়স।

এর মধ্যেই গুট গুট করে দিবি দৌড়োদৌড়ি করতে পারে। নন্দ চোখে চোখে রাখল, ছেলে খেলতে লাগল এদিক-ওদিক। ঘন জঙ্গল হলেও, আসবার পথে দু'-একটা ভাঙাচুরো বাড়ি চোখে পড়েছে। হয়তো একসময়ে এখানে কোনও নগর ছিল, কোন রাজার খেয়ালে একদিন ধ্বংস হয়ে গেছে। মাঝে মাঝে শোনা যাচ্ছে একটা মিষ্টি কুলকুল শব্দ। নিশ্চয়ই নদী আছে কাছাকাছি কোথাও !

নন্দের মাথায় একটা চিন্তা এল। গোকুল ছেড়ে এখানে এসে বাড়ি বানিয়ে থাকলে কেমন হয়? রাজার সৈন্যরা কি আর এদিকে আসবে? এ-জায়গাটা ভারী সুন্দর, থাকার পক্ষে বেশ। কাছাকাছি নদী যখন আছে, তখন গোচারণের ভূগভূমিও থাকবে অবশ্যই। ফেরার সময় ভালো করে দেখে যেতে হবে তো !

দুপুরের আগে ফেরা নিরাপদ নয়। এর মধ্যে কিছু ঝাওয়ার ব্যবস্থা করতেই হবে। ছেলেটা এখনও কান্না জুড়ে দেয়নি। রোজ্জ সকালে উঠে দুধ-নি খাওয়া তার অভ্যাস। নতুন জায়গায় এসে দিবি খেলায় মেতে উঠেছে। কোথা থেকে একটা ময়ূরের পালক কুড়িয়ে পেয়ে খলখল করে হাসছে। নন্দ সতর্ক চোখে তাকাল। ময়ূর অতি হিংস্র পাখি। বাচ্চা ছেলে দেখলে চোখ চুকরে দেয়।

ছেলে একটা ঝোপের আড়ালে চলে যেতেই নন্দ উঠে দৌড়ে গিয়ে তাকে ধরল। সেই সময় দূরে কর্কশ শব্দে একটা ময়ূর ডাকল। নন্দ আর আকাশের দিকে তাকাবারও সময় পেল না; ছড়মুড় করে বৃষ্টি নামল।

সে কী অঝোর বৃষ্টি! কোথায় লুকিয়ে ছিল এত মেঘ,



দিব্বি তো রোদ খটখট করছিল। আকাশ জুড়ে যেন লক্ষ ভাল্লুকের দঙ্গল হুড়োহুড়ি শুরু করে দিয়েছে। ছেলেকে কোলে তুলে নিয়ে একটা ঘন পাতাওয়ালা গাছের নীচে আশ্রয় নিল নন্দ। কিন্তু সে-বৃক্ষও বেশিক্ষণ আশ্রয় দিল না। এক সময় সেখানে দ্বিগুণ বেগে জল পড়ে। ভিজ্জে-নেয়ে একশা হয়ে গেল বাপ আর ছেলে। নন্দ ছেলেকে মুড়ি দিয়ে রেখেছিল নিজের গায়ের উড়নি দিয়ে। সেই ভিজ্জে ত্যানা বার বার সরিয়ে ছেলে বৃষ্টির জলে হাত ঘোঁরায়। এখনও এক বারও কাঁদেনি। তবু নন্দর বুকের মধ্যে খুব যাতনা হয়, ভেতরটা মুচড়ে মুচড়ে ওঠে বার বার। এইটুকু ছেলে, জলে ভিজ্জে যদি সান্নিপাতিক হয়। স্নেহের যদি কোনও অলৌকিক ক্ষমতা থাকত, তা হলে নন্দ তার শিশুপুত্রের মাথার ওপর চন্দ্রাতপ খাটিয়ে দিত এখনই।

নন্দরা ইন্দ্রের পূজারী। একবার তার ইচ্ছা হল, হাত জোড় করে দেবরাজ ইন্দ্রের কাছে বর্ষণ বন্ধ করে দেবার জন্য প্রার্থনা করে। কিন্তু হাত উঠল না। খরা-অজন্মার বৎসরের বিভীষিকার কথা তার মনে পড়ে। ইন্দ্রদেব সদয় হয়েই বৃষ্টি দিয়েছেন! মাঘ মাস শেষ হয়ে গেছে, এখন বৃষ্টি হলে রাজা এবং দেশের পুণ্য হয়। হায় রাজা! তার কোপন স্বভাবের জন্যই আজ নন্দকে চোরের মতন পালিয়ে এসে এই আশ্রয়হীন অরণ্যে ছেলেকে নিয়ে ভিজ্জতে হচ্ছে।

প্রায় এক দণ্ড পরে বৃষ্টির তেজ কমতে লাগল একটু একটু করে। গাছতলা ছেড়ে নন্দ ফাঁকা জায়গায় এসে দাঁড়াল, উড়ুনিটা নিংড়ে মাথা মুছে দিল ছেলের। বড় দীন গলায় জিজ্ঞেস করল, খুব খিদে পেয়েছে, না রে?

ছেলে বলল, খুব আর একটু।

নন্দ বলল, এই তো এখুনি বাড়ি যাব, তোর মা তোকে খেতে দেবে, দুধ, ননি, সর, মোয়া, নারকেলনাড়ু—আর কী খাবি?

ছেলে বলল, আর জল খাব!

নন্দ বলল, আহা রে, আহা রে, এত বৃষ্টিতে ভিজ্ঞেও জলের তেপ্টা মিটল না! দেখি কপালটা? একটু যেন গরম গরম? নাকি মনের ভুল!

ছেলের ডান হাতের আঙুল ধরে হাঁটি হাঁটি পা পা করিয়ে নন্দ সবেমাত্র বাড়ির দিকে ফিরতে শুরু করেছে, এই সময় একটু দূরে শুনতে পেল গান। রিনরিনে কচি গলা। একটি নয়, তিন-চার জনের। এখানে এ-বিজন বনে কে গান করে? এখানে কি অঙ্গরারা গোপনে খেলা করতে আসে? অঙ্গরাদের চোখের সামনে পড়ে গেলে যদি কোনও অপরাধ হয়!

ক্রমে দেখা গেল চারটি মেয়ে হেলে দুলে নাচতে নাচতে আসছে বনের পথে। তাদের ন'-দশ বছরের বেশি বয়স নয়, পিঠের ওপর চুল খোলা, কাঁচা সোনার মতন বর্ণ, গন্ধরাজ ফুলের মতন মুখশ্রী। যেন সত্যিই চারটি অঙ্গরা কিংবা বনবালা।

মেয়ে চারটি হঠাৎ নন্দকে দেখে ভয় পেয়ে বলল, ওমা! নন্দ কণ্ঠস্বরে অনেকখানি কাকুতিমিনতি মিশিয়ে বলল, ভয় পেয়ো না, বাছারা, কিছু ভয় নেই।

ওরা আড়ষ্ট ভাবে দাঁড়িয়ে রইল।

নন্দ ওদের আরও একটু আশ্বস্ত করার জন্য বলল, আমি

আমার ছেলেকে নিয়ে এই পথে যাচ্ছিলাম। আমার নাম নন্দ গোপ, আমার ছেলের নাম কানু। তোমরা এই বনের মধ্যে দিয়ে কোথায় যাচ্ছ? তোমরা কি মানবী, না দেবী?

মেয়েরা এবার ফিক করে হাসল। এ-ওর গায়ে ঠেলা দিয়ে বলল, এই, তুই বল না, এই, তুই বল না!

তারপর ওদের মধ্যে যে সবচেয়ে ফুটফুটে, যার মুখখানিকে পদ্ম বলে ভুল করে মৌমাছি এসে বসতে পারে, সে কোকিলজয়ী কণ্ঠে বলল, আমি বৃষভানু রাজার মেয়ে, আমার নাম রাধা। আর এরা আমার সখী। আমরা যমুনা় ব্রত পারণ করতে যাচ্ছি।

নন্দ উৎফুল্ল হয়ে বলল, ওমা, তুমি বৃষভানুদাদার মেয়ে! এর মধ্যে কত ডাগরটি হয়েছ! তোমার বাবাকে আমার কথা বোলো, উনি চিনতে পারবেন।

নন্দর আর একটা কথা মনে পড়ে গেল। সে আরও বলল, আমিই তো তোমার বাবা আর মায়ের বিয়ে দিয়েছি।

কানু ততক্ষণে বাবার হাত ছাড়িয়ে মেয়েদের কাছে গিয়ে দাঁড়িয়েছে। একটি মেয়ের কোঁচড়ে বাতাসা আর ফুটকড়াই ছিল, ঠিক তা নজর করে সেদিকে হাত বাড়িয়েছে। মাটিতে পড়ে গেল কয়েকটি বাতাসা।

নন্দ তা দেখে বড় লজ্জা পেল। তবু লজ্জার মাথা খেয়ে বলল, আমার বাছার বড় খিদে পেয়েছে, ওকে দু'টি বাতাসা দেবে মা?

এক সখী বলল, এ যে আমরা ব্রতের জন্য নিয়ে যাচ্ছি। ব্রত না হয়ে গেলে কী করে দেব?

কানু তবু কেড়ে নেবার জন্য হাত বাড়চ্ছে। তা দেখে

রাধা বলল, আহা দুটো বাতাসা দে, বৃন্দে! ব্রতে কি আর সব লাগে!

ঝপ করে সে কানুকে কোলে তুলে নিল।

নন্দ ব্যস্ত হয়ে বলল, দেখো, দেখো, রাখতে পারবে না, বড় দুরন্ত ছেলে।

রাধা বলল, আহা, এইটুকু ছেলেকে কোলে রাখতে পারব না।

আদর করে সে কানুর গালে একটু হামি দিয়ে বলল, ইস, কী সুন্দর ছেলেটি, টানা টানা চোখ, তিলফুলের মতন নাক! দ্যাখ দ্যাখ বিশাখা, কী রকম খট খট করে হাসছে!

অন্য সখীরাও আদর করল কানুকে। কানুর এক হাতে তখনও সেই ময়ূরপালকটি ধরা। রাধা সেই পালকটা গোল করে মুড়ে কানুর মাথায় পরিয়ে দিল। তারপর বলল, কী সুন্দর মানিয়েছে না? ঠিক যেন স্বর্গের রাজপুত্র!

ছেলের প্রশংসায় সব সময়ই গর্ব হয় নন্দর। সে একটা তৃপ্তির শ্বাস নিয়ে বলল, তোমাকে দেখেও আমার আজ বড় আনন্দ হল, মা! অনেক দিন যাইনি তোমাদের পাড়ায়। তোমার বাবাকে আমার কথা বোলো। যদিও এখন এ-দেশের রাজা কংস, তবু তোমার বাবাকেও আমরা রাজা বলি। বড় মানুষ না হলে রাজা হওয়া যায় না, তোমার বাপ সত্যিকারের বড় মানুষ। তোমার মা কেমন আছেন?

ভালো।

যেমন লক্ষ্মী শ্রীময়ী তোমার মা, তেমনটিই তুমি হয়েছ। জানো, আমি একবার কান্যকুঞ্জে তীর্থ করতে গেছি,



রাজপথে একটি কিশোরীকে দেখলাম, যেন স্বয়ং লক্ষ্মী।  
 দেখে চোখ জুড়িয়ে গেল। লোকের কাছে খোঁজ করে  
 জানলাম, ও হচ্ছে ভলন্দরের রাজকন্যা। অমন রূপবতী  
 মেয়ে আমাদের এ-দেশঘাটে একটিও দেখিনি। মনে মনে  
 ভাবলাম, আহা, এমন মেয়েকে যদি আমাদের ওদিকে বউ  
 করে আনা যায়! বুক ঠুকে গেলাম ভলন্দর রাজার দরবারে।  
 সরল ভাবে বললাম, হে রাজন, আপনার কন্যা কলাবতীকে  
 আপনি আমাদের রাজ্যে সম্প্রদান করুন। ব্রজের রাজা  
 সুরভানুর ছেলে বৃষভানু অতি সুযোগ্য পাত্র। রাজকুমার  
 বৃষভানু রূপেগুণে অদ্বিতীয়। যেমন তার উদার হৃদয়,  
 তেমনই পরাক্রম! তাই শুনে ভলন্দররাজ বললেন, আপনি  
 যখন বলছেন, চলুন একবার চোখে দেখে আসি  
 ছেলেটিকে। যদি ললাটলিখন থাকে সেখানেই আমার  
 মেয়ের বিয়ে হবে! তারপর সত্যি সত্যি রাজপুত্রী  
 কলাবতীর সঙ্গে যুবরাজ বৃষভানুর পরিণয় হয়ে গেল। তা  
 হলে দেখলে মা, তোমার বাবা-মায়ের বিয়েতে আমিই  
 ঘটকালি করে ছিলাম?

একটু থেমে, রাধার মুখের দিকে চেয়ে মুচকি হেসে  
 নন্দ বলল, ভাবছি আর একটা বিয়েতেও আমি ঘটকালি  
 করব!

বয়স্ক লোকেরা গল্প শুরু করলে সহজে থামে না। রাধার  
 সখীরা চঞ্চলা হয়ে উঠেছে। একজন রাধাকে একটু ঠেলা  
 দিয়ে বলল, ও লো রাই, জল সইতে যাবি নে? সূর্য যে  
 মাথার ওপর উঠল!

নন্দ ব্যস্ত হয়ে বলল, হ্যাঁ, মা, তোমরা ক'টি বালিকা যে

এই বনপথ দিয়ে যাও, তোমাদের ভয় করে না? দুই লোকের তো অভাব নেই! তা ছাড়া আছে কংসের সেনারা।

রাধা বলল, আমরা তো এদিক দিয়ে প্রায়ই যাই। আমাদের তো কেউ কিছু বলে না।

নন্দ বলল, তুমি মা রাজার ঝিয়ারি, তোমার নাম শুনেই সবাই সমীহ করবে। আমি সামান্য গোয়াল, তাই সব সময় আতঙ্কে থাকি! বড় উৎপাত শুরু করেছে কংসের সেনারা। তবে শুনেছি, ওরা শুধু পুরুষ-শিশুদেরই ধরে নিয়ে যায়, মেয়ে-শিশুদের কিছু বলে না। আমার কানুকে যে কত কষ্টে রক্ষা করি! এমন প্রতাপ রাজা কংসের যে ভূত-প্রেত-দৈত্য-দানোরাও তাকে ভয় পায়। কতবার কত প্রেতিনি, ডাকিনী, দানো পাঠিয়েছে আমার কানুকে মারবার জন্য! ভাবছি এবার গোকুল ছেড়ে চলে যাব! এই বনের মধ্যে এসে ঘর বানিয়ে থাকলে কেমন হয়?।

রাধা বলল, আসুন না, তা হলে আমাদের বাড়িরও কাছাকাছি হবে।

এখান থেকে ব্রজপুরী কতটা দূর?

এক ক্রোশ খানেক!

এ-জায়গাটার নাম কী?

এ-বনকে তো সবাই বৃন্দাবন বলে।

বাঃ সুন্দর নাম! আমি বললে আমার প্রতিবেশীরাও আমার সঙ্গে চলে আসতে রাজি হবে। এখানেই হবে আমাদের গয়লাপল্লি।

বিশাখা উতলা হয়ে বলল, ও রাই, চল না! কত দেরি  
হল যে!

নন্দ বলল, হ্যাঁ মা, আর তোমাদের আটকাব না। এই  
কানু, চল বাড়ি যাবি না? দিব্যি কোলে চড়ে বসে আছিস  
যে! নাব!

আর একবার শিশু কৃষ্ণের মুখ চুম্বন করে কোল থেকে  
নামিয়ে দিল বালিকা রাধা।



গোকুল ত্যাগ করে চলে এসেছে নন্দ আর তার আত্মীয়, পরিজন, প্রতিবেশী। বৃন্দাবনে গড়ে উঠেছে নতুন আতীরপল্লি। কংসের চেলাচামুণ্ডা ও সৈন্যদের উপদ্রবও কমেছে অনেকটা। যে-সন্দেহের বশে কংস শিশুনিধনে মেতেছিল, হয়তো সে সন্দেহ দূর হয়ে গেছে তার মন থেকে। তাই এখন অন্যান্য দুরাচারে মন দিয়েছে।

একটু বড় হয়েছে কানু। এখন সে নিজেই একা মাঝে মাঝে বাড়ির বাইরে ছুটে যায়। দেখতে পেলেই যশোমতী ছুটে গিয়ে তাকে ধরে আনে। বড় দুরন্ত ছেলে হয়েছে সে। তাকে শাসন করাও যায় না। তাকে বকুনি দিলে, এমনকী মারলেও সে কাঁদে না, ঝরঝরিয়ে হাসে কিংবা এমন মুখভঙ্গি করে যে শাসনকারীরও হাসি এসে যায়। বাড়িতে তার জন্য ক্ষীর-ননি কিছুই জমিয়ে রাখার উপায় নেই। সে তো নিজে যত খুশি খেতেই পারে, সে সম্পর্কে কোনও কার্পণ্য নেই যশোমতীর, তবু ফেলে-ছড়িয়ে নষ্ট করার

দিকেই ছেলের ঝোঁক। দুপুরে যখন যশোমতী ঘুমিয়ে থাকে, তখন কানু পাড়ার এক দঙ্গল শিশুকে জড়ো করে মায়ের সব হাঁড়ি-কলসি হাতড়ায়, কোনওটা ভাঙে, ক্ষীর-ননিতে মাখামাখি করে হাত-মুখ। একদিন এমন নরম, এমন স্নেহময়ী যশোমতীও এমন রেগে গিয়েছিলেন যে কানুর দু' হাত বেঁধে রেখেছিলেন দুটো গাছের সঙ্গে। তাও ছেলে মুক্তি পাবার জন্য কান্না জোড়েনি।

নন্দ কানুকে কোনও দিন বকে না। ছেলে আর মায়ের খুনসুটি সে কৌতুকের চোখে দেখে। সে এখন অনেক নিশ্চিন্ত।

ঘোষপাড়ার মধ্যে নন্দর অবস্থা অতি সাধারণ। তার চেয়ে ক্ষমতাবান ও সঙ্গতিসম্পন্ন গোপ আরও অনেকে আছে। তবু নন্দর ধীর স্বভাব ও সহজ সততার জন্য অনেকেই তাকে মান্য করে। নন্দর খুব একটা উচ্চাকাঙ্ক্ষাও নেই জীবনে। সেবাপরায়ণা স্ত্রী ও সুকুমার পুত্রকে নিয়ে তার যে ছোট্ট পরিবার, তাতেই সে খুব তৃপ্ত।

একদিন নন্দ গেল ব্রজপুরীতে বেড়াতে। প্রকাণ্ড একটা দিঘির সামনে বৃষভানু রাজার প্রাসাদ। সিংহদ্বারের দু' পাশে দু'টি মঙ্গলঘট বসানো। সে ঘট দু'টি এমন চকচক করে যে সকলে বলে সোনার। এ-রাজপ্রাসাদের দ্বারীরা প্রসন্নবদন, তারা কঠোর ভাবে কারওকে দূরে ঠেলে দেয় না।

রাজা বৃষভানু নন্দকে খুব সমাদর করলেন। তাকে এনে বসালেন একেবারে অন্তরমহলে। পুরনো বন্ধুর মতো আরম্ভ করলেন সুখ-দুঃখের গল্প। এলেন রানি কলাবতী।

এই প্রাসাদে শান্তি ও পরিতৃপ্তির একটা স্নিগ্ধ গন্ধ পাওয়া যায়। অলঙ্ঘী এদিককার ছায়া মাড়াতেও ভয় পেয়েছে।

এক সময় রাধা এসে বসল বাবা-মায়ের পাশে। তাকে দেখে নন্দর চোখ জুড়িয়ে গেল। এমন মেয়ে যাদের থাকে, সেই বাপ-মায়ের কত আনন্দ। শুধু আনন্দ? দৃষ্টিস্তাও থাকে না?

রাধা এখন বারো বছরের কিশোরী। আয়ত চোখ দুটির ওপর স্নিগ্ধ ছায়া ফেলেছে ঘন পল্লব। চম্পক বর্ণ আরও ফেটে পড়েছে। পিঠ ছেয়ে আছে মেঘবর্ণ চুল। মুক্তাপাঁতির মতো ঝকঝকে দাঁত।

রাধার কাছে রাজা বৃষভানু নন্দর পরিচয় দিতে যেতেই নন্দ বলল, ওকে তো আমি চিনি! একদিন বনের পথে দেখে ছিলাম। ওর টানেই তো এলাম। কী মা, আমাকে মনে নেই?

রাধা ঠিক মনে করতে পারল না।

নন্দ মনে করিয়ে দিল, সেই যে সেদিন খুব বৃষ্টি হয়েছিল, আমার সঙ্গে ছিল আমার ছেলে, খুব ছোট।

তখন মনে পড়ল রাধার। ছেলেটিকে মনে আছে, কী সুন্দর চোখ! নন্দ রাধার এত প্রশংসা করতে লাগল যে লজ্জায় সে একেবারে নুয়ে পড়ল।

বেশিক্ষণ বসল না রাধা। দূর থেকে রাই, রাই বলে ডাকতে ডাকতে এল তার সখীরা। এখন মালা গাঁথার সময়। একটু পরেই সন্ধ্যারতি শুরু হবে, তার জন্য মেয়েরা মালা গাঁথবে।

রাধা উঠে যাবার পর নন্দ একটা দীর্ঘশ্বাস ফেলে বলল,

আহা, এমন সোনার পুস্তলি, সে-ও কোথায় চলে যাবে!

বৃষভানু চকিত হয়ে জিজ্ঞেস করলেন, কেন, কেন, এ-কথা বলছ কেন?

নন্দ বলল, রাজা, আপনার মেয়ে বয়স্থা হয়েছে, এবার তো তাকে পাত্রস্থ করতেই হবে!

বৃষভানু বললেন, তা ঠিক, ইদানীং আমি এবং রানিও এ-সম্পর্কে চিন্তা করছি। কিন্তু যোগ্য পাত্র কই?

আপনার মেয়ের যোগ্য পাত্র সত্যিই দুর্লভ। মেয়ে যেন সাক্ষাৎ লক্ষ্মী। একমাত্র স্বয়ং নারায়ণের হাতেই একে সমর্পণ করা যায়।

রানি কলাবতী দীর্ঘশ্বাস ফেলে বললেন, তা ভাবলে তো চলে না। কন্যারত্ন বেশি দিন পিতা-মাতার সংসারে থাকবে না, এটাই বিধান। আপনার কাছে কোনও সৎপাত্রের সম্ভান আছে নাকি?

আপনার মতন রাজার মেয়ের সঙ্গে...

বৃষভানু বাধা দিয়ে হেসে বললেন, আমি আর রাজা কোথায়! ছোটখাটো একটা জমিদারি আছে, লোকে আদর করে রাজা বলে।

আমাদের কাছে আপনি রাজাই।

কলাবতী বললেন, যাই বলা বাপু, আমি কিন্তু আমার মেয়ের সঙ্গে কোনও রাজপুত্রেরই বিয়ে দেব।

রাজকন্যার সঙ্গে রাজপুত্রের বিয়ে হওয়াই প্রথা। আপনারা কি কংসের কোনও ছেলের সঙ্গে শ্রীমতী রাধার বিয়ে দেওয়ার কথা ভেবেছেন?

বৃষভানু তৎক্ষণাৎ দৃঢ় স্বরে বললেন, না।

নন্দর মুখে একটা কৃতজ্ঞ ভাব ফুটে উঠল। স্বস্তির সঙ্গে সে বলল, রাজা, এ আপনারই যোগ্য উত্তর দিয়েছেন। অত্যাচারী কংসের সঙ্গে যদি আপনি বৈবাহিক সম্পর্ক পাতাতেন, তা হলে শাস্তিপ্রিয় সাধারণ মানুষ আপনাকেও সামাজিক ভাবে বর্জন করত। এখন যারা আপনাকে শুদ্ধ দেয় না, তারাও আপনাকে শ্রদ্ধা করে। সেই শ্রদ্ধার আসন আপনি হারাতেন!

বৃষভানু বললেন, সে প্রশ্নই ওঠে না। জেনেশুনে আমার মেয়েকে আমি কোনও রক্তলোলুপ স্বপুত্রের পরিবারে পাঠাতে পারি না।

সেই জ্ঞান্যই তো বলছিলাম, এই সোনার পুস্তলি কত দূরে চলে যাবে কে জানে! কাছাকাছি আর রাজ্য কিংবা রাজপুত্র কই?

কলাবতী বললেন, আর্ঘ্যবর্তে কি রাজপুত্রের অভাব?

নন্দ বলল, কংসের আত্মীয় জরাসন্ধও মহাপ্রতাপশালী রাজা। যদি তাঁর কোনও ছেলের সঙ্গে সম্বন্ধ করতে চান—

বৃষভানু আবার দৃঢ় ভাবে বললেন, না। আপনার সন্ধানে আর কোনও রাজপুত্র নেই?

আমি অনেক দিন তীর্থ ভ্রমণে যাই না, অন্য দেশের সংবাদ রাখি না।

রানি কলাবতী তাঁর স্বামীকে বললেন, তুমি নানা দিকে দূত পাঠিয়ে সন্ধান নাও। আর বেশি দিন অপেক্ষা করা চলে না।

হঠাৎ নন্দর চোখ-মুখ উজ্জ্বল হয়ে উঠল। সে কলাবতীর উদ্দেশে বলল, রানি, আমি আপনাদের বিয়েতে ঘটকালি





করেছিলাম। আমার ইচ্ছে হচ্ছে, আপনাদের কন্যার  
বিয়েতেও আমিই ঘটকালি করি।

সেই কথাই তো আমরাও বলছি আপনাকে। একটি  
ভালো পাত্রের সন্ধান দিন না!

আমার হাতে সত্যিই একটি উত্তম পাত্র আছে। তার  
সঙ্গে বিয়ে দিলে আপনার মেয়ে দূরে কোথাও যাবে না,  
কাছাকাছিই থাকবে। এমন রূপ-গুণের ডালি যে আপনার  
মেয়ে, সে দূরদেশে চলে যাবে, এটাই আমার মন চায় না।

কলাবতী বললেন, আমরাও তো সেই কথাই বলি।  
দশটা নয়, পাঁচটা নয়, ওই একটিমাত্র মেয়ে আমাদের,  
তাকে চোখের আড়াল করার কথা ভাবতেই পারি না।  
আপনি কোন পাত্রের কথা বলছেন?

তাম্বুলদান থেকে নন্দ একটা তাম্বুল তুলে নিয়ে মুখে  
পুরল। তারপর ধীরে সুস্থে চিবিয়ে, গলা পরিষ্কার করে,  
দায়িত্বশীল ব্যক্তির মতন ভারিক্কি ভাবে বলল, গুনুন,  
বিয়ের ব্যাপারে কন্যা চায় রূপ, মা চায় বিত্ত, বাবা চায়  
কুলশীল, আর আমাদের মতন সাধারণ লোক চায় মিষ্টান্ন  
খেতে। এখন আমি যে ছেলেটির কথা বলছি, সে খুবই  
রূপবান, যেন যুবা বয়সের শিব, আপনার মেয়ের সঙ্গে  
খুবই মানাবে। মেয়ের তাকে একটুও অপছন্দ হবে না।  
আর বিত্ত, সে খুব বিত্তশালী নয়, রাজা কিংবা রাজপুত্রও  
নয়, তবে যথেষ্ট সচ্ছল, নিজের উদ্যমে সে অনেক কিছু  
গড়ে তুলেছে। সে আপনাদেরই স্বজাতি, ব্যবহারটি অতি  
চমৎকার, যেমন তার আত্মসম্মানজ্ঞান, অথচ তেমনই  
বিনীত ও মধুরভাষী, খুব কালীভক্ত—প্রতিদিন মায়ের

পূজা না করে সে জলস্পর্শ করে না...

রাজা ও রানি সমস্বরে জিজ্ঞেস করলেন, ছেলেটি কে? ছেলেটি কে?

নন্দ বলল, আমার স্ত্রী যশোমতীর সম্পর্কে ভাই হয় ছেলেটি। তার নাম আয়ান। ঘোষপাড়ার সবাই তাকে খুব ভালোবাসে।

রাজা বৃষভানু হঠাৎ উৎকট গম্ভীর হয়ে গেলেন। রানি কলাবতী মুখ ফেরালেন অন্য দিকে।

নন্দ জানত, এমনটি হবে। রাজদুহিতার সঙ্গে কি সামান্য গোয়ালার বিয়ে হয়? কিন্তু সে রকমও তো হয়েছে কখনও কখনও। মহাবল দক্ষরাজার মেয়েরও তো বিয়ে হয়েছিল শ্বশানচারী শিবের সঙ্গে। রূপে-শুণে আয়ান কোনও রাজার ছেলের চেয়ে কম কীসে? যদি ভাগ্যে থাকে সেও একদিন রাজা হবে।

কিছুক্ষণ নিঃশব্দে রাজা বৃষভানু তাকিয়ে রইলেন অলিন্দের বাইরে। তারপর একটি বড় নিশ্বাস ফেলে বললেন, দিগ্বির জলে আর একটুও রোদ্দুরের আলো নেই। এবার আমার পূজাগৃহে যাবার সময় হল।

অর্থাৎ এবার নন্দকে উঠে পড়ার নির্দেশ দেওয়া হচ্ছে। রানি কলাবতীও গাত্রোত্থান করে বললেন, আমিও যাই, এখনই নাপতেনি আসবে আলতা পরাতে।

নন্দ বুঝেও বুঝল না। বলল, একদিন আয়ানকে ডাকি তা হলে? ছেলেটিকে একবার দেখলে—

রানি তাকে মাঝপথে থামিয়ে দিয়ে বললেন, আরও দু'-চারটি পাত্র দেখুন, হঠাৎ এক কথায় তো বিয়ে হয়

না। পাঁচ জায়গায় দেখতে হয়—

রানিমা, আমি আর একটি কথা বলে যাই। মেয়েকে সৎপাত্রে দেওয়াই পিতা-মাতার দায়িত্ব। অনেক রাজপুত্রও কুলাঙ্গার হয়। আমাদের আয়ানের ঠিকুজি দেখে একজন মন্ত গণকঠাকুর একবার বলে ছিলেন, এ-ছেলের একদিন রাজকন্যা লাভ হবে। সেটা মনে পড়ল বলেই সন্নস্কের কথা বললাম। কে জানে, হয়তো আপনার মেয়ের সঙ্গেই ওই ছেলের নিয়তি বাঁধা আছে। নিয়তি তো কেউ খণ্ডাতে পারে না। আপনারও সুবিধে হবে, মেয়ে কাছাকাছি থাকবে, যখন ইচ্ছে তাকে দেখবেন, যখন ইচ্ছে তাকে বাড়িতে আনবেন। মেয়ের ঠিকুজিটা অন্তত একবার মেলান ওর সঙ্গে।

বৃষভানু বললেন, আচ্ছা দেখি!

রাজপুরী থেকে বেরিয়ে আসতে আসতে নন্দ দেখল, মন্দিরের সিঁড়িতে বসে রাধা তখনও তার সখীদের সঙ্গে মালা গাঁথছে। আবার চক্ষু ভরে দেখল নন্দ। কী রূপ! এই মেয়ে একাই ব্রজ-বৃন্দাবন আলো করে রাখবে। একে কি দূরে কোথাও পাঠানো যায়?

বৃষভানু রাজার পুরী পার হয়ে আসবার পর একটি বেশ বড় মাঠ। মাঠটির মাঝখান দিয়ে রথচক্রের দাগে দাগে একটা পথ তৈরি হয়ে গেছে। একটা মাত্র বড় গাছ রয়েছে সেখানে। মাঝে মাঝে সেখানে কোনও সাধু-সন্ন্যাসী আস্তানা গাড়ে। কাছেই একটা ডোবা। অনেকে বলে ওই ডোবার জল খেলে হজম শক্তি বাড়ে। নন্দ এক আঁচলা জল খেয়ে নিল।

বাড়িতে এসে নন্দ মহা উৎসাহের সঙ্গে যশোমতীকে বলল, জানো, আজ একটা বিয়ের সম্বন্ধ করে এলাম। উঃ, কত বড় ধুমধাম যে হবে!

যশোমতী অবাক হয়ে জিজ্ঞেস করল, কার সঙ্গে কার বিয়ে? তোমার কি ঘটকালির নেশা ধরল নাকি?

তোমার ভাই আয়ান, তার সঙ্গে বৃষভানু রাজার মেয়ের বিয়ে ঠিক করেছি।

যশোমতী গালে হাত দিয়ে বললেন, ওমা, সেকী কথা! তোমার যেমন কাণ্ড! আগে আমাকে একটু জিজ্ঞেস করবে তো!

কেন, কেন, কী হয়েছে? আমাদের গয়লাপাড়ায় একজন রাজকন্যা আসবে, আমাদের কত বড় সৌভাগ্য!

কিন্তু আয়ান যে বিয়েই করবে না প্রতিজ্ঞা করেছে! সে বলেছে, সারা জীবন ব্রহ্মচারী হয়ে থাকবে।

নন্দ এবার হো হো করে হেসে ফেলল। হাসতে হাসতে বলল, যুবাবয়সে অনেকেই প্রথম প্রথম ওই কথা বলে। বৃষভানু রাজার মেয়েকে তো দেখোনি! ঠিক যেন একটি হিরের ফুল। তাকে দেখলেই আয়ানের মাথা ঘুরে যাবে!

যশোমতী তবু চিন্তিত ভাবে বলল, না গো না! আয়ানের একেবারে ধনুর্ভঙ্গ পণ। বড় গোঁয়ার ছেলে। এর আগে কত ভালো ভালো ঘরের মেয়ের সঙ্গে তার সম্বন্ধ করা হয়েছে, কিন্তু বিয়ের কথা শুনলেই সে রেগে যায়!

নন্দ এবার একটু রেগে উঠে বলল, তোমার যেমন

মেয়েছেলের বুদ্ধি! অন্য অন্য মেয়ের সঙ্গে রাধার তুলনা? রাধার সঙ্গে যদি বিয়ে হয়, তা হলে সেটা আয়ানের সাত পুরুষের ভাগ্যি! এখনও ওঁরা রাজি হবেন কি না ঠিক নেই!

যশোমতী তবু মুখে আশঙ্কা নিয়ে বলল, তা যাই বলো, শুধু শুধু তোমার কেন এর মধ্যে মাথা গলানো! আয়ান এসে আমাদের ওপর রাগারাগি করবে!

সতি তাই হল। দিন দু'-এক পরেই দুপুরবেলা পা দুপদুপিয়ে আয়ান এসে হাজির এ-বাড়িতে। মুখে তার গনগনে রাগ।

অন্যরা যখন গোকুল ছেড়ে বৃন্দাবনে চলে আসে, তখন আয়ান আসেনি। তার অনেক বড় বাড়ি, বিশাল বাথান, সে-সবের মায়া ত্যাগ করে চলে আসা সম্ভব নয়। তার সঙ্গে সঙ্গে দু'-চারজন তার অনুচরও সেখানেই থেকে গেছে। এখনও গোকুলে একটি গোপপল্লি রয়ে গেছে। আশেপাশের বেশ কয়েকটা গ্রামের মানুষ আয়ানকে এক ডাকে চেনে।

উঠোনে ধুলোবালি নিয়ে খেলা করছিল কানু। তাকে এক ধমক দিয়ে আয়ান বলল, এই কী করছিস! ওঠ! সারা গায়ে ধুলো মেখেছে একেবারে! তোর বাবা কোথায়? তোর বাবাকে ডাক। তুই আমাকে চিনিস? আমি তোর এক মামা হই। বাবাকে গিয়ে বল, আয়ানমামা এসেছে!

গলার আওয়াজ শুনে নন্দ আর যশোমতী এর মধ্যেই বেরিয়ে এসেছে। নন্দ কৌতুক করে বলল, আরে, আরে,

বড় কুটুম যে! হঠাৎ পথ ভুলে নাকি? তোমার মতন ব্যস্ত মানুষ যে আমাদের বাড়িতে পায়ের ধুলো দিয়েছে—

আয়ান বলল, আপনার সঙ্গে একটা দরকারি কথা বলতে এসেছি!

তা তো বলবেই। আগে এসো, বসো, পান-তামাক খাও! তারপর তো কথা হবে। আগে থেকেই অত রাগ রাগ ভাব কেন?

যশোমতী ঘরের দাওয়ায় আসন পেতে দিল দু'টি। নন্দ আয়ানকে পাশে বসিয়ে বলল, তোমার শরীর-মন সব ভালো তো! পিতামাতার মঙ্গল তো? ধেনুগুলি যথেষ্ট দুগ্ধবতী আছে তো?

আয়ান সেসব কথায় না গিয়ে সরাসরি বলল, আপনি আমাকে বিপদে ফেলার চেষ্টা করছেন কেন, হঠাৎ?

নন্দ অতি নিরীহ সেজে বলল, কেন, কেন, কী হয়েছে? আমি তোমাকে বিপদে ফেলব, একি হতে পারে?

তা হলে দু'দিন ধরে অনবরত বৃষভানু রাজার কাছ থেকে লোক আসছে কেন আমার কাছে? একবার এসে আমার ঠিকুজি চাইছে, একবার এসে আমাকে রাজবাড়িতে নিয়ে যেতে চাইছে, এসব কী?

তা হলে তো মনে হচ্ছে, তোমার ভাগ্যটা খুলেছে। রাজার পছন্দ হয়েছে তোমাকে। এতে রাগের কী আছে?

আমি রাজারাজড়ার সঙ্গে মেলামেশা পছন্দ করি না।

নন্দ মুচকি হেসে বলল, বাবাজীবন, রাজারাজ্ঞাদের পছন্দ না হলেও রাজকন্যাকে তো পছন্দ হতে পারে! তুমি বৃষভানুর কন্যা রাধাকে কি দেখেছ সম্প্রতি?

আয়ান আবার রেগে উঠে বলল, আমি ঠিকই বুঝেছিলাম, এ-সব আপনারই কীর্তি। লোকমুখে শুনেছি, আপনিই কয়েক দিন আগে ব্রজপুরীতে গিয়েছিলেন। রাজার কানে কিছু মন্তর দিয়ে এসেছেন! আমাকে এর মধ্যে জড়ালেন কেন? আমি নিজের বিষয়কর্ম নিয়ে পরিবৃত আছি—

শোনো আয়ান, শ্রীমতী রাধার সঙ্গে তোমার পরিণয় হলে তোমার সংসারে আরও শ্রীবৃদ্ধি হবে!

আমি চাই না সেসব। আপনিও শুনুন, যদি সম্বন্ধ পাতাতেই আপনার সাধ যায়, তা হলে বৃন্দাবনে-গোকুলে আরও অনেক সমর্থ ছেলে আছে, তাদের কারওর কথা ভাবুন, আমাকে নিষ্কৃতি দিন। দিদি, তোমার পতিটিকে নিবৃত্ত করো না!

যশোমতী বলল, আমি বাপু কিছু বলিনি। বারণই করেছিলাম—

নন্দ বলল, বৃন্দাবন-গোকুলে তোমার মতন আর কে আছে আয়ান? তুমিই তো রূপে-গুণে সবার সেরা! তুমি ছাড়া আর কেউ তো শ্রীমতী রাধার ষোগ্য হতে পারে না!

প্রশংসা শুনে একটু মুখের ভাব বদলাল আয়ানের। তবু সে বলল, আমার বিয়ে করার অসুবিধে আছে।

কীসের অসুবিধে? ব্যবস্থাপত্তর সব আমরাই করব!



সে-কথা নয়। বিবাহে আমার রুচি কিংবা বাসনা  
কিছুই নেই।

সে-কথা কি বললে চলে। সংসারধর্ম সকলকেই  
করতে হয়। এ তো আর যেমন-তেমন বিয়ে নয়, ঘর  
আলো করে রাজকন্যা আসবে—

আমি মহামায়ার পূজারী, সংসারধর্ম আমার না-  
করলেও চলে—

ঠান্ডা মাথায় চিন্তা করে দেখো। আর একটা কথা  
বলি। রাজা কংসের বিষ নজর আছে আমাদের ওপরে।  
এখন আবার রাজা বৃষভানুকেও চটানো ঠিক হবে না।  
বরং, ব্রজের রাজার সঙ্গে আমাদের একটা কুটুস্থিতা হলে  
রাজা কংসও আর আমাদের ওপর অত্যাচার করতে  
চাইবে না সহসা। এসব দিকও তো ভাবতে হয়,  
গোষ্ঠীস্বার্থের জন্য তুমি যদি...

অন্যের স্বার্থের কথা ভেবে আমাকে বিয়ে করতে হবে  
নাকি ?

আয়ান, তোমার ওপর আমাদের অনেক ভরসা ! রাজা  
কংস আমাদের বিরোধী। রাজা বৃষভানুকেও চটানো  
আমাদের পক্ষে মোটেই ঠিক হবে না !

বিষয় মুখে আয়ান বলল, অগ্রজাপতি, আপনি সত্যিই  
আমাকে দারুণ চিন্তায় ফেলে দিলেন !

গোয়ালঘরের কাছ থেকে একটা বাঁশির আওয়াজ  
ভেসে আসছিল, সেদিকে হঠাৎ খেয়াল করে আয়ান  
জিজ্ঞেস করল, কে বাঁশি বাজায় ?

নন্দ বলল, আমাদের ছেলে কানু বাজাচ্ছে ! ক'দিন

ধরেই দেখছি, রাখাল ছেলের কাছ থেকে একটা  
আড়বাঁশি জোগাড় করে খুব ফুঁ ফাঁ দিচ্ছে।

সপ্রশংস ভাবে আয়ান বলল, বাঃ, এর মধ্যেই বেশ  
মিষ্টি সুরটা তুলেছে তো!



রাজা কংসের এক খুড়তুতো বোনের নাম দেবকী। তার সঙ্গে বিয়ে হয়েছে বসুদেবের। কংস বিয়ের পরও বোনকে কাছ-ছাড়া করেনি। ভগ্নীপতিকে ঘরজামাই করে রেখেছে। রাজপ্রাসাদে নয় অবশ্য, কারাগারে, সেখানে দেবকী-বসুদেবের যত্নআত্তির কোনও অভাব নেই, অনেকগুলি রক্ষী তাদের দেখাশুনো করে। কিন্তু কারাগারের বাইরে এক পা-ও যেতে পারে না।

দেবকী ছাড়াও বসুদেবের আর এক স্ত্রী আছে, তার নাম রোহিণী। একমাত্র পুত্রকে নিয়ে রোহিণী থাকে আতীরপল্লিতে। স্বামী-সঙ্গ-বঞ্চিতা রোহিণী বড় একটা কারওর সঙ্গে মেশেন না। তাঁর দুঃখ নিয়ে তিনি একলা ঘরের মধ্যে লুকিয়ে রয়েছেন বছরের পর বছর।

একদিন সেই রোহিণী ছেলেকে সঙ্গে নিয়ে বেড়াতে এলেন যশোমতীর বাড়িতে। রোহিণীর ছেলোটর ফুটফুটে ফরসা রং, চেহারা যেন বেশ একটা নাদুসনুদুস ভাব। চলেও

খানিকটা হেলেদুলে। এমনিতে সে বেশ হাসিখুশি ধরনের। কিন্তু হঠাৎ একবার রেগে উঠলে তাকে আর সামলানো যায় না। তার এখন বছর তেরো বয়স।

সেই সময় গোরুগুলোকে মাঠে চরাতে নিয়ে যাবার জন্য গোয়াল থেকে বার করছিল কানু। মশা তাড়াবার জন্য গোয়ালঘরে ধুনো দেওয়া হয়েছিল, সেই ধুনোর ধোঁয়ার মধ্যে কানু যেন একেবারে মিশে রয়েছে।

কানু এখন দ্বাদশবর্ষীয় কিশোর। হাত-পা রীতিমতন সবল। শ্রাবণ মাসের মেঘের মতন গায়ের রং, মাথায় ঝাঁকড়া ঝাঁকড়া চুল। কপাট বুক, খাঁজ-কাটা কোমর, বয়সের তুলনায় তাকে দেখায় অনেক বড়। সে আগে দূরন্ত ছিল, এখন দুর্দান্ত হয়েছে। তাকে নিয়ে যশোমতীর সব সময় ভয়।

যশোমতী সপুত্র রোহিণীকে দেখে একটু অবাক হয়েছে। রোহিণী তো কখনও কারওর বাড়িতে আসে না। রোহিণী রোগা হয়ে গেছে অনেক, মাথার চুলগুলোতে জট বেধে গেছে, কেমন যেন তপঃক্লিষ্ট চেহারা।

যশোমতী কানুর জন্য জলখাবারের পুঁটলি বেঁধে দিচ্ছিল, রোহিণীকে দেখে আসন পেতে দেবার জন্য ব্যস্ত হয়ে উঠল।

গোরুগুলো নিয়ে কানু বেরিয়ে আসার পর রোহিণী তাকে ডেকে বললেন, বাছা, এদিকে একটু শুনে যাও তো!

কানু কাছে আসতে রোহিণী স্নেহের সঙ্গে তার মস্তক আশ্রয় করলেন। তারপর নিজের ছেলের দিকে দেখিয়ে

বললেন, বাছা কানু, ইটি তোমার বড় ভাই হয়, একে প্রণাম  
করো।

কানু আর যশোমতী দু'জনেই অবাক। বন্দাবনের সব  
বালকই সবার ভাইয়ের মতন। এতে নতুন কিছু নেই।  
তবে রোহিণীর কথার মধ্যে কেমন যেন একটা ছকুমের  
সুর আছে।

যাই হোক, মাতৃসমা এক নারী আদেশ করেছেন বলে  
কানু টিপ করে একটা প্রণাম সেরে ফেলল।

রোহিণী আবার বললেন, আজ থেকে যখন তোমরা  
গোষ্ঠে ধেনু চরাতে যাবে, তখন একেও সঙ্গে নিয়ে যাবে!

বিশ্বয় ভেঙে যশোমতী বলল, বাঃ কী সুন্দর ছেলোটি  
তোমার দিদি! কনকচাঁপার মতন গায়ের রং, মুখখানি যেন  
চাঁদের টুকরো। স্বয়ং চাঁদ যেন এসে জন্ম নিয়েছে তোমার  
ঘরে। কী নাম তোমার ছেলের?

রোহিণী বললেন, এর নাম সঙ্কর্ষণ। ডাকনামও আছে  
দুটো। কেউ বলে বলরাম, কেউ বলে বলাই।

যশোমতী বলল, বাঃ, বলাই নামটাই তো সুন্দর।  
আমার কানুর সঙ্গে বেশ মিলে যাবে। কানাই আর বলাই।  
আমার ছেলে জন্মবার কয়েকদিন পরেই তো গর্গ সাধু  
এসে উপস্থিত! গর্গ সাধুকে চেনো তো দিদি? আমি  
ভাবলাম যাক, ভালোই হল। সাধুবাবাকে বললাম, আমার  
ছেলের একটা নামকরণ করে দাও। সাধু অমনি বললেন,  
নাম রাখো শ্রীকৃষ্ণ। আমরা তো এমন নাম আগে কক্ষনও  
শুনিনি। ছেলের গায়ের রং একটু ময়লা, তা বলে নামও  
সেই রকম রাখতে হবে? যাই হোক, সাধুর কথা তো আর



ফেলতে পারি না! কিন্তু অত খটমট নাম তো সব সময় উচ্চারণ করা যায় না, তাই আমরা বলি কানাই, কখনও বলি কানু।

রোহিণী ভূমির দিকে চক্ষু রেখে বললেন, আমি জানি, গর্গমুনি আমার ছেলেরও নামকরণ করে গেছেন। কিন্তু বোন, গর্গমুনি তোমাকে আর কিছু বলেননি?

যশোমতী থতমত গেয়ে বলল, না তো! মানে সাধু তো অনেক কথাই বলে ছিলেন, উনি বেশি কথা বলতে ভালো বাসেন, তুমি কোন কথাটা বলছ দিদি?

রোহিণী উত্তর দেবার আগেই হইহই করে উপস্থিত হল ছেলের দঙ্গল। যে-যার বাড়ির গোরু নিয়ে এসেছে মাঠে চরাবার জন্য। তারা চেষ্টামেচি জুড়ে দিল, এই কানু, যাবি না? আয়! সূর্যি যে মাথায় চড়ল! কানু চঞ্চল হয়ে গোরুগুলির দড়ির বাঁধন খুলে দিয়ে বলল, মা, যাই? খাবারের পুটলি কই, দাও!

রোহিণী তাঁর ছেলেকে বললেন, বলাই তুমিও সঙ্গে যাও! ছোটভাইকে চোখে চোখে রাখবে।

বলাইয়ের হাত ধরে ছুটতে ছুটতে বেরিয়ে গেল কানু। যশোমতীর চোখে শঙ্কার ছায়া। প্রতি দিনই ছেলে বাইরে যাবার সময় তাঁর এই রকম ভয় হয়। অতি দূরন্ত ছেলে, তায় বাইরে আবার শোনা যাচ্ছে নাকি কালীদহে মস্ত বড় একটা অজগর সাপ এসেছে।

যশোমতী ছুটে গেল উঠানের বেড়ার ধারে। কাতর গলায় বলল, কানু, সাবধানে থাকবি কিন্তু! তুই ধেনুগুলোর আগে আগে কিছুতেই যাবি না! ওরে

পরানের পরান নীলমণি, আমার শপথ রইল, মনে থাকে যেন! পথে অনেক তৃণাকুর আছে, দেখে দেখে যাস কিন্তু। আর কারু নামে যে বড় ধেনুটা আছে, সেটা খেপে গেলে তুই যেন তার শিং ধরে থামাতে যাস না! মনে থাকে যেন! মাঠে গিয়ে গাছের ছায়ায় বসবি, গায়ে বেশি রোদ্দুর লাগাসনি, তা হলে আমারও গা পুড়ে যাবে!

কানু অতি শান্ত ছেলের মতো জননীর্ প্রতিটি অনুরোধের উত্তরেই বলতে লাগল, আচ্ছা, আচ্ছা, আচ্ছা, আচ্ছা, আচ্ছা।

মেঠো পথে ধুলো উড়িয়ে ধেনুর পাল নিয়ে ছেলেরা চলে গেল দৃষ্টির আড়ালে।

যশোমতী আবার আস্তে আস্তে ফিরে এল আঙিনার কাছে। যোগাসনের ভঙ্গিতে মেরুদাঁড়া সোজা করে বসে আছেন রোহিণী। চোখের দৃষ্টি তীব্র। দেখেই কী রকম যেন গা ছমছম করে যশোমতীর। ঘরের মধ্যে গিয়ে একটা কাঁসার রেকাবিতে কয়েকটা মিষ্টি সাজিয়ে, পাথরের গেলাসে জল ভরে এনে রোহিণীর সামনে রাখল। তারপর বিনীত ভাবে বলল, দিদি, তুমি গর্গসাধুর কথায় কী বলছিলে?

রোহিণী বললেন, যাক, তিনি যখন কিছু বলেননি, তখন এখন আর বলার দরকার নেই।

কী কথা দিদি, কোনও গোপন কথা?

সময় হলে জানবে!

রোহিণী দিদি, হঠাৎ এতদিন বাদে তুমি আমাদের বাড়িতে এলে, তোমার ছেলেকে বললে কানুর দাদা—



এর মানে কী? আমি তো কিছুই বুঝতে পারছি না!

রোহিণী একদৃষ্টে তাকিয়ে রইলেন যশোমতীর দিকে। তারপর ধমক দেবার সুরে জিজ্ঞেস করলেন, কিছুই জানো না?

যশোমতী খরখরিয়ে উত্তর দিল, না, কিছুই বুঝলাম না। এর মধ্যে কি কোনও গুহা কথা আছে? আমার ভয় করছে, এই দেখো, আমার বুক কাঁপছে। কত বিপদ-আপদ থেকে বাঁচিয়ে রেখেছি ছেলেকে—

রোহিণী এবার একটু নরম হলেন। যশোমতীর বাহু স্পর্শ করে বললেন, ভয় নেই বোন! তুমি, আমি, আরও অনেকে একটি খুব বড় কার্যসাধনের নিমিত্ত হয়ে আছি। আমি ভেবেছিলাম, তুমি তার কিছু কিছু জানো। জানো না যখন, তখন এখন আর জেনে কাজ নেই। জানালে, তোমার অবস্থাও আমার মতন হবে, এমনি শুকনো কাঠ হয়ে যাবে। তার চেয়ে, তুমি রসে-বশেই থাকো। তোমার স্নেহসুধা উছলে দাও! সেই চরম সময় তো একদিন আসবেই—

এদিকে গোপপল্লি ছাড়াতে-না-ছাড়াতেই কানু নিজমূর্তি ধরল। গায়ের উড়নিটা জড়িয়ে বাঁধল কোমরে। সেখানে ছোরার মতন গুঁজে নিল তার আড়বাঁশিটা। তারপর কারু নামে যে বিশাল বলীবর্দটি ধারালো শিং নিয়ে, মাথা নেড়ে নেড়ে, কান লটপটিয়ে আগে আগে যাচ্ছে, সেটির শিং চেপে ধরে লাফিয়ে তার পিঠে চড়ে বসল কানু। জিভ উলটিয়ে চোঁচিয়ে উঠল, ইঃ! ইঃ-রে-রে-রে-রে—

বলীবর্দটির পেটে হাঁটুর চাপ দিতেই সেটা জোর কদমে দৌড়োল। অন্যদের ছাড়িয়ে এগিয়ে গেল অনেকখানি। অন্য রাখালরা চেঁচাতে লাগল। যাসনে, যাসনে, ওরে কানু, যাসনে—। কে শোনে কার কথা।

একেবারে যমুনার ধারে একটা উঁচু টিবির সামনে এসে থামল কানু। লাফ দিয়ে নীচে নামল। অন্যরা এখন অনেক পেছনে পড়ে আছে। অদূরেই ঘন সবুজ তৃণভূমি। সেই তৃণভূমির গা ঘেঁষেই ভাঙছে ছলাৎ ছলাৎ শব্দে যমুনার ছোট ছোট ঢেউ। টিবিটার ওপরে উঠলে দেখা যায়, ডান পাশে, খানিকটা দূরে বড় কদমগাছটার নীচে খেয়াঘাট। আজ বুঝি হাটবার, তাই খেয়াঘাটে এখন বেশ ভিড়, মাথায় পসরা নিয়ে গোপিনীরা দাঁড়িয়ে আছে পার হবার অপেক্ষায়।

অন্য রাখালরা এসে পৌঁছেবার পর গোরুগুলোকে ছেড়ে দেওয়া হল ঘাসবনে। যার যার জলখাবারের পুঁটুলি সব জড়ো করে রাখা হল এক কদমতরুর তলায়। যমুনায় নেমে ওরা হাত-মুখ ধুল। তারপর সুদাম বলল, আজ কী খেলা হবে রে?

এক এক দিন এক এক রকম খেলা জমে। কোনও দিন দেব-দৈত্যা, কোনও দিন গজ-কচ্ছপ, কোনও দিন শুভ্র-নিশুভ্র, কোনও দিন নাগযজ্ঞ: শ্রীদাম বলল, আজ ভাই রাজা-প্রজা খেলা হোক। এই খেলাটায় মারামারি নেই। অন্য দিন আমি বড্ড মার খাই!

সুবল বলল, ঠিক আছে, সেই খেলাই হোক। আমি তবে রাজা হব।

কানু তাকে এক ধাক্কা দিয়ে বলল, যা রে! তোর তো চেহারা'ই প্রজার মতন, তুই কী করে রাজা হবি?

মধুমঙ্গল বলল, তা হলে কে রাজা হবে?

কানু নিজের বুক বাজিয়ে বলল, আমি! তা ছাড়া আবার কে?

সবাই হইহই করে উঠল। অনেক জনের অনেক রকম কথা, ঠিক বোঝা যায় না। সুবল চেঁচিয়ে বলল, না ভাই, কানু কেন রোজ রোজ রাজা হবে? আমরা বুঝি বানের জলে ভেসে এসেছি? কানু কি আমার মতন ভেলকি দেখাতে পারে? সে কি আমার মতন নানা রকম সাজতে পারে?

কানু তার উদ্দেশ্যে তাচ্ছিল্যের সঙ্গে বলল, তা হলে তুমি বহরুপী সেজে রথের মেলায় ভেলকি দেখাও গে! রাজা সাজার অত শখ কেন? যে সবাইকে জয় করে, সেই রাজা হয়!

আহা, তুই যেন আমাদের সবাইকে জয় করে বসে আছিস আর কী!

কানু আবার নিজের বুকে গুম গুম করে কিল মেরে বলল, কোন প্রতিযোগিতায় কে আমার সঙ্গে জিততে পারে, আয় দেখি!

রাখাল বালকদের মধ্যে অংশুমানকেই সবচেয়ে লম্বা-চওড়া দেখায়। তার পাশে দাঁড়ানো মধুমঙ্গলের পেটটি কিছু নাদা হলেও গায়ে বেশ শক্তি। নবাগত বলরামের শক্তি যে কতখানি তা কেউ জানে না!

কোমরে গোঁজা আড়বাঁশিটা হাতে নিয়ে কানু বলল,

আমি এটাকে যমুনায় ছুড়ে দেব, দেখি কে এটা আগে  
তুলে আনতে পারে!

বাঁশিটা সজোরে ছুড়ে দিল কানু, সেটা অনেকখানি  
দূরে গিয়ে ঝপ করে জলের মধ্যে পড়ল। সঙ্গে সঙ্গে জলে  
ঝাঁপিয়ে পড়ল পাঁচ-সাত জন রাখাল বালক।

যদিও এদের মধ্যে কানুই সবচেয়ে ভালো সাঁতার  
জানে, তবু সাবধানের মার নেই। যাতে হঠাৎ কেউ তার  
থেকে আগে-না চলে যায়, সেইজন্যে সে ডুবো সাঁতারে  
গিয়ে শ্রীদামের পা ধরে টান লাগাল, মধুমঙ্গলের ঘাড়  
ধরে চুবুনি খাইয়ে দিল। তারপর বাঁশিটা নিয়ে সগর্বে  
ফিরে এল সবার আগে!

সুবল বলল, আচ্ছা দেখি, এই কদমবৃক্ষটির একেবারে  
মগডালে সবচে আগে কে উঠতে পারে?

কথা শেষ হতে-না-হতেই ছেলেরা লাফিয়ে উঠে  
গাছের ডাল ধরল। কানু তো সকলের আগে উঠবেই, তবু  
সাবধানের মার নেই। সুদাম কানুর থেকে একটা উঁচু  
ডালে পা দিতেই কানু সে ডালটায় হাত দিয়ে ধরে এমন  
ঝাঁকুনি লাগাল যে সুদাম বেচারি পা পিছলে পড়ে যেতে  
যেতে কোনওক্রমে নীচের ডালটা ধরে জীবন বাঁচাল।  
আর অংশুমান গায়ের জোরে কানুকে ঠেলে ওপরে ওঠার  
চেষ্টা করতেই কানু একটা লাল-পিপড়ের বাসা ভেঙে  
ছেড়ে দিল তার গায়। তারপর হাসতে হাসতে সে গিয়ে  
মগডালে উঠে বসল।

তাতেও শান্তি নেই। সেইখান থেকে কানু চৌঁচিয়ে  
বলল, এবার যে-যেখানে আছি সেখান থেকে এক লাফ

দিয়ে মাটিতে নামতে হবে, কে কে পারবে ?

একথায় সব রাখালই শিউরে উঠল। এত উঁচু থেকে লাফালে হাত-পা ভাঙবে নিশ্চিত। কানু বসে আছে সবচেয়ে উঁচুতে। তার মুখেই এই প্রস্তাব।

কানু বলল, আমি গুনছি—চন্দ্র, পক্ষ, নেত্র, চতুর্বেদ।

তারপর সতি সে লাফ দিল। সে একাই শুধু। ঘন পাতাওয়ালা কদম গাছের ডালপালায় গুঁতো খেতে খেতে সে নীচে পড়তে লাগল।

তবু ভাগ্য যে নীচের মাটি বৃষ্টি-ভেজা নরম ছিল। কানু সেখানে ধপ করে পড়ার পর সবাই ছুটে এল তার কাছে। বলরাম এসে কানুর মাথাটা কোলে তুলে নিল। কিন্তু কানু মিটিমিটি হাসছে। তার লাগেনি।

অন্য দুটো খেলায় কানু কৌশল করে জিতেছে বলে যদিও কারওর কারওর প্রতিবাদ করার ইচ্ছে ছিল, কিন্তু এরপর কেউ আর মুখে রা কাড়ল না। এবার সবাই বুঝে গেছে যে, অন্তত সাহসে কানুই সবার সেরা।

বলরাম গভীর ভাবে বলল, কা-কানুই রাজা হ-বে!

সব রাখালরা চোখাচোখি করল। এতক্ষণে তারা ধরতে পেরেছে, বলরাম কেন এত কম কথা বলে। সে একটু তোতলা।

উঁচু টিবিটার ওপর এক জায়গায় আরও কিছু মাটি ফেলে সিংহাসন বানানো হল। সেখানে বসানো হল কানুকে।

মধুমঙ্গল বলল, আমাদের রাজার মুকুট কোথায় ?

সুবল বলল, আমি বানিয়ে দিচ্ছি।

সুবল হাতের কাজ বেশ ভালো জানে। ছদ্মবেশ ধারণেও বেশ ওস্তাদ। অল্পক্ষণের মধ্যেই সে লতাপাতা পাকিয়ে তার সঙ্গে কদমফুল জুড়ে বেশ একটা মুকুট বানিয়ে ফেলল।

কিছু সেটা পছন্দ হল না কানুর। সে বলল, আমার ময়ূরের পালকের মুকুট চাই।

যমুনা তীরে ময়ূরের পালকের অভাব কী? একটু জঙ্গলের মধ্যে খুঁজে কয়েকটা টাটকা পালক নিয়ে এল সুবল। সেগুলোকে গোল করে, লতার বাঁধন দিয়ে বেশ একটা মজবুত ধরনের মুকুট তৈরি হয়ে গেল।

সুবল যখন সেটা কানুর মাথায় পরাচ্ছে, তখন কানু আশ্বে আশ্বে বলল, খুব ছোটবেলায় একজন আমার মাথায় এ রকম একটা ময়ূর পালকের মুকুট পরিয়ে দিয়েছিল।

কে?

কী জানি। তার নাম মনে নেই, মুখ মনে নেই। শুধু মনে আছে তার হাত দু'খানির কথা, আর গায়ের গন্ধ।

কী রকম হাত?

তোর মতন এ রকম কেঠো কেঠো আর শক্ত নয়। কী সুন্দর নরম আর রাঙা রাঙা। ঠিক যেন করমচার মতন। আর গায়ের গন্ধে যেন চন্দনের সুবাস। মনে হয় যেন সেই গন্ধ আমার কতকালের চেনা। যেন আমার আগের জন্ম, তারও আগের জন্মে ওই গন্ধ পেয়েছি।

আহা রে কানু, তোর যে দেখছি চক্ষু বুজে আসছে!

সঙ্গে সঙ্গে কানু পূর্ণ চোখ মেলে কটমট করে তাকিয়ে

বলল, এবার আমি হুকুম জারি করছি, সবাই মন দিয়ে শোনো! প্রজারা, সবাই দেখে এসো, আমাদের গোষ্ঠরাজ্যে কোনও শত্রু ঢুকেছে কিনা! আগে দক্ষিণ দিকে যাও।

সব রাখাল বালক ছুটল দক্ষিণ দিকে।

একটু পরে তারা ফিরে এসে দেখে কানু দিবি খাবারের পুটলি খুলে সিংহাসনে বসে খাওয়ায় মন দিয়েছে! তাদের দেখে কানু আবার হুকুম দিল, দক্ষিণ দেখে এসেছ? এবার উত্তর দিকে যাও। সবাই যাবে।

রাখালরা উত্তর দিকও ঘুরে এসে দেখল, কানু তখনও খাচ্ছে। নিজের পুটলি ছাড়াও আরও তিন-চার জনের খাবার শেষ করেছে। তা দেখে হইহই করে উঠল সবাই। কানু হাসতে হাসতে বলল, তোরা আর একটু দেরি করতে পারলি নে? তা হলে সব কটা পুটলি শেষ করতাম!

সুবল বলল, এবার তুই সত্যিই খাঁটি রাজা হয়েছিস রে কানু! প্রজার অন্ন মেরে রাজা নিজের পেট মোটা করে!

কানু বলল, তোদের বিপদ-আপদ হলে আমিই তো লড়াই করব। তাই আমার গায়ের জোর করে নিচ্ছি।

এমন সময় ঘাসবনের দূর প্রান্তে একটা বিস্ত্রী হ্যাক্কো-হ্যাক্কো-হ্যাক্কো ধরনের কলরব শোনা গেল। সকলে উৎকর্ষ হল এবং বুঝতে দেরি হল না।

এদিকে মাঝে মাঝে বুনো গাধার খুব উৎপাত হয়। এদের বড় বড় দাঁত, গায়েও খুব জোর। গোরু বা মানুষ সামনে থাকেই পায় অমনি টুঁসো মারে আর শক্ত পায়ের চাঁট দেয়। গোরুগুলো বড্ড ভয় পায় এদের।

রাখালরা চেষ্টা করে বলল, রাজামশাই, ওই তো শত্রু এসেছে। ওই তো শত্রু!

কানু লাফ দিয়ে উঠে একটা গাছের ডাল ভেঙে নিতে গেল।

তার আগেই বলরাম বলল, তু-তুই থাক কানু, আমি দেখছি!

বলরাম তিরবেগে ছুটে গেল ঘাসবনের মধ্যে। তারপরেই দেখা গেল সে একটা বুনো গাধার দু' পা ধরে মাথার ওপর তুলে বনবন করে ঘোরাচ্ছে। অতবড় একটা প্রাণীকে ও রকম ভাবে উঁচু করে তোলা—সকলে স্তম্ভিত হয়ে দেখল বলরামের কতখানি গায়ের জোর। বলরাম গাধাটাকে কয়েক পাক ঘুরিয়ে ছুড়ে ফেলে দিল জলের মধ্যে।

তখন কানুও সদলবলে ছুটে গেল। শুরু হল ঘাসবনের মধ্যে এক খণ্ড যুদ্ধ। গৌয়ার গাধাগুলো শুধু সামনেই এগিয়ে আসে, সহজে পিছু হটতে জানে না। কানু লাঠির বাড়ি মেরে মেরে তাদের ক্ষতবিক্ষত করে দিতে লাগল। অন্য রাখালরাও তাদের পাচনবাড়ি দিয়ে পেটাতে লাগল ধপাধপ শব্দে। শেষ পর্যন্ত গাধাগুলো রণে ভঙ্গ দিল, বলরাম ও কানুর হাতে প্রাণও দিয়ে গেল কয়েকটি।

পরিশ্রান্ত রাখালরা আবার ফিরে এল টিবিটার কাছে। যেটুকু খাবার অবশিষ্ট ছিল, ভাগ করে খেতে বসল সবাই। কানু এই অবসরে তার বাঁশিতে ফুঁ দিল। সত্যি বড় মিষ্টি সুর তুলতে শিখেছে ছেলেটা, সারাদিন সে যত দুরন্তপনাই করুক, সন্ধ্যাবেলা শ্মশানের ধারে এক সাধুর কাছে ঠিক



নিয়মিত সে বাঁশি শিখতে যায়। তার সুরের লহরী ছড়িয়ে  
পড়ছে বহু দূর পর্যন্ত। এমনকী তার বাড়িতে যশোমতীর  
কানে গিয়েও পৌঁছায়। সেই বাঁশির শব্দ শুনে মা  
যশোমতী খানিকটা নিশ্চিন্ত বোধ করে।



কৈশোর ছাড়িয়ে কানু এখন সদা যোবনে পা দিয়েছে। অফুরন্ত প্রাণশক্তিতে সে এখন ছুটফটিয়ে মরে। ব্রজ-বৃন্দাবনের সব মানুষ এখন দুর্দান্ত-দুঃসাহসী হিসেবে কানুকে এক ডাকে চেনে। অনেকেই তাকে ভয় পায়।

সবচেয়ে বেশি ভয় মা যশোমতীর। একসময় কানুর বিপদের কথা ভেবে যশোমতী ভয় পেত কংসের সৈন্য কিংবা দৈতা-দানোর। এখন তার ভয়, কানু নিজেই কবে কোথায় কোন গুপ্তগোল বাধিয়ে বসে।

রাখাল দলের সকলেই তার বশ্যতা পুরোপুরি মেনে নিয়েছে। কানু এখন তাদের একচ্ছত্র অধিপতি। একমাত্র বলরামই কোনও দিন কানুর সঙ্গে শক্তি পরীক্ষায় নামেনি, বরং ছোটভাই হিসেবে তাকে সম্মেহ প্রশ্রয় দেয়, কানুর যে-কোনও কাজে সে নিঃশব্দে সাহায্যের জন্য এগিয়ে আসে।

শুধু রাখালি করে তাদের আর আশ মেটে না। তারা

এখন নৌকো বায়, ওপারের হাটে গিয়ে উপদ্রব করে। শোনা যায়, তারা হাটের দোকানি-পসারিদের কাছ থেকে নানান ছুতোয় সওদাপস্তুর কেড়েকুড়ে নেয় মাঝে মাঝে। আলটপকা কোনও বিদেশি পথিককে নাঞ্জেহাল করে ঠেলা দিয়ে। ক্রমেই কানুর অহমিকা বাড়ছে।

এক অপরাহ্নে কানু সদলবলে ফিরছে গোষ্ঠ থেকে, এমন সময় দেখল আভীরপল্লির বাইরে, প্রান্তরের মধ্যে একটি বেশ বড় পূজার আয়োজন চলেছে। বয়স্ক পুরুষ ও নারীরা সেখানে সমবেত, সকলেরই পরনে পট্টবস্ত্র। বড় বড় কাঠের বারকোশে সাজানো রয়েছে ফলমূল। আর কত রকম ক্ষীর-ছানা-নবনীর মিষ্টান্ন। নরম মাটিতে সার দিয়ে দিয়ে ধূপকাঠি পোঁতা। সেগুলিকে ঘিরে গোল করে সাজানো অসংখ্য মাটির প্রদীপ। এত আয়োজনেও সবকিছু সম্পূর্ণ হয়নি, এখনও অনেকে বাড়ি থেকে নিয়ে আসছে পূজার সত্তার।

পুরুষেরা একটু দূরে সারিবদ্ধ ভাবে হাঁটুগোড়ে বসা। সকলেরই যুক্তকর। তাদের মাঝখানে বেশি করে চোখে পড়ে আয়ান গোপকে। তার সুঠাম বলশালী শরীর, উন্নত মস্তক। ডান বাহুতে বাঁধা একটা সোনার তাগা। তার মুখখানি থমথমে গম্ভীর। ইদানীং আয়ান কারওর সঙ্গে মেশে না। কচিং তাকে জনসমাগমে দেখা যায়। তার কোনও প্রিয় সুহৃদ নেই, আত্মীয়স্বজনের সঙ্গেও সে প্রায় সম্পর্ক ছেদ করেছে। আয়ানের এই পরিবর্তনের মর্ম কেউ বুঝতে পারে না। শুধু পূজো-আচার ব্যাপারেই তার উৎসাহ এখনও কমেনি।

রাখালের সবাই একধারে দাঁড়াল। কৌতুক দেখার ভঙ্গিতে কানু কোমরে হাত দিয়ে রয়েছে। ফিসফিস করে সে সুদামকে জিজ্ঞেস করল, হঠাৎ এ সব কী হচ্ছে রে?

পূজা-স্থানের মাঝখানে একটা লাঠি পোঁতা। সেই দিকে ইঙ্গিত করে সুদাম বলল, ওই যে দেখছিস না, ওটার নাম ইন্দ্রযষ্টি। আজ ইন্দ্রের পূজো হবে।

কেন?

পর পর দু' বছর যে খরা গেল! ইন্দ্রের পূজো না করলে আর বৃষ্টি হবে না!

কানু এমন জোরে হা হা করে হাসল যে অনেকেই ঘাড় ঘুরিয়ে তাকাল তার দিকে। অনেক ভুরু কুঁচকে গেল।

বন্ধুরা কানুর গা টিপে বলল, এই চুপ, চুপ। অত জোরে হাসিস না। পূজোর জায়গায় হাসতে নেই!

কানু বলল, এমন মজার কথায় হাসব না? পূজো করলে আবার বৃষ্টি হয় নাকি? বৃষ্টি তো হয় মেঘ থেকে। আকাশে একফোঁটা মেঘ নেই, বৃষ্টি হবে কী করে?

ইন্দ্র সদয় হলেই সব ঠিক হয়ে যাবে!

কচু আর ঘেঁচু হবে।

এই চুপ, চুপ!

একসময় ইন্দ্রের পূজা ছিল গোপপল্লিতে প্রতিবার্ষিক। ইদানীং একটু আলগা পড়ে গিয়েছিল। পর পর দু' বছর অতিশয় খরা হবার ফলে আবার সকলের টনক নড়েছে। সকলেই অপরাধী হয়ে ভেবেছে যে পূজায় অমনোযোগের জন্যই ইন্দ্র ক্রুদ্ধ হয়েছেন। ইন্দ্রের দয়া না হলে আকাশে

সজল মেঘ আসে না। তাই এবার পূজায় ধুমধাম একটু বেশি।

একটুক্কণ থেমে রইল কানু। তারপর আবার বলল, কত ভালো ভালো খাবার দেখেছিস, দেখেই আমার খিদে পেয়ে যাচ্ছে!

ছিঃ, ও তো দেবতার জিনিস। ওর সম্বন্ধে লোভ করতে নেই!

দেবতা কি নিজে এসে এসব খাবেন নাকি? দেবতা কি একা এত খাবার খেতে পারে? আমার এদিকে পেট চুইচুই করছে যে।

প্রবীণ পুরুষরা ইতিমধ্যে অনেকেই চক্ষু বুজে মন্ত্র-পাঠ শুরু করেছে। তাদের বিয় ঘটছে কানুর কথাবার্তায়।

নন্দ ঘোষ দূর থেকে কানুকে দেখতে পেয়ে উঠে এল। ঈষৎ ভর্ৎসনার সুরে বলল, কানু, এখানে গোলমাল কোরো না। মাটিতে বসে পড়ো তোমরা সবাই। হাতজোড় করে মন্ত্র বলো!

কানু উদ্ধত ভাবে বলল, বাবা, এসব পুজোটুজো করে কী হয়!

নন্দ বলল, ওসব আবার কী কথা? ইন্দ্রের পূজো করা আমাদের বংশের নিয়ম। ইন্দ্রদেব সদয় হলে পৃথিবীতে সুষ্টি হবে, তাতে ভূমি উর্বরা হবে। ভালো ফসল না হলে মানুষ সুখে-শান্তিতে বাঁচবে কী করে? চুপ করে বোসো!

কানু তবু বসল না। তাচ্ছিল্যের সঙ্গে বলল, এসব মন্ত্রটন্ত্র শুনে কি ইন্দ্রদেবতা নিজে আসবেন এখানে?

নিজে আসবেন কেন? তিনি বৃষ্টি পাঠাবেন!

তা হলে এত খাবারদাবার কার জন্য? বৃষ্টিতে সব নষ্ট হয়ে যাবে যে!

নন্দ তর্কবাগীশ নয়। অন্যরা যাতে তার ছেলের ওপর বিরক্ত না হয়, সেইজন্যই সে কানুকে শাস্ত করতে এসেছে। কথা ঘুরিয়ে নিয়ে, তার ওপর পিতার ব্যক্তিত্ব আরোপ করার চেষ্টা করে বলল, এসব দেবতার ভোগ! বৃষ্টি পাঠাবার আগে ইন্দ্র নিজে এসে এই ভোগ গ্রহণ করে আমাদের কৃতকৃতার্থ করবেন!

কতক্ষণের মধ্যে? কত পল? কত দণ্ড?

আঃ চূপ করে বসো না! এত কথা কেন?

কানু মানল না। কিছুক্ষণ মাত্র সে ধৈর্য ধরে অপেক্ষা করল। মন্ত্রের গুঞ্জন চলেছে তো চলেছেই। তার কানে একঘেয়ে লাগছে। আকাশের কোনও প্রান্তে মেঘের দেখা নেই। কিছুক্ষণ তার একটু কৌতূহল ছিল। সত্যিই আকাশ থেকে ইন্দ্রদেবতা নেমে এসে এইসব খাবার খেয়ে যাবেন কিনা দেখার জন্য সে আকাশের দিকে তাকিয়েছিল। এখন তাকাতে তাকাতে ঘাড় আর চোখ ব্যথা হয়ে গেছে। আর কিছুই ভালো লাগছে না! দেবতাটেবতা আসবে তো...।

কানুর সত্যিই খিদে পেয়েছে খুব। উঠতি বয়সের খিদে সব সময় দাউ দাউ করে জ্বলে, সামনে খাবার দেখলে আরও বেড়ে যায়। যশোমতীও এখানে রয়েছেন, এখন বাড়ি গেলেও তাকে কেউ খাবার দেবে না।

এক সময় সে পূজাস্থলের মধ্যে লাফ দিয়ে পড়ল।

টেঁচিয়ে বলল, মিথ্যে কথা! কোনও দিন কোনও দেবতা এসে এসব খাবার ছুঁয়ে দেখবে না! রাখালসেনা! তোমরা এসো, এই খাবার ভাগ করে নাও!

নিজেই সে দেবতার প্রসাদ আগে মুখে পুরে দিল।

রাখালসেনারা তার কথায় অবাধ্য হতে পারে না। তারাও হইহই করে ঢুকে পড়ল মাঝখানে। সবকিছু লভভন্ড করে দিল। ফুল-বেলপাতা মাড়িয়ে, কাঠের বারকোশগুলো উলটে পায়েস-পিষ্টক ক্ষীর-নবনী সব লুটেপুটে চেটেপুটে সাফ করে দিল।

আয়ান পা দিয়ে ভূমি আছড়ে উঠে দাঁড়াল। তার গনগনে মুখ দেখলে মনে হয়, এক্ষুনি সে এই ধুষ্ট বালকদের টুটি চেপে ধরবে। কিন্তু সে জিতক্রোধ, অস্থির হাত দু'টি বুকের ওপর আড়াআড়ি করে রাখল, তারপর সে নন্দ ঘোষের সামনে এসে বলল, অগ্রজাপতি, আপনাকেই এর দায়ভাগ নিতে হবে।

আয়ান আর দাঁড়াল না। বিপর্যস্ত পূজাস্থল ছেড়ে তৎক্ষণাৎ সে চলে গেল।

সেদিন অনেক রাত পর্যন্ত নন্দ আর যশোমতীর চোখে ঘুম নেই! স্বামী-স্ত্রী মুখোমুখি গালে হাত দিয়ে বসা। মাথার মধ্যে কুরে কুরে খাচ্ছে চিন্তার পোকা। জ্ঞাতি বন্ধুদের কাছে কী করে মুখ দেখাবে তারা!

কানুর সঙ্গে তারপর আর কথা হয়নি। বিকেল থেকেই পালিয়ে পালিয়ে বেড়াচ্ছিল সে। একটু বেশি রাত্রে চুপি চুপি বাড়িতে ঢুকে নিজের বিছানায় শুয়ে পড়েছে। ঘুমিয়েছে, না মটকা মেরে আছে, তাই বা কে জানে! নন্দ

কয়েক বার চেষ্টা করেছে ছেলেকে ডেকে তুলে একটু শাসন করতে। বাধা দিয়েছে যশোমতী। স্বামীর হাত চেপে ধরে মিনতি করে বলেছে, ওগো না, তাতে যদি আমাদের সর্বনাশ হয়ে যায়? কটু কথা বললে যদি একেবারেই বাড়ি ছেড়ে চলে যায় সে। তখন যে দশ দিক আঁধার হয়ে যাবে, পৃথিবী শূন্য হয়ে যাবে! কেঁদে কেঁদে তখন অন্ধ হয়ে যাব না?

নন্দ সে-কথা অস্বীকার করতে পারেনি। জেদি ছেলে, এমনিতে মারলে বকলে কাঁদে না, কিন্তু যদি অপমান বাজে, তা হলে হয়তো নিরুদ্দেশ হয়ে যাবে! কিন্তু ওর দুরন্তপনা যেমন দিন দিন বাড়ছে, তাতে একটা কিছু তো করতেই হবে!

এখন কানুর ঘুমন্ত মুখ দেখলে কে ওর ওপর রাগ করতে পারে? ওই মুখে যেন বিশ্বের মাধুর্যরস মাখানো। কে বিশ্বাস করবে যে ওই কোঁকড়া কোঁকড়া চুলভরা মাথাটার মধ্যেই এমন দুট্টবুদ্ধি! নিমীলিত চোখ দুটির মধ্যেও কত রূপ। ঠোঁট দু'খানি ঘুমের মধ্যে হাসি হাসি, এমনই থাকে সব সময়।

ঘুমের ঘোরে কানু পাশ ফিরল। তার মাথাটা সরে গেল উপাধান থেকে। যশোমতী তাড়াতাড়ি আবার মাথাটা তুলে দিতে গেল। নন্দ কপট ভর্ৎসনায় বলল, যাক, অত আদর দিতে হবে না! এত আদর দিয়ে দিয়েই তো ছেলের মাথাটি খেয়েছ।

এই সময় একটা ভয়ংকর শব্দ হল। চমকে উঠল নন্দ। যশোমতী স্বামীর জানু আঁকড়ে ধরে একই সঙ্গে হেসে কেঁদে বলল, ওগো, মেঘ ডাকছে।



দু'জনেই ছুটে এল বাইরে। চড়াং করে আর একবার বিদ্যুৎ চমকাল। সন্দেহ কী, কানুর গায়ের রঙের মতন মেঘে ছেয়ে গেছে সারা আকাশ।

নন্দ-যশোমতীর চোখ দিয়ে গড়িয়ে পড়ল আনন্দাশ্রু। দেবতা সদয় হয়েছেন। দেবতারা কক্ষনও ছোট ছেলেদের দোষ ধরেন না। ওরা যে এখনও অবুঝ!

ওরা দু'জন ঘরের দাওয়ায় বসে রইল আকাশের পানে মুখ তুলে। হাত দু'টি প্রার্থনার ভঙ্গিতে উঁচু করা। খানিকক্ষণ পরে যখন বৃষ্টি নামল, তখনই ঘুম নেমে এল ওদের চোখে। বহু দিন পর ওরা পরম শান্তিতে ঘুমোল।

এর কয়েক দিন পর কানু আর-একটা সাজ্বাতিক কাণ্ড করল!

দু'-তিন দিন ধরে বলরামের অসুখ। বলরাম খুবই গুরুভোজী বলে প্রায়ই তার পেটের পীড়া হয়। ক'দিন সে আর গোষ্ঠে যায়নি। সে না থাকলে অনেক খেলা জমে না।

সেদিন সকালবেলা রাখাল ছেলেরা কানুকে ডাকতে এসেছে, কানু বলল, না রে ভাই, আজ আর আমি যাব না। আজ আমি বলাইদাদার কাছে থাকব।

ছেলেরা অনেক কাকুতিমিনতি, অনেক অনুনয়বিনয় করল, কানু টলল না। তা দেখে খুব খুশি হল যশোমতী। ছেলের তা হলে একটু ভবিষ্যজ্ঞান হয়েছে। যে-বলাইদাদা তাকে অত ভালোবাসে, তার অসুখের সময় কি কানুর খেলতে যাওয়া ভালো দেখায়!

একা অসুস্থ ছেলেকে নিয়ে রোহিণী বিপন্ন বোধ করবেন বলে যশোমতী রোজই সেখানে যায় বলাইয়ের শুশ্রূষা করার জন্য। সেদিন কানুকে সঙ্গে নিয়ে গেল।

পীড়িত অবস্থাতেও বলরাম শয্যায় শুয়ে শুয়ে এক বৃহৎ ভাণ্ড ভরতি দুধ-চিড়ে-কলা সাপটাচ্ছে। কানুকে দেখে সে যথার্থ খুশি হল। তাড়াতাড়ি উঠে বসে বলল, মা, কানুকেও আমার মতন খাবার দাও।

রোহিণী ইতিমধ্যে আরও কুশ হয়েছেন। মাথার চুলে আরও জট পড়েছে। চোখ দু'টি আরও জ্বলজ্বলে। তাকে দেখলেই যশোমতীর একটু একটু ভয় করে।

ছেলের অসুখের জন্য রোহিণী একটুও চিন্তিত নন। তিনি কানুকেই দেখতে লাগলেন ভালো করে। তাকে কাছে ডেকে মস্তকের ঘ্রাণ নিলেন, তার চিবুকে, বাহুতে নিজের হাত বুলোলেন। বললেন, বাঃ এ তো বেশ বড় হয়ে গেছে, রীতিমতন শক্ত সমর্থ পুরুষমানুষ।

কানু লজ্জা পেয়ে চূপ করে রইল। বলরাম বলল, জানো মা, যুদ্ধ যুদ্ধ খেলায় কানুর সঙ্গে এখন কেউ পারে না! রোহিণী বললেন, শুধু খেলায় কেন, আসল যুদ্ধেও কানুর সঙ্গে কেউ পারবে না। ওকে অনেক বড় যুদ্ধ করতে হবে। তাই না কানু?

যশোমতীকে নিয়ে ঘরের বাইরে এসে রোহিণী কিছুক্ষণ স্থির ভাবে দূরের দিকে তাকিয়ে রইলেন। তারপর বললেন, বোন যশোদা, এবার তৈরি হও, কানু আর তোমার কাছে বেশি দিন থাকবে না।

এ কী অলুক্ষুনে কথা! শুনলেই বুক কাঁপে। যশোমতীর

মুখ রক্তহীন হয়ে গেল। খুব অশুট ভাবে বলল, এ-কথা কেন বলছ, দিদি?

রোহিণী যশোমতীর দিকে মুখ ঘুরিয়ে বুঝি আরও কোনও কঠোর কথা বলতে যাচ্ছিলেন, হঠাৎ থেমে গেলেন। যেন তাঁর মায়া হল। কণ্ঠস্বর নরম করে বললেন, এসব ছেলে বেশি দিন ঘরে থাকে না!

যশোমতী বলল, কানু আমাকে ছেড়ে কোনও দিন কোথাও যাবে না। সে সে রকম ছেলেই নয়!

রোহিণী দীর্ঘশ্বাস ফেলে বললেন, আগে থেকে মন শক্ত করে রাখাই ভালো। নইলে পরে বেশি কষ্ট পেতে হয়!

যশোমতীর আর থাকতে ভালো লাগল না সেখানে। রোহিণীকে আজকাল সে অপছন্দ করতে শুরু করেছে। খানিকটা পরেই সে কানুকে নিয়ে বাড়ি ফিরে এল।

কিছু দিনেরবেলা একা একা বাড়িতে কানুর মন টিকবে কেন? সে বলল, মা, এখন তা হলে গোষ্ঠে যাই?

যশোমতীর ডান চোখের পাতা কাঁপছে। কী যেন এক অজানা আশঙ্কা তাকে ঘিরে আছে আজ। সে বলল, থাক না, আজ আর না গেলি! আজ তুই আমার কাছে থাক, কানু!

কানু বলল, যাই না, একবার ঘুরে আসি! এই তো যাব আর আসব!

লাফাতে লাফাতে বেরিয়ে গেল সে। আভীরপল্লির পাশ দিয়ে, আখের খেত পেরিয়ে, বনপথ ধরে সে পৌঁছে গেল যমুনার তীরে গোষ্ঠভূমিতে। সেখানে গিয়ে সে চমকে গেল।

রাখালেরা কেউ মাটিতে গড়াগড়ি দিচ্ছে, কেউ গাছের গুঁড়িতে ঠেসান দিয়ে বসে আছে, কারওর মুখে কথাটি নেই। কেউ বড় বড় শ্বাস ফেলছে, কারওর চোখে জল।

এ কী হয়েছে? এ কী হল?

একজন বলল, হায় কানু, তুই ছিলি না। আজ আমাদের সর্বনাশ হয়ে গেছে!

কী হয়েছে? কীসের সর্বনাশ!

আমাদের শ্যামলী আর নেই!

গোষ্ঠের পালের মধ্যে শ্যামলী গাভীটি সবচেয়ে সুলক্ষণা। তার নরম গা থেকে যেন তেল গড়িয়ে পড়ে, তার দীঘল চোখ দুটি যেন দীঘির জলে ভরা। সুবলের বড় প্রিয় ধেনু।

অন্য দিন কানুর বাঁশির সুর শুনে গোরুগুলি সব এক জায়গায় থাকে। আজ কানু নেই, আজ খেলা জমেনি, আজ রাখালদের গোচারণেও মন ছিল না। গোরুগুলি ছিটকে গেছে এদিক-ওদিক। হতভাগিনী শ্যামলীর এমনই কুণ্ঠহ হল আজ, এত বড় যমুনা নদী থাকতেও সে কিনা চলে গেল কালীয়দহের দিকে। সুবল শেষ মুহূর্তে টের পেয়ে ছুটে গিয়েছিল পিছু পিছু, তবু আটকাতে পারল না। জলে মুখ দেবার সঙ্গে সঙ্গে শ্যামলীকে টেনে নিয়ে গেল সেই অজগর সাপটা!

কানু বিস্ফারিত চোখে বলল, অত বড় ধেনুটাকে সাপে নিয়ে গেল?

মধুমঙ্গল বলল, তুই জানিস না কানু সেই মহা অজগর কী প্রকাণ্ড! তার দেহটা বটগাছের গুঁড়ির মতন, তার

দাঁতগুলো কোদালের মতন, তার চোখ দুটো মশালের মতন, তার ফণাটা সমুদ্রের ঢেউয়ের মতন। সেটা তো শুধু সাপ নয়, নিশ্চয়ই কোনও ছদ্মবেশী দৈত্য! তুই শুনিসনি, দৈত্যরা জলের মধ্যে লুকিয়ে থাকতে পারে!

কালীয়দহের সাপটার কথা কিছুদিন ধরেই শোনা যাচ্ছে। দহের জল নাকি বিষ হয়ে গেছে। কেউ ওর ধারে কাছে যায় না। বনের পশুপাখিরাও ওই জল পান করে না, আর শ্যামলীই কিনা মরতে গেল?

দীর্ঘশ্বাস ফেলে কানু জিজ্ঞেস করল, সুবল কোথায়?

রাখালরা উত্তর দিল সেই তো হয়েছে আর এক বিপদ। সুবল সেই কালীয়দহের পারে বসে অবিরল চক্ষুর জল ফেলছে। শ্যামলী যে ছিল তার প্রাণের পুস্তলি! সুবলকে ফিরিয়ে আনার অনেক চেষ্টা হয়েছে, কিন্তু সে কিছুতেই আসবে না। অন্য রাখালরা ভয়ে সেখানে থাকতে পারেনি।

গায়ের উত্তরীয়টা খুলে কোমরে জড়িয়ে শক্ত করে বেঁধে কানু শাস্ত ভাবে বলল, আজ আমি ওই সাপটাকে মারব।

কানু সত্যি সত্যি কালীয়দহের দিকে এগোচ্ছে দেখে সব রাখালরা ঘিরে ধরল তাকে। সবাই সমস্বরে বলল, এ রকম পাগলামি করিস নে কানু! এ তো সাপ নয়, এ তো দৈত্য! মানুষে কখনও পারে এর সঙ্গে!

কানু বলল, ছাড়, আমি যাবই!

অংশুমান বলল, তোকে আমরা কিছুতেই ছাড়তে পারি না। এ তো শুধু গায়ের জোরের ব্যাপার নয়, একটু বিষের ছোঁয়াতেই যে মানুষ শেষ হয়ে যায়।

কানু বলল, আমি এক সাধুর কাছে শুনেছি, জলজ সাপের দাঁতে বিষ থাকে না!

সুদাম বলল, তা হলে দাঁড়া। আমরা ঘোষপল্লির বয়স্কদেরও খবর দিই, সবাই মিলে একসঙ্গে যদি—

ঝটকা দিয়ে হাত ছাড়িয়ে নিয়ে কানু বলল, আমি রাজা না? কোনও বিপদ-আপদ হলে আমাকেই আগে যেতে হবে।

কানু তিরের মতো ছুটছে। তার ছিপছিপে শরীরটা বাতাস কেটে সাঁ করে বেরিয়ে যায়। অন্য রাখালরা বুঝল তাকে এখন আটকাতে যাওয়া বৃথা। কানু কালীয়দহের কাছে পৌঁছে দেখল, সুবল হাঁটুতে মুখ গুঁজে বসে আছে। দহের জল নিস্তরঙ্গ, সেখানকার বাতাসও কেমন যেন থমথমে।

কানু এসে সুবলের ঘাড় ধরে ছেঁচড়ে টেনে আনল অনেকখানি। ধমক দিয়ে বলল, জলের এত কাছে বসে আছিস কেন! সুবল ঝরঝরিয়ে কেঁদে বলল, কানু, আমার শ্যামলী নেই, আমি আর বাড়ি যাব না! কানু ধমক দিয়ে বলল, আগে তাকে আটকাতে পারিসনি কেন? এখন কেঁদে কী হবে? এখন প্রতিশোধ নিতে হবে। আমি প্রতিশোধ নিচ্ছি, তুই দেখ।

তারপর তার বাঁশিটা সুবলের হাতে জমা দিয়ে সে তার কাপড়ে মল্লসাঁট বাঁধল। জলের কিনার ঘেঁষে রয়েছে একটা বড় কদম গাছ, কানু তরতর করে উঠে গেল সেই গাছে। একেবারে মগডালে উঠে সেখান থেকে লাফ মেরে গিয়ে পড়ল দহের মাঝখানে।

এদিকে ভয়-তাড়িত রাখালরা ছুটে গেছে  
আভীরপল্লিতে। সেখানে খ্যাপার মতন তারা আকণ্ঠ  
চিৎকার করতে লাগল ওগো, সর্বনাশ হয়েছে! কে কোথাও  
আছ, শিগগির এসো! কানু কালীয়দহে ঝাঁপ দিয়েছে!

যে-সমস্ত পুরুষরা গ্রামান্তরে যাননি, তারা সবাই এল  
ঘরের বাইরে। নারীরাও বেরিয়ে এল। সকলে মিলে ছুটল  
দহের দিকে। কালীয়দহের চার পাশ একেবারে ভিড়ে  
ভেঙে পড়ল। হাট থেকে ফিরছিল গোপিনীরা, তারাও  
চিৎকার শুনে ছুটে এল।

বেশ কিছুক্ষণ দহের জল একেবারে শাস্ত। কানু কোথায়  
তলিয়ে গেছে। তার আর চিহ্ন নেই। সকলে হাহাকার শুরু  
করেছে। কানুর মা যশোমতী এখনও খবর পায়নি, সে  
যাতে এদিকে না আসে তাই দু'-একজন ছুটে গেল তাকে  
সামলাতে।

এক সময় প্রবল জলোচ্ছ্বাসের সঙ্গে সঙ্গে দহের ঠিক  
মাঝ অংশে ছিটকে ওপরে উঠে এল কানু। তারপর দেখা  
গেল সেই অজগরের মাথা। তীক্ষ্ণ দংড়া মেলে সেটা গ্রাস  
করতে এল কানুকে, কানু ডুব দিয়ে উলটো দিকে এসে  
দু'হাতে চেপে ধরল তার ফণা। প্রচণ্ড লড়াইয়ে সমস্ত দহের  
জল উন্নত হয়ে উঠল।

গোয়ালারা যে-যা পেরেছে লাঠি, বল্লম, রামদা এনেছে  
সঙ্গে, কিন্তু এখন কানু আর অজগরটা এমন অঙ্গাঙ্গী হয়ে  
আছে যে দূর থেকে কোনও সাহায্য করার উপায় নেই।  
তারা দর্শক হয়েই রইল।

প্রায় আড়াই দণ্ড ধরে চলল সেই যুদ্ধ। তারপর

কালীয়দহের কালো জলে দেখা গেল সরু সরু রক্তের রেখা। কানুরই গায়ের রক্ত। সাপটা তার শরীর ক্ষতবিক্ষত করে দিয়েছে। সাপের গায়ে রক্ত থাকে না। কানু শেষ বারের মতন মুচড়ে দিয়েছে অজগরটার ফণা।

রক্তাক্ত শরীর নিয়ে কানু উঠে এল ওপরে। কে তাকে আগে ছোঁবে, কে তাকে আগে শুশ্রূষা করবে, তাই নিয়ে পড়ে গেল কাড়াকাড়ি। আজ কানুর সমস্ত দোষ মুছে গেছে। আজ সে বৃন্দাবনের সকলেরই চোখের মণি।

এতখানি বীরত্ব এই অঞ্চলে কেউ কখনও দেখায়নি। কানু আজ দেখিয়ে দিয়েছে, যে-কোনও ভয়কেই জয় করা যায়।

সেই ভিড়ের মধ্যে কানু বিশেষ করে দেখল একটি নারীকে। তার রূপ আর সকলকে ছাপিয়ে, এই পৃথিবী ছাপিয়ে যেন আকাশ ছুঁয়েছে। পিঠের ওপর ঢাল হয়ে আছে এক রাশ চুল। ভ্রমর কালো চোখের ওপরে বড় বড় পল্লব। তার গ্রীবা যেন নদীর একটি তরঙ্গ।

সেই রমণী তার কাছে আসেনি। তবু দূর থেকে তার দৃষ্টিতে যেন ঝরে পড়ছে মুগ্ধতার আলো। শুধু সেই এক জনের দৃষ্টিতেই কানুর সর্বাঙ্গ জুড়িয়ে গেল।

কানুর মনে হল, সে যে জীবন তুচ্ছ করে ওই সাপটার সঙ্গে লড়তে গিয়েছিল, তা ওই এক জনের দৃষ্টির জন্যই সার্থক হয়ে গেল। অতখানি সুখা মানুষের দৃষ্টিতে থাকে? কানু সেই রমণীকে আরও কাছ থেকে দেখতে চাইল, শুনতে চাইল তার মুখের একটি কথা। কিন্তু পারল না। ভিড়ের মধ্যে যেন সমুদ্রের ঢেউ এসে লেগেছে। রাখাল



বালকরা জোর করে কানুকে কাঁধে তুলে নাচতে নাচতে  
নিয়ে বেরিয়ে গেল। কানু ঘাড় ঘুরিয়েও আর দেখতে পেল  
ন সেই নারীকে।

কানু তাকে চিনতে পারল না। অনেক দিন দেখেনি তো।  
সেই রমণীর নাম রাধা।



সেদিন একজনকে দেখলাম...

কে?

আমার মন ভালো নেই, সুবল। আজ আমার খেলায় যেতে ইচ্ছে করে না। আজ আমার বাঁশি বাজাতে ইচ্ছে করে না। আজ আমি গোচারণে যাব না।

তোর কী হয়েছে কানু!

আমি জানি না। আমার শরীরে জ্বর নেই, চোখে সুখ নেই। তুই আমার সঙ্গে কথা বলিস না, সুবল। কেউ কথা বললে বাতাস কাঁপে, তা এসে আমার গায়ে ঝাপটা মারে।

অমন করিসনি, কানু। তোর কী অসুখ হল? তুই বুঝিস না, তোর কষ্ট হলে আমাদেরও কষ্ট হয়। তোর হাসিমুখ না দেখলে আমরা ত্রিভুবনে আমোদ পাই না। ধেনুদের গলার টুং-টাং শব্দ শুনে তোর মন উচাটন হচ্ছে না? কদম্ব গাছের নীচে তোর সব খেলার সাথীরা বসে আছে, তাদের কাছে

যাবার জন্য তোর মন অস্থির করছে না? আজ আমরা আবার রাজা-প্রজা খেলব। তুই না গেলে কে রাজা সাজবে?

ওসব ছেলেখেলা আর আমার ভালো লাগে না, সুবল! আমি শুধু তাকে দেখতে চাই, তার কাছে যেতে চাই, তার দুটো কথা শুনতে চাই। কোনও দিন কি আমি তার পায়ে আমার মাথা রাখতে পারব? কোনও দিন কি সে সহাস্যে তার কোমল হাতে আমার এই রুম্ব চিবুক একবার স্পর্শ করবে? কোনও দিন কি তাকে আমি সত্যি দেখেছি, নাকি স্বপ্ন কিংবা মায়া?

সে কে? তুই কার কথা বলছিস, কানু?

তাকে দেখিসনি? তার মাথার চূলে ছিল সিঁদুরের টিপ, যেন সজল মেঘে নতুন সূর্য উঠেছে। সোনার পদ্মের মতন তার মুখ, তাই দেখেই যেন চাঁদ লজ্জা পেয়ে দু' লক্ষ যোজন দূরের আকাশে চলে গেছে। তার কাজলটানা চোখ দু'টি খুবই উজ্জ্বল অথচ যেন আলস্যমাখা। তার কোমর খুব সরু, কিন্তু গুরুভার নিতম্বদেশ। সে রাজহংসীর মতন ছন্দোময় ধীর ভাবে হাঁটে...

কিন্তু তাকে দিয়ে কী হবে?

সে আমার সব। আমার গোটা হৃদয়টাই এখন আমার চোখে এসে ভর করেছে। আমার চোখ দিয়ে আমি তার কাছে নিজেকে সমর্পণ করতে চাই।

কী জানি, কার কথা বলছিস তুই। গোপপল্লিতে তো সুন্দরীর অভাব নেই।

ওসব বলিস না, সুবল! তার মতন আর কেউ নয়। শুধু

চোখের দেখায় আর কে আমাকে এমন অবশ করে দিতে পারে? সুবল, আমি আর একটি বার তার কাছে যাব, আর একবার তাঁর মুখের হাসি দেখব।

দেখবি, দেখবি। এই অঞ্চলেরই মেয়ে যখন, তখন আবার ঠিকই দেখতে পাবি। এখন চল, গোচারণে যাই।

নাঃ।

কানু সুবলের হাত ছাড়িয়ে দৌড়ে পালিয়ে গেল। সুবল খানিকটা অনুসরণ করেও নিবৃত্ত হল শেষ পর্যন্ত। কানু ইচ্ছে করে ধরা না দিলে তাকে ধরার সাধ্য নেই সুবলের।

গোচারণ থেকে অনেকখানি দূরে, যমুনার খেয়া পারাপারের ঘাটে এসে বসে রইল কানু। নদী এখন বেশ চওড়া, ওপারের গাছপালা খুদে খুদে দেখা যায়। ওপারে মস্ত বড় গঞ্জের হাট, এপার থেকে গোপবালকরা ওই হাটে যায় বিকিকিনি করতে। তা ছাড়াও সাধারণ মানুষের পারাপার লেগেই আছে। এক নির্বিকার নিঃশব্দ বুড়ো মাঝি সারা দিন খেয়া বেয়ে যায়।

জলে পা ডুবিয়ে কানু সেই নদীর ধারে বসে রইল, বসেই রইল। মাথার ওপরে চড়া হয়ে এসেছে রোদ, তার হুঁশ নেই। একবারও নড়ে না চড়ে না। শরীরের ব্যথা-বেদনার বোধটুকু পর্যন্ত যেন চলে গেছে তার। জলের ওপরে রৌদ্রের স্রোত, আকাশে ঘুরে ঘুরে ডাকছে গাংচিল।

এক সময় কানুর শরীর চঞ্চল হয়ে উঠল। মুখমণ্ডলে দেখা দিল স্বেদ, চক্ষে ব্যাকুলতা। ব্রজাঙ্গনারা ওপার

থেকে এপারে আসছে খেয়ার নৌকোয়। ষোলো-সতেরোটা মেয়ে, তাদের মাঝখানে রাখা। রাখাই যেন চাঁদ, অন্য মেয়েরা তার আভা।

ঘাটে নেমে মেয়েরা কলগুঞ্জন করতে করতে উঠে গেল ওপরে। কানু নড়ল না জায়গা ছেড়ে। রাজ্যের লজ্জা এসে তাকে ভর করেছে। সে যে উঠে রাখার সঙ্গে একটিবার কথা বলবে, সে সাহস নেই।

কানু নির্নিমেমে দেখছে। এই চোখের দেখাই যেন জীবনের সর্বস্ব। রাখার শরীরের প্রতিটি রেখার নামই যে মায়া। সে এত সুন্দর যে কষ্ট হয়। কানুর হাতে এক আঁজলা জল, যেন সে রাখার উদ্দেশে অঞ্জলি দিচ্ছে।

পথটিকে ধন্য করে, পায়ের স্পর্শে যেন পদ্মফুল ফুটিয়ে ফুটিয়ে রাখা যখন সখীদের সঙ্গে চলে গেল অনেক দূরে, তখন কানুর বুক ভেঙে গেল। রাখা একটি বার তাকাল না তার দিকে? সে যে একটা মানুষ বসে আছে ঘাটের পাশে, সেদিকে কি একবারও চোখ ফেলতে নেই? কানুর ইচ্ছে হল, নদীতে ঝাঁপ দিয়ে একেবারে অতলে তলিয়ে যেতে। তার আর বেঁচে থেকে লাভ কী? একটি বার, শুধু একটি বার যদি সে মুখের দিকে তাকিয়ে হাসত...

পরদিন কানু গেল স্নানের ঘাটে। গোপবালারা সবাই এখানে স্নান করতে আসে, রাখাও নিশ্চয়ই আসবে। কানু চুপি চুপি গিয়ে লুকিয়ে বসে রইল একটা ঝোপের আড়ালে। কিন্তু একটু পরেই তার মনে হল, তাকে এখানে বসে থাকতে দেখলে গোপিনীরা নিশ্চয়ই লজ্জা পাবে

কিংবা রাগ করবে। তাতে তো লাভ নেই। সে যে প্রস্তুতি কুমুদিনীর মতন রাধার মুখের হাসিটাই দেখতে চায়। তার চেয়ে বনপথ দিয়ে যখন গোপিনীরা আসবে, সে যদি উলটো দিক দিয়ে সে-দিকেই হেঁটে যায়! তা হলে এক সময় তার মুখোমুখি পড়তেই হবে। তখন রাধা কি একবার চাইবে না তার দিকে? শুধু একটিবার, এক পহমার জন্য? কালীয়দহের তীরে রাধা যে দৃষ্টিতে ভুবন আলো করেছিল, কানু সেটা আর পাবে না কখনও?

এক সময় দূরের বনপথ সুরলহরীতে ভরিয়ে দিয়ে আসতে লাগল গোপিনীরা। তারা রঙ্গ করে গাইছে মানভঞ্জনের গান, চলার তালে তালে ঝুম ঝুম করে বাজছে তাদের কোমরের গোঠ আর চন্দ্রহার আর পায়ের মল। ওরা কখনও একা আসে না, দল বেঁধে আসে। রাধাকে কখনও কানু একা পাবে না।

কানু যখন ওদের পাশ দিয়ে হেঁটে গেল, দু'-একজন গোপিনী তেরছা চোখে দেখল তাকে। কেউ কোনও কথা বলল না। রাধা অবনতমুখী, গানের সুর মেলাতে মেলাতে চলে গেল, একবারও সে দেখল না কানুকে। একটু দূরে গিয়ে সব মেয়েরা মিলে একসঙ্গে হেসে উঠল। কানু পেছন ফিরে দেখল, হাসতে হাসতে গোপিনীরা এ-ওর গায়ে ঢলে পড়ছে। কী এমন হাসির কথা তাদের মনে পড়েছে, কে জানে!

কানুর ইচ্ছে হল, কাছাকাছি কোনও লম্বা গাছে উঠে উড়ুনিটা দিয়ে গলায় ফাঁস জড়িয়ে ঝুলে পড়ে। কিংবা কোনও মৌচাকে হাত ঢুকিয়ে দাঁড়িয়ে থাকে চুপচাপ,

যাতে লক্ষ লক্ষ মৌমাছি তার গায়ে বিষের হুল ফুটিয়ে দিতে পারে। এমনিতেই তো তার শরীরে বৃশ্চিক দংশন হচ্ছে।

কানু বনের অনেক ভিতরে ছুটে গিয়ে, নির্জনে, একটা তমালগাছের নীচে মাটিতে শুয়ে পড়ে গড়াগড়ি দিতে লাগল। তার মুখ দিয়ে দারুণ চাপা কষ্টের শব্দ বেরিয়ে এল, আঃ আঃ—

দু'-তিনদিন বাদে সুবল নদীর ধারে কানুকে খুঁজে বার করল। ঝাঁঝালো গলায় বলল, এ রকম করলে তো আর চলে না রে কানু! তোর বিহনে আমাদের দল ছত্রভঙ্গ হয়ে গেল। কারওর আর কোনও কাজকন্মে মন নেই। বলাইদাদা সব সময় জিজ্ঞেস করেন, কানু কোথায়, কানু কোথায়! তুই বাড়িতে থাকিস না, গোষ্ঠে আসিস না... তুই কি পাগল হলি?

কানু মুখ গোঁজ করে উত্তর দিল, আমার কিছু ভালো লাগে না!

সুবল তবু কানুর হাত ধরে টেনে তুলে বলল, চল তো, কোন ভূবনমোহিনী তোকে এমন পাগল করেছে, তাকে একবার দেখি গিয়ে! চল—

কানু যাবে না, তবু সুবল জোর করতে লাগল। সে কানুর তুলনায় অনেক চটপট মুখে চোখে কথা বলে। সে শুধু গোপিনীদের দিকে হাঁ করে তাকিয়ে থাকবে না, তাদের সঙ্গে ভাব জমাতে পারবে!

গোপবালারা পসরা নিয়ে হাটে চলেছে, কানুকে সঙ্গে নিয়ে সুবল তাদের পিছু নিল। আকাশ হালকা মেঘে

ছাওয়া, তার আড়াল থেকে সূর্য যেন পাঠিয়ে দিচ্ছে  
 দিব্যজ্যোতি। সুপবন সর্বত্র মধুর স্পর্শ দেয়। দিগন্তকে  
 ভাস্বর করে গোপবালারা গান গাইতে গাইতে যায় নদীর  
 দিকে। তাদের হাতে সোনার কঙ্কণ, তাদের মাথায়  
 পিস্তলের হাঁড়ি-কলসিগুলিও সোনার মতন ঝকঝকে।  
 কেউ কাঁধে বাঁক ঝুলিয়ে নিয়েছে, তাদের শাড়ি  
 গাছকোমর করে বাঁধা। রাধা সব সময় থাকে  
 গোপবালাদের মাঝখানে।

রাজনন্দিনী রাধা আয়ানঘরনী হয়ে সংসারের সব কাজ  
 শিখে নিয়েছে। অন্যান্য গোপাঙ্গনাদের মতো সে-ও  
 পসারিণী হয়ে হাটে যায়। গোপপল্লির রীতি এই যে  
 পুরুষরা করে উৎপাদন, মেয়েরা করে বাণিজ্য।  
 মেয়েদের হাতে সওদা দিয়ে হাটে পাঠানোর বিশেষ  
 সুবিধে এই যে, ক্রয়ার্থী পুরুষরা তাদের সঙ্গে বেশি  
 দরাদরি করে না। তারা চেষ্টা করলেও দরাদরিতে  
 মেয়েদের সঙ্গে পারবে কেন?

গোপবালাদের পিছু পিছু আসতে আসতে সুবল  
 জিজ্ঞেস করল, ওগো, তোমরা বুঝি হাটে যাচ্ছ?

সঙ্গে সঙ্গে এক গোপিনী উত্তর দিল, কেন, চোখ নেই?  
 দেখতে পাচ্ছ না?

মুখঝামটা খেয়ে কানু তাড়াতাড়ি সুবলের পিছনে  
 লুকোল। সুবল কিছু দমল না। সে আবার হাসিমুখে  
 বলল, না, তাই ভাবলাম, আমরাও হাটে যাচ্ছি তো,  
 একসঙ্গে যাই!

এক গোপিনী বলল, তার তো কোনও দরকার নেই





বাপু! আমরা রোজ যেমন নিজেরা নিজেরা যাই, আজও  
তাই যাব! তোমরা পথ দেখো!

সুবল বলল, একটাই তো পথ, যদি একসঙ্গে যাই,  
তাতে ক্ষতি কী?

রাধার সখী বৃন্দা পেছন ফিরে দাঁড়িয়ে কোমরে হাত  
দিয়ে বলল, বলি, তোমাদের মতলবখানা কী শুনি?

ব্রজ-বৃন্দাবনের পথে বিশেষ রিপুভয় নেই। কিন্তু  
যুবকদের দৌরাখ্য কোথায় না থাকে! গোপিনীরা ভাবল,  
এই দু'জন এসেছে ছলে-কৌশলে কিছু ক্ষীর-মনি চুরি  
করতে।

সুবল বলল, মতলব কিছু নেই, আমরা তোমাদের ভার  
বয়ে দেব? তোমাদের কষ্ট হচ্ছে—

কানু বলল, হ্যাঁ হ্যাঁ, আমরা তোমাদের ভার বয়ে দিতে  
চাই।

সুবল বলল, আহা, তোমাদের কোমল শরীর, অত  
নরম হাত, তাতে কি আর এত ভার বওয়া যায়?

গোপিনীরা কলকল করে হেসে উঠল।

বৃন্দা বলল, মরণ! ছোঁড়াদের রস দেখো না! বলে  
কিনা কোমল শরীর! রোজ রোজ বুঝি এই ভার অন্য  
লোকে বইছে!

বিশাখা বলল, অত যদি ভার বইবার সাধ, তা হলে  
হাটে গিয়ে মোট বইগে যা না! তাতে দুটো পয়সা পাবি!

সুবল বলল, আমরা তো পয়সা চাই না! আমরা চাই  
তোমাদের সঙ্গে একটু ভাব করতে। তোমরা আমাদের  
পানে চেয়ে একটু হাসবে, দুটো কথা বলবে—

বৃন্দা বলল, যা যা ছোঁড়া! নিজেই কাজে যা! উঃ দেখে  
আর বাঁচিনে!

গোপিনীদের তাড়নায় এক একবার সুবল আর কানু  
পেছিয়ে পড়ে আবার একটু পরেই কাছাকাছি গিয়ে  
ঘুরঘুর করে। সুবল তার কাকুতিমিনতির ভাষা নবম  
থেকে নরমতর করে আনে, তবু গোপিনীদের মন গলে  
না।

শুধু কথায় হয় না দেখে সুবল জোর করে কোনও  
গোপিনীর হাত থেকে পসরা নিজে নিতে গেল। অমনি  
সেই গোপিনী ফৌঁস করে উঠে বলল, এই, গায়ে হাত  
ছোঁয়াচ্ছিস যে? বড় বাড় বেড়েছে না? এক্ষুনি ফিরে গিয়ে  
বাড়ির কর্তাদের বলে দেব!

কানু ততক্ষণে রাধার পাশে গিয়ে দাঁড়িয়েছে। রাধার  
হাত থেকে পসরা কেড়ে নিয়ে বলল, এটা আমি মাথায়  
করে বইছি। এত ভার তোমাকে মানায় না!

কালীয়দহের পাড়ে রাধার মুখে সেদিন যে মুগ্ধতা  
ছিল, আজ তা একটুও নেই। রাধা কাতর ভাবে বলল,  
কেন তোমরা আমাদের বিরক্ত করতে এসেছ? আমরা  
রোজ এই পথ দিয়ে বিকিকিনি করতে যাই—

কানুর বুক ফেটে গেল। রাধার হাসিমুখ সে দেখতে  
চেয়েছিল, তার বদলে দেখল বিরক্তি। রাধা প্রথম তাকে  
যে-কথা বলল, সেটা ভর্ৎসনা!

তবু সে অনুনয় করে বলল, আমি তোমার সঙ্গে  
যাব—

রাধা বলল, না।



ততক্ষণে সব গোপিনীরা ওদের দু'জনকে ঘিরে ধরেছে। কয়েক জনের ভাণ্ড থেকে ক্ষীর-ননি চলকে মাটিতে পড়ে গেছে বলে তারা রেগে আশুন। সবাই ওদের এমন বকুনি দিতে লাগল যেন তাতে একটা ঝড় উঠে গেল। ওরা আর পালাতে পথ পায় না। দু'জনেই পিছু হঠে গেল অনেকটা। গোপিনীরা দ্রুত চলে গেল নদীর পারে।

সুবলের বুক-পিঠ ছানার জলে ভিজ়ে গেছে। কাপড়ের খুঁট দিয়ে মুছতে মুছতে বলল, না রে, কানু, এখানে সুবিধে হবে না! গোপিনীদের দেখতে যত নরম, আসলে তা নয়। এক একটি যেন আশুনের মালসা। তুই যার কথা বলছিলি, তার সঙ্গে তুই ডাব করবি কী করে? তুই কি বামন হয়ে চাঁদে হাত দিতে চাস? ও যে ব্যভানু রাজার মেয়ে, আয়ান ঘোষের ঘরনী—তুই সামান্য বৃন্দাবনের রাখাল—

কানুর চোয়াল কঠিন হয়ে গেছে। সে দূরের দিকে তাকিয়ে আছে একদৃষ্টে। আশু আশু বলল, আমি সামান্য রাখাল হই আর যাই হই, আমি ইচ্ছে করলে ব্রজ-বৃন্দাবন তছনছ করে দিতে পারি!

সুবল বলল, কানু, মাথা ঠান্ডা কর।

কানু তবু বলল, আমি সবকিছু লম্বতলম্ব করে দেব!

সুবল তার পিঠে হাত দিয়ে বলল, ওরে কানু, এত মেজাজ দেখিয়ে লাভ নেই। তুই গায়ের জোরে কালীয়দহের অজগর সাপ মারতে পারিস, কিন্তু গায়ের জোরে তো আর রমণীর মন জয় করা যায় না! এ বড় কঠিন জিনিস!

কানু তখনও দূরের খেয়াঘাটের দিকে চেয়ে আছে।  
ততক্ষণে নৌকায় উঠে পড়েছে গোপিনীরা। তাদের  
রঙিন আঁচল উড়ছে বাতাসে। তাদের মুখগুলি যেন  
পারিজাত ফুলের মতন। এত দূর থেকেও সৌরভ পাওয়া  
যায়।

শ্রোতে দুলতে দুলতে নৌকোটি চলে গেল অনেক  
দূরে।



পরদিন ভোরবেলা কানু কাউকে কিছু না বলে চলে গেল নদী পার হয়ে। হাটে গিয়ে দু'-একটা জিনিসপত্র কিনে সে একটু সাজগোজ করল। তারপর, বনের ধার ঘেঁষে, পথ যেখানে খুব নির্জন, সেখানে একটা পাথরের ওপর বসে রইল গ্যাট হয়ে।

হাটের মানুষরা পথ দিয়ে যায়, আর কানুকে দেখে ফিরে ফিরে। কেউ তাকে চিনতে পারে না। তার মাথায় পাগড়ি, পায়ে কাঁচা চামড়ার নাগরা, কোমরে জরির কোমরবন্ধ। ঠোঁটের ওপর বেশ পুরুট্ট একটা নকল গোঁপ লাগিয়েছে। হাতে একটা বিরাট ধারালো বর্শা। কানুর লোহার দরজার মতন বুক, শালপ্রাংশু বাছ, ওই রকম অপরূপ বেশে তাকে দেখে একটু ভয় করে!

এই পথেরই এক প্রান্তে গঞ্জের হাট, বহুকালের পুরনো। আশেপাশের অনেক গ্রাম থেকেই মানুষজন আসে। সারাদিন ধরে কেনাবেচা হয়। গ্রামের লোকের যা দরকার,

তা এখানেই মেলে। আরও খানিকটা দূরে মথুরা নগরী। সে খুব জমজমে জায়গা। সেখানকার পথঘাটও নাকি কঠিন বাঁধানো! বাড়ির গায়ে বাড়ি। কথায় কথায় সেপাই-সাত্ত্বী এসে ধমকে দেয়। গাঁয়ের লোক চট করে সেখানে যেতে সাহস করে না।

যথাসময়ে ব্রজের গোপিনীরা হাটে সওদা করার জন্য এল এ-পথ দিয়ে। তাদের দেখে কানু একটু নড়েচড়ে বসল। ওরা কাছাকাছি আসতেই সে উঠে পথের মাঝখানে এসে দাঁড়িয়ে হংকার দিয়ে বলল, এ সুন্দরী! সুন সুন! মো নাম হৃষীকেশ। মো-কে পুছ না করে চলে যাইছিস যে?

গোপিনীরা থমকে দাঁড়াল। একজন তার চিবুকে এক আঙুল ঠেকিয়ে, ভুরু তুলে বলল, ওমা! এ আবার কে? এই যমদূতটা আবার এখানে এল কোথা থেকে?

কানু জলদগন্তীর স্বরে বলল, মোকে চিন্হো না? আমি মহাদানী। মো তুম্হারা সকলের পসরা দেখুঁ।

এক গোপিনী মুখঝামটা দিয়ে বলল, মরণ! তোমাকে কেন আমাদের পসরা দেখাতে যাব হে?

কানু কোমরে গোঁজা একটা লাল মলাটের খেরো খাতা বার করে বলল, এই দেখো পাঞ্জি! মহাদানীকে শুঙ্ক দিতে হয় জানো না?

এতদিন ধরে এই পথে যাচ্ছি-আসছি, কোনও দিন তো বাপু এমন কথা শুনিনি?

আগে না শুনেছ তো এখন শোনো!

গোপিনীরা এ-ওর মুখের দিকে তাকাল। হবেও-বা



নতুন নিয়ম। তা ছাড়া এড়িয়ে যাওয়া যাবেই বা কী করে ?  
পথ জুড়ে দাঁড়িয়ে আছে রুদ্রমূর্তি ধরে।

কানাই একে একে তাদের পসরা পরীক্ষা করতে  
লাগল। এবং উদার ভাবে এক এক জনকে ছেড়ে দিয়ে  
বলল যাও, তুম্হারা কিছু লাগবে না। যাও তোমাকে আজ  
ছেড়ে দিলুঁ!

সব গোপিনীই মহাদানীর কাছ থেকে ছাড় পেয়ে গেল,  
পেল না শুধু রাধা।

কানাই রাধার পথরোধ করে দাঁড়িয়ে কর্কশ গলায় বলল,  
এর কাছে তো অনেক জিনিস দেখছি। বহুত দামি দামি  
সওদা। আবার হাতে-পায়ে কত গহনা। চূপড়ি নামাও,  
তোমার সব দেখব।

অন্য গোপিনীরা একটু দূরে ভিড় করে দাঁড়িয়ে আছে।  
কানু তাদের দিকে ফিরে এক ধমক দিয়ে বলল, যাও !  
তোমাদের যেতে বলেছি না ?

ব্রহ্ম পায়ে তারা চলে গেল। সভয়ে বার বার পিছন  
ফিরে দেখতে দেখতে।

চূপড়ি বাসনপত্র নামিয়ে রাধা আড়ষ্ট ভাবে দাঁড়িয়ে  
আছে।

কানু তাকে ভারিঙ্কি গলায় জিজ্ঞেস করল, তুমি কে ?  
তোমার ঘর কোথায় ? কোন দেশে যাবে ?

রাধা ক্ষীণ ভাবে উত্তর দিল, আমার নাম রাধা,  
গোকুলে থাকি, গোয়লা জাতি, গোপিনীদের সঙ্গে আমি  
মথুরা হাটে যাচ্ছি। তুমি এসব কথা আমাকে জিজ্ঞেস  
করছ কেন ?

আমি তোমার পসরা দেখব। তুমি কোন কোন বস্তু নিয়ে  
হাটে যাচ্ছ, আমাকে তার বিচার দাও!

ঘি, দই, দুধ আর ঘোল—এই আমার পসরা। তুমি  
কোন কারণে এর বিচার চাইছ?

এর চেয়ে বিস্তর বেশি মূল্যবান পসরা তোমার আছে।

কী? আমি তো জানি না!

তুমি তা জানবে না, অন্যরাই জানবে।

তুমি কীসের কথা বলছ?

তোমার রূপ।

এ আবার কী রকম কথা?

আমি তোমার রূপের জন্য ভিখারি হতে পারি।

তুমি মশানের ধারে গিয়ে ভিক্ষে করো গে, এই বিকট  
মূর্তি ধরে এখানে বসে আছ কেন?

রাগলে তোমার নীল কমলের মতো চক্ষু দু'টি  
কোকন্দেদের (রক্তকমল) মতন দেখায়।

পথ ছাড়ে! এসব অল্পমতি কথা আমাকে শোনাও,  
তোমার সাহস কী।

তা হলে আমার শুদ্ধ দিয়ে যাও।

কী তোমার শুদ্ধ?

প্রতি ভাণ্ডে ষোলো পণ মহাদান দিয়ে তবে হাটে যাও!

বিস্তর কালে বিস্তর কথা শুনেছি, কিন্তু এমন বিপরীত  
কথা কখনও শুনিনি! এত দিন পর মথুরার হাটে হঠাৎ  
ঘি-দুধের মহাদানী নিযুক্ত হল?

নেকি রাধা, তুমি দেখছি বড় আবালী! এই পাঞ্জির প্রমাণ  
দেখছ না? আমি রাজার কাছ থেকে এই পথ জমা নিয়েছি!

রাধা বিরক্তি ও ক্রোধ নিয়ে তাকিয়ে রইল কানুর দিকে। এত বড় এক সা-জওয়ানকে সরিয়ে সে যাবেই বা কী করে? হতাশ ভাবে বলল, এত পণ আমি দেব কোথা থেকে? আমার কাছে নেই।

কানু সহাসো বলল, তোমার অনেক আছে। তোমার কাছে পণের টাকা যদি না থাকে, তুমি জিনিস দিয়ে তা শোধ করো!

কোন জিনিস!

বললাম তো আগে। রূপ!

ক্রুদ্ধা ফণিনীর মতন রাধা মুখ উঁচু করে কানুর চোখে চোখ রাখল। তারপর বলল, তোমার সাহস তো কম নয়! আমাকে এখানে একা পেয়ে তুমি এমন কথা বলছ! প্রাস্তরে সোনার ঘট দেখে চোরের মন সাত-পাঁচ করে। তুমি দেখছি সেই চোর!

দু' কোমরে হাত রেখে কানু হা-হা করে হাসতে লাগল শরীর দুলিয়ে দুলিয়ে। রাধার ক্রোধ সে বেশ উপভোগ করছে। কৌতুক-চঞ্চল চোখে বলল, আমাকে তুমি চোর বলছ? এর উত্তর আমি তোমাকে দিতে পারি, কিন্তু এখন দেব না!

রাধা বলল, মর্কটের হাতে নারকোল পড়লে তার সেটা খাওয়ার জন্য খুব সাধ হয়। কিন্তু ভেঙে খাওয়ার সাধ্য তার নেই। তুমি সেই রকম একটি মর্কট। কিংবা তুমি একটি শিশু, তুমি আগুনকে ফুল ভেবে তাতে হাত দিতে চাইছ।

অত কথার প্রয়োজন কী? তুমি আমার পণ দিয়ে নিজের মান রক্ষা করো!

রাধা একটা ভাণ্ডের ঢাকনা খুলে বলল, ঠিক আছে, পণের বদলে আমি দ্রব্যই দেব! আমার দই-মাখনের অংশ দিচ্ছি, তাই নিয়ে তুমি দূর হও!

রাধা তার দ্রব্যসম্ভার ভাগ করতে বসল। খানিকটা বাদেই সে আবার বলল, কিন্তু তোমাকে আমার পসরার ভাগ দিয়ে দিলে বাড়িতে গিয়ে আমি হিসেব দেব কী করে?

কানু চট করে বলল, এমন দ্রব্যও তোমার কাছে আছে, যার কোনও হিসেব দিতে হয় না।

কী?

সত্যিই দেখছি তুমি নাবালিকা! কতবার করে বলতে হবে! সেই দ্রব্যের নাম রূপ।

রাধা দর্পিতার মতন উঠে দাঁড়াল। আন্তে আন্তে বলল, সাপের মাথায় মণি জ্বলে, বলপ্রকাশ করে কে তা নিতে পারে?

তারপর রাধা তার হাঁড়ি-কলসি সব উলটে দিল। দুধ-দই-ঘি-মাখন সব গড়িয়ে পড়ল পথের ধুলোর ওপর। সমস্ত পসরাই নষ্ট করে দিয়ে রাধা বলল, এবার? এবার তুমি কীসের জন্য পণ চাইবে?

সুশ্রিত কানুকে সেখানে দাঁড় করিয়ে রেখে রাধা চলে গেল দৃপ্ত পায়ে।

অনেকক্ষণ ধরে তাকে দেখল কানু। আর অনুসরণ করল না। রাধা দৃষ্টির আড়ালে চলে গেলে কানু মৃদু হেসে পাশের জঙ্গলে ঢুকল। আর এক এক করে খুলে ফেলল ছদ্মবেশ। সে-সব সেখানেই পড়ে রইল।

এক কৌশলে হল না দেখে ক'দিন পরে কানু আরেক কৌশল ধরল।

সেদিন ব্রজাঙ্গনারা হাট থেকে ফিরে এসেছে খেয়ার ঘাটে। হঠাৎ তারা অবাক হয়ে দেখে, তাদের চিরপরিচিত সেই বুড়ো মাঝি সেখানে নেই। তার নৌকোও নেই। তার বদলে একটা ছোট্ট ভাঙা নৌকো নিয়ে এক কচি চেহারার মাঝি দাঁড়িয়ে আছে।

আকাশে দলা দলা মেঘ। ফিনফিনে হাওয়া দিচ্ছে। বেলা পড়ে এসেছে। এর মধ্যেই একটু ছায়া ছায়া ভাব। সকলেরই বাড়ি-ফেরার তাড়া।

নবীন মাঝির চুল চূড়ে করে বাঁধা। কপালে ফেট্টি। তাম্বুল-রাঙা ঠোঁট, চাদর দিয়ে মুখের অনেকখানি ঢাকা। গোপিনীদের দেখে সে চেঁচিয়ে উঠল, গেল-গেল-গেল-গেল, কে পারে যাবে জলদি এসো, জলদি, জলদি—

গোপিনীরা বলল, এমা! এ আবার কী মাঝির ছিরি! আমাদের সেই মাঝি গেল কোথায়?

নবীন মাঝি বলল, বড় মাঝির উদুরি হয়েছে, সে আজ আর আসবে না। যেতে হয় তো জলদি করো! আমার এক কাহন করে পণ। তা আগে থেকে কয়ে দিলাম কিন্তু!

অ্যাঁ! এই তো ভাঙা নৌকো, তার আবার এক কাহন!

ভাঙা নাও দেখেছ, কন্নধারের গুণ তো দেখোনি!

এক গোপিনী আর এক জনকে বলল, কী জানি বাপু, কেলটে ছোঁড়ার নৌকায় উঠতে আমার ভয় করছে। শেষে ডুবিয়ে মারবে কিনা কে জানে!

অন্য গোপিনী রঙ্গ করে উত্তর দিল, এর জন্য কেউ আবার ইচ্ছে করেই ডুবে না মরে! নতুন কর্ণধারের মোহন রূপটি দেখেছিস? বুড়ো মাঝি ছিল বলেই আমাদের ওনারা এতকাল ভরসা করে ছেড়ে দিয়েছে!

অন্য সখী বলল, আমি কিন্তু অত কালো রং দেখে মজি না, ছুঁলে যেন হাতে কাঁচা রং উঠে আসবে।

আরেক জন বলল, ওরে, তোরা কি গল্প করেই বেলা পার করে দিবি? বাড়ি যেতে হবে না?

কিন্তু এর নৌকোয় যে বাড়ি ফিরতে পারব, তার ভরসা কী?

এ কি সেই বুড়ো মাঝির ছেলে? আগে তো একে দেখিনি?

কী ঠাটকাটা বাবা! প্রথমেই বলে কিনা এক কাহন পণ! আগে ভালোয় ভালোয় পারে পৌঁছে দেবে, তবে তো পণ চাইবে!

মাঝি চোঁচিয়ে বলল, যাবে কি যাবে না, সাফ কথা বলে দাও। আমার নাও এখনি ছাড়বে!

তখন গোপিনীরা দেখল আর উপায়ান্তর নেই, প্রাণ সংশয় করে এই টুটোফুটো নৌকোতেই যেতে হবে। কখন ঝড়বৃষ্টি নামবে তার ঠিক নেই। সবাই হুড়মুড় করে চলে এল জলের কাছে।

মাঝি আঁতকে উঠে বলল, আরে, রও রও রও, করো কী, করো কী! সবাই মিলে উঠে কি আমার নাও ডোবাবে নাকি? আমার এ ভাঙা নাও-এ একবারে একজনের বেশি যায় না!

এই বলে সে টপ করে রাধার হাত ধরে টেনে তুলে নিল নৌকোর ওপর। তারপর পায়ের ধাক্কায় নৌকো কূল-ছাড়া করল। মুখ থেকে তার সরে গেছে চাদরের ঢাকনা।

তখন তীরের গোপিনীরা সবিস্ময়ে বলল, আরে, এ সেই কানু ছোঁড়া না? দেখেছ ছোঁড়ার কাণ্ড? গাল টিপলে দুধ বেরোয়, তার এত রস?

কানু ততক্ষণে পাকা মাঝির ভঙ্গিতে মুখ দিয়ে হে-হে লহে লহে লহে লহে শব্দ করে খুব জোরে জোরে বৈঠা চালাচ্ছে। রাধা অবাক হয়ে দেখছে তাকে। কানুর সূঠাম শরীর, বালকের মতন মুখ, দুট্টমি-ভরা চোখ।

রাধা জিজ্ঞেস করল, তুমি তো কানাই! তুমি একী করছ?

কানু বলল, তোমাকে একলা নিয়ে পালিয়ে যাচ্ছি!

ছিঃ, ও-কথা বলে না। তুমি এ রকম পাগলামি করছ কেন?

আমি তো পাগলই, কিন্তু তুমিই তার জন্য দায়ী।

ওমা, সে কী কথা? আমি তোমার কী করেছি?

তুমি আমায় সর্বস্বান্ত করেছ। এখন তুমিই আবার আমায় ধনী করতে পারো।

আমি সখীদের সঙ্গে হাটের পথে যাই-আসি। কোনও দিন তো অন্য কারওর পানে তাকাইনি। তুমি কেন আমায় দোষারোপ করছ? আমি তোমায় সর্বস্বান্ত করব কেন, পাগলই বা করব কী করে?

হ্যাঁ, তুমিই আমাকে পাগল করেছ। কালীয়দহের পাড়ে, সেদিন তুমি কেন অমন করে চোখ দিয়ে হেসে ছিলে? কেন

তোমার এমন ভুবন আলো-করা রূপ? তোমার যাওয়া-আসার পথের ধারে আমি কত দিন দাঁড়িয়ে থেকেছি, তুমি ক্রম্বেপও করেনি! যেন আমাকে দেখতেই পাও না। আসলে কিছু দেখতে পেতে। একদিন তুমি যমুনার ঘাটে যাচ্ছিলে, আমাকে দেখে কেশবজ্ঞানের ছলে কেন বাহু তুললে? সে-তো আমাকে পাগল করার জন্যই। মুখ মোছার জন্য তুমি যে-ই তোমার বৃকের রেশমি আঁচল ঝোচালে, অমনি আমি তোমার কূচভার দেখলাম। তা দেখে আমি প্রায় মূর্ছিত হয়ে পড়ছিলাম। নদীতে জল তোলার সময়, তুমি যেন জলের সঙ্গেই চুপি চুপি মধুরসবাক্য বলছিলে—এসব কি আমাকে পাগল করার জন্য নয়?

রাধা ব্রহ্মে বলে উঠল, না, না, তুমি ভুল বুঝেছ। তুমি প্রায়ই আমাদের পেছনে পেছনে আসতে, সেদিন তোমাকে অত কাছাকাছি দেখে আমি ভয় পেয়ে দ্রুত যেতে গেলাম, সেইজন্য আমার কেশ এলিয়ে গেল। তাই দু'হাত তুলে আমি কেশ সংযত করেছিলাম। বাতাসে আমার বৃকের আঁচল খসে গিয়েছিল, দৈবাৎ সেই সময়েই তুমি তাকিয়েছ। আমাকে দেখে যদি তোমার মন বিচলিত হয়, তবে তো আমার বেঁচে থাকাই উচিত নয়! আমি কি তবে আজ থেকে স্বেচ্ছাবন্দি হয়ে থাকব?

কিন্তু সেই সময় তুমি তোমার চোখ দুটিও তরল করেছিলে।

চোখ তরল করেছিলাম? সে তো ভয় ও লজ্জায়।

না।





নিশ্চয়ই! কানু, তুমি এসব কী বলছ? আমি যমুনার জলের সঙ্গে তো মধুরসপূর্ণ কথা বলতেই পারি, কিন্তু তোমার সঙ্গে তা বলব কেন? তোমার জন্য এখনও আমি ভয় পাচ্ছি। যাকে আপদে পায়, সে নিজেকে চিনতে পারে না। তুমি মতিচ্ছন্ন-হেতু পাগল হয়েছে!

ভা যদি সত্যও হয়, তবু এখন আমাকে আবার সুস্থ করে তোলার উপায়ও তোমার হাতে।

কী সে উপায়?

তোমার আলিঙ্গন।

লজ্জায় রাধার কর্ণমূল ও গালে রক্তিম আভা ছড়িয়ে পড়ল। মুখখানি যেন কুক্কুম-মাখানো স্থলকমল। সে কানুর দিকে আর ভালো করে তাকাতে পারল না। মুখখানি পাশের দিকে ফিরিয়ে জল দর্শন করতে করতে বলল, আমাকে ওসব কথা বোলো না, বলতে নেই।

কানু বলল, তুমি স্নানের ঘাট থেকে ফিরছিলে, আমি দেখেছিলাম। সে যেন আমার দিব্যদর্শন। তোমার ভিজ্ঞে চুল দিয়ে জল ঝরছে, যেন মুখশশীর ভয়ে আঁধার কাঁদছে। মুখের ওপর এসে পড়েছে চূর্ণ অলক, যেন মধুলুক্ক ভ্রমর। কুচ যুগল যেন দু'টি সুন্দর চক্রবাক—কোন দেবতা তাদের এনে মিলিয়েছে—আর পাছে উড়ে না যায় তাই ভুজপাশে বেঁধে রেখেছে। হাত দুটো যখন একটু সরালে, তখন আবার অন্য রকম মনে হল—যেন দুটো সোনার বাটি উলটো করে বসানো। কিংবা ঠিক হল না। তোমার পয়োধরের ওপর সিন্ধু বসন—ঠিক যেন মনে হয় সোনার বেলফলের ওপর হিম পড়েছে। সত্যি এ রকম মনে

হয়েছিল। তোমার মনে হচ্ছে না, এসব পাগলের প্রলাপ ?

রাধা এবার সর্বাঙ্গ বসনে ভালো করে ঢেকে, বাহুতে মুখ লুকিয়ে বলল, কানু, এসব কথা তুমি কোথা থেকে শিখলে ? আমাকে এসব বোলো না। আমি তোমার থেকে বয়সে বড়। তা ছাড়া সম্পর্কে তোমার আত্মীয় !

কানু ঝাঁঝের সঙ্গে বলল, ইস ভারী তো আত্মীয় ! সাতজন্মে দেখা নেই, তার আবার আত্মীয়তা ! তুমি আমাদের বাড়িতে কখনও এসেছ ?

কারওর বাড়িতে যাওয়া আমার নিষেধ।

তবে ? আর বয়সের কথা বলছ ? সুন্দরের কোনও বয়স আছে নাকি ?

আত্মীয়তা যদি না-ও মানো, তবু এ-কথা তো মানবে যে আমি পরের ঘরনী ?

হঠাৎ এই কথা বলে রাধা কেঁদে ফেলল। কানু সে-কান্নার মানে বুঝতে পারল না। সে রাধার কম্পিত শরীরের দিকে চেয়ে রইল।

রাধা আবার বলল, কানু আমার এমনিতেই অনেক কষ্ট। তুমি আর আমাকে কষ্ট দিয়ে না।

কানু বলল, আমার কষ্ট তোমার চেয়ে মোটেও কম নয়। তুমি তা বোঝো না, কারণ তুমি আমার দিকে চেয়ে দেখো না। সে যাই হোক, তুমি যেখানে ঘরনী আছ, তা থাকো—কিন্তু এখানে তো এটা কারওর ঘর নয়। এখানে মাথার ওপরে আকাশ, চারদিকে কোনও দেওয়াল নেই—এখানে আমার মনে হয়, আমিই সবকিছুর অধিপতি। এখানে তুমি আমার !

রাধা বলল, তুমি চোরের মতন আমাকে চুরি করে নিতে চাও! তোমার ছেলেবেলার অনেক দূরস্তপনার কথা শুনেছি—কিন্তু তুমি যে এ রকম চোর হয়ে উঠেছ, তা জানতাম না।

কানু মিটিমিটি হেসে বলল, তুমি এর আগেও একদিন আমাকে চোর বলেছিলে—

কবে আবার বললাম?

বলেছিলে, তোমার মনে নেই। সেদিন তোমায় উত্তর দিইনি। আজ দিই? আসলে তুমিই চোর।

আমি?

নিশ্চয়ই। তুমি, শ্রীমতী রাধা, একটি মস্ত বড় চোর।

আমি কবে কী চুরি করেছি?

শুনবে? তুমি রাজকন্যা কিনা, তাই তোমার পক্ষে চুরি করা অনেক সহজ। দেখো, তুমি স্বর্ণের বর্ণ চুরি করে নিজের অঙ্গে লুকিয়ে রেখেছ। চন্দ্রের কিরণ চুরি করে রেখেছ নিজের চন্দ্রাননে। মদনের ধনুকটা চুরি করে রেখে দিয়েছ ভুরুর মাঝখানে। বনের হরিণীর কাছ থেকে তুমি হরণ করেছ তার চোখ দু'টি। পঞ্চ বিশ্বের শোভা চুরি করে তুমি রেখেছ তোমার ওষ্ঠে। কোকিলের স্বর চুরি করে রেখেছ নিজের কণ্ঠে। সাদা বেগুনের মসৃণতা চুরি করে তুমি রেখেছ তোমার চিবুকে। কোন মরালীকে নিঃশেষ করে তৈরি হয়েছে তোমার গ্রীবা। সুমেরু পর্বতকে বঞ্চিত করে শোভিত হয়েছে তোমার কুচযুগ। সিংহের কাছ থেকে চুরি করেছ তার কোমরের খাঁজ। গজের কাছ থেকে চুরি করেছ তার গতি। কদলীকাণ্ডের গড়ন চুরি করে রেখেছ

নিজের উরুতে। তম্বুরা বাদ্য হরণ করে রেখেছ তোমার  
নিতম্বে। পদ্মফুলের কোমলতা রেখেছ তোমার পায়ে।  
একসঙ্গে এতগুলো চুরি আর কে করতে পারে? এর  
চেয়েও বড় কথা, তুমি চুরি করেছ আমার চিত্ত। তুমি  
আবার আমাকে চোর বলো?

আকাশে মেঘ জমাট হয়ে এসেছে। আর রাধার খুব  
কাছে নৌকোর ওপর বসে আছে এক মেঘবর্ণ যুবা। রাধার  
বুকের মধ্যে গুড়গুড় করে উঠল। এখনই বুঝি ঝড় উঠবে,  
শুরু হবে প্রলয়।

নৌকো রয়েছে মাঝনদীতে। কানুর আর নৌকো  
বাওয়ার দিকে মন নেই।

রাধা কানুকে কী উত্তর দেবে কিছুতেই ভেবে পেল না।  
বেশ কিছুক্ষণ চুপ করে থাকার পর সে হঠাৎ বলে ফেলল,  
আমার ভয় করছে।

কানু জল থেকে বৈঠা তুলে ফেলল। বাতাসের বেগ  
বেড়েছে, শ্রোতের ধাক্কায় দুলতে লাগল নৌকো।

কানু হাসতে হাসতে বলল, আমি তো রয়েছি, ভয় কী!  
তুমি শুধু আমায় একটি বার আলিঙ্গন দাও!

যেন নিজেকেই বেশি করে শোনানো দরকার, সেইজন্য  
রাধা জোরে জোরে তিন বার উচ্চারণ করল, না, না, না!

দু'টি আঙুল তুলে, সামান্যতর ভঙ্গি করে কানু বলল,  
তুমি যদি আমাকে একটুখানি, এই এতটুকুও দয়া করো—  
না, না, না।

দেখো, এই যে আকাশ, বাতাস, দশ দিক—এখন  
আমার মনে হয় আমিই এই সবকিছুর অধীশ্বর। আমার

মনে এই জোর আছে যে আমি ইচ্ছে করলেই সব কিছু পেতে পারি। সেই আমি, তোমার কাছে দয়া চাইছি। তুমি আমার হও।

তা হয় না, কানু, তোমার সঙ্গে আমি কথায় পারব না— কিন্তু তুমি আমাকে আর কষ্ট দিয়ো না!

কানুর তনয় ভাবটা কেটে গেল, আবার জেগে উঠল তার মধ্যে দুর্দান্তপনা। সে ইচ্ছে করে পা দিয়ে নৌকোটা দু'লিয়ে দিল। তারপর কড়া গলায় বলল, শোনো রাধা, ভালোমানুষের বি, তোমাকে একটা কথা বলি! দেখো, শনশন করে বায়ু বইছে, আমার ফুটো নৌকো দিয়ে কলকল করে জল উঠছে, এখন যদি আমার কথা না শোনো, তা হলে নৌকো ডুবে গেলে আমি দায়ী হব না!

রাধা ব্যাকুল ভাবে বলল, না, না, এই গহীন নদীতে ডুবে গেলে আমি আর কুল পাব না।

ডুবতে তোমাকে হবেই মনে হচ্ছে।

কানু, তুমি আমাকে বাঁচাবে না?

তোমাকে বাঁচাবার জন্যই তো আমি এসেছি। কিন্তু সেজন্য আমাকে অবলম্বন করে থাকতে হবে তোমায়। আমাকে শক্ত করে ধরে না-থাকলে স্রোতে তোমাকে ভাসিয়ে নিয়ে যাবে যে।

কানু, তুমি আমাকে ভয় দেখাচ্ছ। তুমিই তো আমাকে জোর করে তুলে এনেছ নৌকোয়!

আমি না-আনলে তুমি নদী পার হতে কী করে?

কিন্তু এখন মাঝনদীতে তুমিই আমাকে ডুবিয়ে দিতে চাইছ।

ডুবতে গেলে মাঝনদীতেই ডোবা ভালো।

না, কানু, আমি ডুবতে চাই না। কেন ডুবব?

ভয় নেই, ডুবলে আমরা দু'জনেই ডুবব, বাঁচলে আমরা দু'জনেই বাঁচব। তুমি আমায় ধরে থাকো।

দেখো, নদীতে কত খরশ্রোত। নৌকোটা জোরে জোরে দুলছে। তোমার এই ভাঙা নৌকোয় এক্ষুনি বুঝি জল উঠবে।

নৌকো ভাঙা হোক না, আমি মাঝিগিরি জানি ভালো। তুমি ভয় পেয়ো না। আমিই তোমাকে তোমার সঠিক ধামে নিয়ে যেতে পারি।

সে যে অনেক দূর। এ-নৌকো কি তত দূর পৌঁছোবে?

তোমার সঙ্গে এত চূপড়ি-প্যাটরা, তাই তো নৌকো বেশি ভারী হয়ে গেছে!

কানু আবার ইচ্ছে করে জোরে নৌকোটা দুলিয়ে দিল।

রাধা সঙ্গে সঙ্গে বলল, ফেলে দিচ্ছি, আমার বাসনপত্র ফেলে দিচ্ছি জলে।

রাধা নিজে একটা দধিভাণ্ড জলে ফেলে দিতেই কানু উৎফুল্ল ভাবে অন্য হাঁড়ি-কলসিগুলোও জলে ছুড়ে ফেলতে লাগল।

কিন্তু দুটু কানু তাতেও যেন ঠিক সন্তুষ্ট নয়। সে কপট দৃষ্টিস্তার সঙ্গে বলল, উঁহু! এখনও যেন নাওটা ভারী ঠেকছে!

রাধা বলল, আমার যা-কিছু ছিল সবই তো ফেলে দিয়েছি!

কানু বলল, না তো! সব তো দাওনি। ওই যে তোমার গলায় রয়েছে মুক্তামালা। বাজুতে সোনার তাগা। কোমরের

গোঠ, পায়ের মল। ওগুলোও কি কম ভারী নাকি? দেখো, আমি রাখাল, আমার কিছুই নেই। তোমার এত কিছু আছে বলেই তো এত জ্বালা!

রাধা গা থেকে একটি একটি করে অলংকার খুলতে খুলতে পরম মায়াভরে বলল, এগুলো সবই ফেলে দিতে হবে?

তা তো হবেই!

সব অলংকার টুপটাপ করে খসে পড়ল যমুনার জলে।  
ওণ নৌকো টলমল করে।

কানু বলল, এখনও একটু ভারী ভারী লাগছে!

রাধা জিঞ্জেরস করল, এবার তো আমার যথাসর্বস্ব জলাঞ্জলি দিয়েছি! তবু কেন ভয় দেখাও?

না, সব তো দাওনি।

দিইনি? আর কী বাকি আছে?

লাজলজ্জা!

পরক্ষণেই নৌকো এমন ভয়ংকর ভাবে দুলে উঠল যে রাধা আর পারল না। মহা ত্রাসে সে উঠে এসে দু' হাতে কানুকে জড়িয়ে ধরল।

কানুর চোখে, ওষ্ঠে; চিবুকে, বুকে, সারা শরীরে, এমনকী মাথার চূলে পর্যন্ত খুশি উছলে উঠল। সে বলল, আমাকে এমন ভাবে যদি ধরে থাকো, তা হলে আমি তোমাকে যে-কোনও নদী পার করে দিতে পারি।

কানুর কাঁধে গণ্ড স্থাপন করে রাধা আবেশভরে বলল, আমি প্রাণ-ভয়ে যদি তোমাকে আলিঙ্গন করি, তাতে কি কোনও পাপ হয়?



কানু বলল, কী জানি, পাপ-পুণ্যের কথা অন্য লোকে  
ভাবে। ওসব আমি জানি না। ওসব আমার মাথাতেই আসে  
না।

তারপর সহর্ষে, রাধাকে শক্ত করে জড়িয়ে ধরে, কানু  
পায়ের ধাক্কায় নৌকোটা উলটে দিয়ে জলে লাফিয়ে  
পড়ল।

মরকতমণি দিয়ে গড়া তরণীর মতন কানু ভাসতে লাগল  
জলে। তার বুকের ওপর রাধা যেন এক অজানা দেশের  
শ্বেতহংসী।



সন্ধ্যা হয়ে গেছে অনেকক্ষণ। ধুলোভরা গ্রাম্য পথ ভিজিয়ে  
দিচ্ছে জ্যোৎস্না। চার দিক সুনসান। তার মধ্যে ভিজে  
শাড়ি-পরা, মাথায় ভিজে চুল নিয়ে হেঁটে আসতে লাগল  
রাধা। একা। তার পায়ে শব্দও শোনা যায় না।

গোকুলের পথ দিয়ে এই সময় কোনও নারী একা যায়  
না। রাধার নিজের কাছে নিজেকেই অপরিচিত মনে হয়।  
রাত্রির পথ তো সে কখনও চোখে দেখেনি। কোনও  
কোনও বাড়ি থেকে চেনা নারীকণ্ঠ শুনে তার আরও বিস্ময়  
জাগে। দু-একজন সখী আগেই ফিরে গেল কী করে? রাধা  
জানে না, বুড়ো মাঝি একটু পরেই তার নৌকো নিয়ে  
হাজির হয়েছিল ওপারে। সে বেচারির নৌকোর দড়ি খুলে  
কে যেন মাঝনদীতে ভাসিয়ে দিয়েছিল। অতি কষ্টে সেই  
নৌকো উদ্ধার করে এসে পৌঁছোতে তার দেরি হয়।

চিন্তামগ্ন ভাবে রাধা এসে দাঁড়াল বাড়ির সামনে। চার  
দিকে কাঠের প্রাচীর-ঘেরা বাড়ি। ভেতরে প্রশস্ত চত্বর,

সেখানে তখনও কাজ চলছে। পাঁচ-সাতটা বড় উনুনে ঘি জ্বাল দেওয়া চলছে, তার তদারকি করছে স্বয়ং আয়ান ঘোষ।

রাধা যখন বাড়ির মধ্যে ঢুকল, কাঠের দরজায় ক্যাচকোঁচ শব্দ হতেই আয়ান চোখ তুলে তাকাল। রাধার দিকে সে নির্নিমেষে তাকিয়ে রইল কয়েক মুহূর্ত, কিন্তু একটি কথাও বলল না। অবনতমুখী রাধা পায়ে পায়ে চলে গেল ভেতরে।

এক ঘর থেকে তার ননদিনী বেরিয়ে এসে চমকে উঠে বলল, ওমা! এতক্ষণ কোথায় ছিলি, বউ?

রাধা উত্তর দিল না।

ননদিনী তার পথ জুড়ে দাঁড়িয়ে বলল, একী, সারা গা ভেজা, মাথা-ভরতি জল—এই সন্কেবেলা কোথায় ডুব দিতে গিয়েছিলি?

রাধা ব্যথাময় দু'টি চোখ তুলল। যদি কোনওক্রমে নিষ্কৃতি পাওয়া যেত। যদি কিছু সময়ের জন্যও তাকে একলা থাকতে দিত এইসময়।

রাধার একটা হাত ধরে ননদিনী আবার আঁতকে উঠল। হাতের সোনার কঙ্কণ কোথায়? গলার হার কই? পায়ের মলও তো নেই। দেখি কোমর দেখি! এটাও তো নেই। কোথায় গেল সব? তোকে ডাকাতে ধরেছিল নাকি?

আচ্ছন্ন গলায় রাধা বলল, হ্যাঁ, ডাকাত!

অ্যাঁ? কে? কোথায়? বল বল, এক্ষুনি দাদাকে ডাকছি। দেখি, কোন ডাকাতের সাহস আছে আয়ান ঘোষের ঘরগীর গায়ে হাত দেয়।

না, না, ডাকাত নয়, ডাকাত নয়!

তবে কে? চোর!

হ্যাঁ, চোর, না, তঞ্চক। না তাও নয়।

তবে কে?

ঝড়। খুব ঝড় উঠেছিল তো!

কখন ঝড় উঠল? আজ তো ঝড় ওঠেনি। ঝড়ে বুঝি গায়ের গয়না খুলে নিয়ে যায়!

না। ঝড়ও নয়। বলছি! আগে কাপড় বদলে নিই!

রাধার সঙ্গে সঙ্গে ননদিনীও এসে ঢুকল তার ঘরে। দড়িতে মেলা শুকনো জামাকাপড় সেই আগে তুলে নিল নিজের হাতে। রাধার কৈফিয়ত না-শুনে দেবে না। তারপর বলল, আগে ঠিক করে বল কী হয়েছে? কোনও ভয় নেই। আমি দাদাকে বলব না—

রাধা বলল, একটা নীল কমল...

আঁ?

নৌকোয় করে আসছিলাম, একসময় দেখি যে জলে একটা নীলকমল ভাসছে। কী সুন্দর তার রূপ, এমন আর আগে দেখিনি। হাত বাড়িয়ে যেই সেটা ধরতে যাই, অমনি সেটা সরে যায়। একটু যেই বেশি ঝুঁকেছি, অমনি আমার গলা থেকে হারটা খসে গেল। সেটা তোলার জন্য জলে ঝাঁপিয়ে পড়লাম—

কী সর্বনেশে কথা! তারপর?

তখন দেখি, সেই পদ্মের মৃগালে একটা সাপ জড়ানো। ভয় পেয়ে সেটা ছেড়ে দিলাম। তারপর সোনার হারের সঙ্গে আমিও ডুবতে লাগলাম। ডুবতে ডুবতে চলে গেলাম

একেবারে নীচে, সেখানে দেখি জোড়াসন করে এক  
কিশোর বসে আছে। সে দেবতা না দানব, আমি জানি না।  
তাকে দেখে ভয় করে, আবার ভয়ও করে না। আমাকে  
দেখে সে অদ্ভুত ভাবে হেসে বলল, তোমাকে আমি  
মারতেও পারি, বাঁচাতেও পারি। আমি হাত জোড় করে  
বললাম, আমাকে বাঁচিয়ে দিন। সে বলল, তা হলে তোমার  
যথাসর্বস্ব আমাকে দাও! তাই দিলাম! একে একে আমার  
সব অলংকার খুলে...

আর কিছু দিসনি তো?

আমার আর কী আছে? দেখো না, আমার সর্ব অঙ্গে  
রিক্ততা ছাড়া এখন আর কি কিছু আছে?

বড় বাঁচা বেঁচে গেছিস তো আজ। শুনেছি জলের তলায়  
অনেক রকম অপদেবতা থাকে...তাকে দেখতে কেমন?

ঠিক যেন নতুন বর্ষার এক টুকরো মেঘ।

জলের মধ্যে মেঘ? তা হলে তুই দেখলি কী করে?

ভয় পেয়ে যখন চোখ বুজেছিলাম, তখন আরও ভালো  
করে দেখতে পাচ্ছিলাম।

ওমা, একী সাংঘাতিক কথা! শুনে আমারই যে বুক  
কাঁপছে, বউ! যাক বেঁচে গেছিস, এই ঢের। গয়নাগাঁটি  
গেছে যাক, তোর গয়নার অভাব কী?

এই রোমহর্ষক ঘটনার বিষয়ে ননদিনী আরও বেশ  
কিছুক্ষণ আলোচনা চালাল। তারপর রাধাকে পোশাক  
বদলাবার জন্য একা রেখে বেরিয়ে গেল বাইরে।

তখন রাধা দরজায় আগল দিয়ে কাঁদতে বসল। তাকে  
এখন অনেক কান্না কাঁদতে হবে। দুঃখের কান্না, সুখের কান্না।

এরপর রাধা আর সহজে বাড়ির বাইরে বেরোতে চায় না। শরীর খারাপের অজুহাত দেয়। একা একা গবাস্কের ধারে বসে থাকে। কেউ তার অন্তরের ব্যথা বোঝে না। কেউ তাকে ডাকলেও তার কানে আসে না। তার আহ্বারে রুচি নেই। সাজসজ্জায় মন নেই। একটা গেরুয়া গেরুয়া শাড়িতে তাকে যোগিনীর মতন দেখায়। কখনও সে বেণীবন্ধন খুলে নিজের চুলের দিকে তাকিয়ে থাকে, কখনও তার চোখ চলে যায় আকাশের মেঘের পানে, আর অমনি দীর্ঘশ্বাস পড়ে। তাদের পোষা ভবন-শিখী দু'টি যখন খেলা করে, তখন রাধার দৃষ্টি স্থির হয়ে থাকে শুধু তাদের কণ্ঠের ওপর। ময়ূরকণ্ঠী রং দেখলেই বুঝি তার বুক কাঁপে।

এ-বাড়িতে একটা খুব বড়ি স্ত্রীলোক থাকে। তার সঙ্গে কার যে কী সম্পর্ক তা বলা দুষ্কর। সবাই তাকে বড়িমা বলে ডাকে। মানুষটি বড় স্নেহপ্রবণ। বিয়ের পর থেকেই রাধা তার কাছে অনেক সুখ-দুঃখের কথা বলে।

সেই বড়ি একদিন এসে বলল, ওলো নাতনি, তোর কী হয়েছে বল তো?

রাধা উত্তর দিতে পারে না। তার নয়নে জল, কণ্ঠে বাষ্প এসে যায়।

বড়ি রাধার গা ছুঁয়ে বলল, ক'দিন ধরেই দেখছি, তুই ভালো করে খাস না, আমার কাছে চুল বাঁধতেও আসিস না! এই কদিনেই কী ছিরি হয়েছে দেখ তো! আগে তুই ছিলি একটা সোনার ফুল, এখন হয়েছে দড়ি! কেন এমন করছিস, মা!

রাধা বুড়িমাকে জড়িয়ে ধরে হু হু করে কেঁদে ফেলে।

বুড়ি পরম স্নেহে তার পিঠে হাত বুলিয়ে দেয়। আস্তে আস্তে বলে, তুই কি আমাকেও কাঁদাবি! জানিস না, আমি চোখের জল সহিতে পারি না। তোর কী হয়েছে, আমাকে বল না!

বুড়িমা, আমার মরণ হয় না!

যুবতী মেয়ের তো দু'রকম মরণ আছে। তার মধ্যে এই মরণ তো খুব সুখের। দেখি, দেখি, মুখটা তোল দেখি তুই কোন মরণে মরেছিস?

রাধা আরও বেশি করে মুখ লুকোয়।

বুড়িমা জোর করে রাধাকে স্নানে পাঠায়। রাধা কিছুই খেতে চায় না, বুড়িমা জোর করে তার মুখে অন্ন তুলে দেয়। একদৃষ্টে চেয়ে থাকে রাধার মুখের দিকে। তার চোখ দিয়ে ঝরে পড়ে বহুকালের পুরনো স্নেহ। এক সময় বুড়িমা দীর্ঘশ্বাস ফেলে রাধাকে বলে, নাতনি, তোর দুঃখ আমি বুঝি। বৃষ্টি ছাড়া যেমন চাতকের তৃষ্ণা আর কেউ মেটাতে পারবে না, তেমনি তোর দুঃখও বুঝি একজনই ঘোচাতে পারে। সে কে? সে কোথায়?

একদিন বৃন্দা আর ললিতা এল এ-বাড়িতে বেড়াতে। রাধার শুকনো মুখ, স্থির দৃষ্টি আর রাঙা বাস দেখে তারাও খুব চকিত হয়ে গেল।

দুই সখী রাধার দু' পাশে বসে ব্যাকুল হয়ে অনেক প্রশ্ন করতে লাগল। রাধা সহজে মুখ খুলতে চায় না।

তখন ললিতা একটু রেগে গিয়ে বলল, তোকে আর হাটের পথে দেখি না, খেয়াঘাটে দেখি না,—কোথাও দেখি

না। তুই কি আর আমাদের সঙ্গে দেখা করবিই না ঠিক করেছিস?

রাধা বলল, না, আমি আর কোথাও যাব না। আমি আর কোনও দিন হাটে যাব না, খেয়া পারে যাব না। আমার ভয় করে!

কীসের ভয়?

মানুষের চোখের ভয়, মানুষের কথার ভয়!

তা হলে তুই অন্তত স্নানের ঘাটেও আয়। আমরা কত দিন কদমতলায় তোর জন্য দাঁড়িয়ে অপেক্ষা করি।

রাধা কঁপে উঠে বলল, না, না আমি কদমতলাতেও আর যাব না কোনও দিন।

ললিতা বলল, ভয়ে যেন তোর মুখ শুকিয়ে যাচ্ছে! কেন কদমতলায় কি বাঘ এসেছে নাকি?

বৃন্দা বলল, হুঁ, কদমতলায় প্রায়ই একটা কালো রঙের বাঘ এসে বসে থাকে দেখছি আজকাল!

ললিতা বলল, খেয়াঘাটে সেই বাঘটাই আবার নতুন নেয়ে সেজে আসে!

বৃন্দা বলল, সেই তো আবার হাটের পথে দানী সেজে বসে। অবশ্য আমাদের সে কিছু বলে না। শুধু এক শিকারের দিকেই তার লোভ।

রাধা বলল, থাক থাক সে-কথা থাক!

বৃন্দা বলল, রাই, তুই মরেছিস বুঝি?

ললিতা বলল, না, না, রাই কিছু করেনি, সেই ছোঁড়াটাই তো জ্বালায়। সেদিন থেকে দেখছি, ছোঁড়াটা এসে জ্বালা করে রাইয়ের ভার বহিতে চায়। রোদ লেগে



রাইয়ের সোনার অঙ্গ পুড়ে যাবে বলে মাথার ওপর সে এসে ছাতা ধরে, মুখে তাম্বুল গুঁজে দেয়, সেদিন থেকেই বুঝেছি, ছোঁড়া একেবার মজেছে। আমাদের তো কেউ কোনও দিন এমন করেনি! তোকেই শুধু সে কেন এত জ্বালায়?

বৃন্দা তাকে ধমক দিয়ে বলল, তুই থাম ললিতা, তুই কী বুঝিস? এক হাতে কখনও তালি বাজে না। রাইয়ের অবস্থা দেখছিস না! কানুর কথা তোলামাত্র ওর চোখের তারা ঘন ঘন কাঁপছে! দীর্ঘশ্বাস পড়ল ক'বার! দেখ না, ওর গায়ের তাপ কতখানি বেড়েছে। যেন ওর দেহপিঞ্জরটা এখানে পড়ে আছে, প্রাণপাখি চলে গেছে অন্য কাকে খুঁজতে।

ললিতা বলল, সই, আমাদের রাধাকে অমন করে বকিসনি। রাই কোনও দিন আন-পানে তাকায়নি, কোনও দিন একবারও মুখ তুলে কথা বলেনি। কুলের মান রাখতে রাখতেই ও তো এতদিন কাটাল।

বৃন্দা বলল, সে যাই বলিস, এবার কিন্তু রাই মরেছে! যেদিন সেই কালো ছোঁড়া নৌকোয় তুলে নিয়ে গেল সইকে, সেদিনই বুঝেছি সই এবার ডুবল।

ললিতা বলল, বালাই যাট, আমাদের সই ডুববে কেন? আমরা তাকে বাঁচাব।

বৃন্দা হেসে ফেলে বলল, ললিতে, তুই তো সে-ডোবার স্বাদ জানিস না, তুই কী বুঝবি? সে-ডোবা থেকে কেউ বাঁচতে চায় না!

রাধাকে নীরব দেখে বৃন্দা এবার ফিসফিস করে বলল,

সই, তাকে একটা কথা বলি! সে-ছেলেটাও কম যন্ত্রণা পাচ্ছে না। ক'দিন ধরে দেখছি, যেন একেবারে পাগল হয়ে গেছে। মাথার চুলে চুড়ো বাঁধে না, অন্য রাখালদের সঙ্গে খেনু চব্বাতে যায় না। সকাল নেই, রাত নেই, মাঠেঘাটে গাড়াগাড়ি খায়, কখনও একমনে বাঁশি বাজাতে বাজাতে দণ্ড সাধন পাগ করে দেয়। আমাদের দেখলেই সে ছুটে আসে, মুখের দিকে এমন ভাবে তাকিয়ে থাকে যেন আমরা কিছু বলব। বৃদ্ধ, সে তোর কথাই শুনতে চায়। আহা, বড় কষ্ট হয় আজকাল ছেলেটাকে দেখলে।

মাটিতে নখ দিয়ে দাগ কাটতে কাটতে রাখা বলল, আমার পিতৃকুল, স্বশুরকুল—দু'য়েরই সুনাম আছে। কেতাদন আমি সেই দু'কুল নির্মল রেখেছি, আমার কষ্টের কথা কাউকে বলিনি। এখন আমি কী করি বল তো? আমি নিজেদের কত কঠিন করে রেখেছি তাই বাইরে যাই না! অখাচ খরকে মনে হয় অরণ্য। চন্দনও আমার উত্তপ্ত বোধ হয়। এখন আমি কী করি তোরা বলে দে?

বৃদ্ধা বলল, এ বড় কঠিন প্রশ্ন! কানাইকে আমরাও যেন নতুন করে দেখছি। আগে ওকে ভাবতুম উটকো ছোঁড়া। তখন কী রকম যেন বদলে গেল? ওই নবজলধর কান্তি, কপাট বৃক, কারশুশোর মতন হাত, গলায় গুঞ্জা ফুলের মালা এমন পুরুষ আর কে কবে দেখেছে? ওর বড় দৃষ্টিব বিদ্যুৎ তাকে ছুঁয়েছে, তোর বুদ্ধি আর উপায় নেই।

রাখা বলল, আমি মনে লাগে চাই, ওর সঙ্গে যেন আর আমার দেখা না হয়! যদি দেখা হয়, তবুও যেন প্রশ্ন

অনেক দূরে থাকে। আর যদি প্রণয়ই হয়, তবে সখী তোদের বলি, আমার মতন আর কারওর যেন বিচ্ছেদ না হয়! এর কী অসহ্য জ্বালা, তোদের বোঝাতে পারব না। আর যদি বিচ্ছেদই হয় তবে যেন আর দেহ ধরতে হয় না। এর চেয়ে মরণ অনেক অনেক সুখের। সখি, আমাকে এমন কোনও ওষুধ দিতে পারিস যাতে আমার যৌবন জীর্ণ হয়ে যায়?

বৃন্দা বলল, এই মেরেছে! আমরা এলাম তোকে বকুনি দিতে, তার বদলে তুই-ই যে আমাদের কঠিন প্যাঁচে ফেলতে চাইছিস! না বাবা, উঠি! চল ললিতা।

ললিতা সরল বিস্ময়ে বলল, এ কেমন প্রণয় যাতে মানুষ মরতে চায়?

যার জন্য এই প্রণয়, তাকেই যদি না-পাওয়া যায়, তা হলে বাঁচতে কার ভালো লাগে?

কেন তাকে পাওয়া যাবে না? কানু ছোঁড়া তো মুখিয়ে আছে!

বৃন্দা আবার ললিতাকে ধমক দিয়ে বলল, তুই থাম তো, তোর আর বুদ্ধিসুদ্ধি হল না। রাধা পরের ঘরের বউ, তার প্রণয় যে শরীরের রোগ-ব্যাধির মতন লোকের চোখে পড়ে যাবে! সে যে দারুণ জ্বালা। সেই জ্বালার কাছে প্রণয়ের মতন কোমল কুসুমটি কি বাঁচে?

দুয়ারের কাছে গিয়ে থমকে দাঁড়িয়ে পেছন ফিরে বৃন্দা দেখল, রাধা মুর্ছিতার মতন দেওয়ালে ঠেসান দিয়ে বসে আছে। সে একটা দীর্ঘশ্বাস ফেলল। তারপর প্রবোধ দেবার সুরে বলল, সখি, যৌবনকে বিড়ম্বিত করিসনি। কাল থেকে

আবার হাটের পথে আয়। আবার আমরা একসঙ্গে গান গাইব, যমুনায় জলকেলি করব, ফুলবাড়িতে চয়ন করতে যাব। কানু যদি কাছাকাছি থাকে তো থাক না। চোখের দেখায় তো দোষ নেই। শুধু একবার চোখের দেখাতেও তো অনেক সুখ!

চোখ বন্ধ রেখে রাধা শান্ত অথচ দৃঢ় স্বরে বলল, না। আমি যাব না। আমি আর কোনও দিন যাব না!

বৃন্দা আর ললিতা বেরিয়ে গিয়ে বনপথ ধরল। তাদের অনেকটা দূরে যেতে হবে। দু'জনেই গম্ভীর। রাধা তাদের প্রাণের সহি। রাধার কষ্ট দেখে তাদেরও কষ্টের অবধি নেই। আজকাল রাধা সঙ্গে থাকে না বলে তাদের পথ দীর্ঘ মনে হয়। কথায় কথায় আর কৌতুক উচ্ছল হয়ে ওঠে না।

যমুনার ধারে ধারে সরু পথ। হঠাৎ এক জায়গায় একটা গাছের ডাল থেকে কানু লাফিয়ে পড়ল তাদের সামনে। ব্যাকুল ভাবে জিজ্ঞেস করল, ললিতা, বৃন্দা, তোমরা রাধাকে দেখতে গিয়েছিলে? সে কেমন আছে?

গোপিনী দু'জন প্রথমটা চমকে উঠেছিল। তারপর নিজেকে সামলে নিয়ে বৃন্দা বলল, সে ভালো আছে। কিন্তু আমার সখীর খোঁজে তোমার কাজ কী!

কানু বলল, তার কাছে আমার একটা মূল্যবান জিনিস জমা আছে, তাই খোঁজ নিচ্ছিলাম?

রাধা আবার তোমার কী জিনিস নিয়েছে?

একটা মৃগশাফল, নদীর ধারে কুড়িয়ে পেয়েছিলাম, তাই আমি ওর হাতে—

ললিতা বলল, বুঝেছি! এসব হচ্ছে ঠাকারের কথা।

আমাদের সখীর আর কাজ নেই, সে ওর জিনিস নিতে গেছে! সে রাজনন্দিনী, সে কিনা বাঁদরের হাত থেকে মুক্তো নিতে যাবে?

কানু তবু বলল, কেন, তোমরা ওর বুকোর কাছে সেই মুক্তাফল দুলতে দেখোনি।

না দেখিনি! আমরা দেখলাম, সে নিজের জ্বালায় জ্বলছে। চন্দন তার কাছে বিষতুল্য। পবন যেন হুতাশন। সে চাঁদকে সূর্য মনে করছে। কানু, আমাদের সখী এখন জীবন্ত-মরা, তুমি তাকে আর দক্ষ কোরো না।

বৃন্দা-ললিতা আবার হাঁটতে শুরু করতেই কানু তাদের পেছন পেছন এসে অনুনয়বিনয় করতে লাগল, বলো, বলো, রাধার কথা আর একটু বলো—

এক সময় বৃন্দা পেছন ফিরে মুখঝামটা দিয়ে বলল, আ মরণ! আমাদের বৃষ্টি তাড়া নেই, আমাদের বৃষ্টি কলঙ্কের ভয় নেই? সে তো মরতে বসেছে, কালাচাঁদ, তুমিও মরো!

কানু তাদের বারণ মানে না। ভিখারির মতন অনুনয়বিনয় করতে করতে অনেকক্ষণ ওদের পেছন পেছন যায়।

সন্ধ্যার সমস্ত কাজকর্ম সেরে তারপর আয়ান পূজোর ঘরে ঢোকে। সেখানে সে প্রত্যেক দিনই অনেকক্ষণ থাকে। কালীর পূজো সেরে বেরোতে বেরোতে তার মধ্যরাত্রি পেরিয়ে যায়। রাধা তখন নিজের খাটে ঘুমিয়ে থাকে। আয়ান এসে একবার স্ত্রীর শয্যার পাশে দাঁড়ায়।

রাধার চুলগুলি খোলা, ওষ্ঠে একটা পাণ্ডু রেখা, ঘুমন্ত অবস্থাতেও তার কপালটা একটু কুঁচকে গেছে, সেখানে

দুঃখের ছায়া। ক্ষীণ চাঁদের আলো এসে পড়েছে তার বরতনুতে। রাধার সূক্ষ্ম নেত বস্ত্রের আঁচল মিশে গেছে সেই জ্যোৎস্নায়।

ডান হাত বাড়িয়ে আয়ান একবার আলতো ভাবে স্ত্রীর ললাট স্পর্শ করল। তারপর একটা দীর্ঘশ্বাস ফেলে সে এ-ঘর ছেড়ে চলে গেল অন্য ঘরে নিজের শয়্যায়।



কে বাঁশি বাজায়, বড়ায়, ওই কালিন্দী নদীর কূলে? বুড়িমা, এই গোকুলের গোষ্ঠে কে অমন বাঁশি বাজায়? আজ যে আমার শরীর বড় আকুল, মন যে বড় ব্যাকুল হয়ে পড়ছে। ওই বাঁশির শব্দে আমার রান্না সব এলেমেলো হয়ে গেল। বুড়িমা, কে ওই বাঁশি বাজায় আমি জানি না, তবু কেন ইচ্ছে হচ্ছে ছুটে গিয়ে তার পায়ে আমি মাথা কুটি? সে তো চিন্তের হরিষে বাঁশি বাজাচ্ছে, কিন্তু তার কাছে আমি কোন দোষ করেছি?

বুড়িমা অবাক হয়ে চেয়ে রইলেন রাধার মুখের দিকে। এক সময় বললেন, ও কী, তুই কাঁদছিস কেন মা? এমন মিষ্টি বাঁশির সুর, তা শুনে কেউ কাঁদে?

ও তো আমাকে কষ্ট দেবার জন্যই অমন সুস্বরে বাঁশি বাজাচ্ছে।

ও তো নন্দের নন্দন কানু। ক'দিন ধরেই ওকে দেখছি

এদিকে। অমন বাঁশি শুনলে পিঞ্জরের শুকপাখিও উড়ে  
বেতে পারে!

আমি তো পাখি নই যে উড়ে যাব তার ঠাই। মেদিনী  
বিদীর্ণ হলে আমি তার মধ্যে লুকোতাম।

তোর দুঃখ আমি বুঝেছি মা।

বুড়িমা, যখন বন পোড়ে তখন জগজ্জন তা দেখতে  
পায়। কিন্তু আমার মন পুড়ছে যেন কুমোরের পোয়ান।

বুড়িমা হা-হা করে উঠল, ও কী, তুই জল ছাড়াই  
হাঁড়িতে চাল চাপাচ্ছিস কী? একটু আগে দেখলাম, তুই  
নিমের ঝোলে লেবু টিপে দিলি!

রাধা বলল, আমি আর পারি না! আর পারি না! আর  
পারি না যে!

ক'দিন ধরে রাধা নিজেকে সামলেসুমলে উঠে বসেছিল।  
চুল আঁচড়ে, শাড়ি বদলে সে মন দিয়েছিল সংসারধর্মে।  
কিন্তু আজ আবার সন্ধ্যার পর রান্নাঘরে বসে ওই খ্যাপা  
বাঁশির সুর শুনে তার সবকিছু এলোমেলা হয়ে গেল।  
রান্নায় আর কিছুতেই মনঃসংযোগ করতে পারল না। বাঁশির  
সুর তাকে যেমন উতলা করে, তেমনই হঠাৎ বাঁশি থেমে  
গেলে সে চাতকের মতো অধীর হয়ে পড়ে।

সে বাঁশি বেজেই চলল, বেজেই চলল। ও কি বাড়ি  
যাবে না? ওর ক্ষুধা-তৃষ্ণা নেই? ও কি পাগল হয়েছে  
আজ? রাধা ঘরে থাকতে পারে না, বাইরে আসে। বাইরে  
থাকতে পারে না, ঘরে আসে আবার। ভাত রান্না করতে  
গিয়ে সে নুন ফুরিয়ে ফেলল, ডাল রন্ধে সে ফেন গালতে  
গেল। বুড়িমা তাকে সরিয়ে দিয়ে বলল, তুই সর দেখি, যা



ঘরে গিয়ে শুয়ে থাক। রান্না করতে হবে না তোকে। আমি সব দেখছি।


রাত যখন নিশুভি, সবাই খেয়েদেয়ে ঘুমিয়ে পড়েছে, রাধা তখনও জেগে। তখনও দূরে কোথাও সেই বাঁশি বেজেই চলেছে। এখন সেই বাঁশির সুর আরও তীক্ষ্ণ, আরও করুণ। এক সময় রাধার সব সংযম বন্যার তোড়ে মাটির বাঁধের মতন ভেঙে গেল।

চুপি চুপি শয্যা ছেড়ে উঠে এল রাধা। পায়ের নূপুর আর কাটিভূষণ খুলে ফেলল। পরে নিল একটা নীল রঙের শাড়ি। তারপর গুরুজন, দুর্জনের ভয় কিছুই না মেনে বেরিয়ে পড়ল পথে।

রাধার সঙ্গে শত্রুতা করার জন্যই যেন সে-রাতে মস্ত বড় চাঁদ উঠেছে। চাঁদ যেন আঁধার রূপ মদিরা পান করে আজ বেশি পরিমাণে ম্ফুর্তি প্রবণ। চারদিকে ফটফট করছে নীল জ্যোৎস্না। রাধার শরীর ও বসন যেন মিশে গেল সেই জ্যোৎস্নায়।

চৈত্র মাসের ছোট রাত, কখন ফুরিয়ে যাবে তার ঠিক নেই। রাত্রির এখন কত প্রহর রাধা তা জানে না। তাই রাধা পথ দিয়ে দ্রুত চলতে যায়। কিন্তু চিস্ত এত অস্থির যে পথের দিকে চোখ নেই। বার বার তৃণাকুর ফোটে পায়। বেশি জ্বোরে যেতে গিয়ে মাঝে মাঝে পদস্থলিত হয়ে পড়ে যায়, তখন মনে হয় যেন জ্বালে-বদ্ধ হরিণী। আবার ছুটফটিয়ে উঠে পড়ে। রাধার এখন শরম-ভরম বোধ নেই।

বাঁশির শব্দ অনুসরণ করে করে বনের মধ্যে ছুটে



ছুটেতে রাখা এক সময় দেখতে পেল বংশীবাদককে।  
গাছের ডালপালা কেটে মাটিতে বিছিয়ে কানু একটু শয্যা  
তৈরি করেছে। তার ওপর অজস্র ফুল ছড়ানো।

প্রথম কিছুক্ষণ পরস্পর দৃষ্টিবদ্ধ হয়ে রইল। কেউ  
একটা কথাও বলল না। যেন কত দিন, কত মাস, কত বর্ষ  
পার হয়ে গেল। দুই চোখের মাঝখানে যেন এক সেতু।  
দু'জনে তার দু'ধারে দাঁড়িয়ে আছে। হঠাৎ বাতাস উঠল,  
গাছের শাখা দুলল, সেই শব্দে ওদের ঘোর ভাঙল।  
তারপর দু'জনেই ছুটে এসে যখন আলিঙ্গনাবদ্ধ হল, তখন  
মনে হল, মেঘের ওপর একটি বিদ্যুৎরেখা স্থির হয়ে  
গেছে।

একটু বাদেই আলিঙ্গনমুক্ত হয়ে রাখা ভাবল, কেন  
এলাম? এ যে না-ফেরার পথ!

কানু ভাবল, আমি দিনের পর দিন, রাতের পর রাত যার  
খান করছি, এ কি সে? এ যে তার চেয়েও বেশি। এত রূপ  
তো আমি চক্ষে ধারণ করতে পারিনি! ত্রিবেণী জলসঙ্গমে  
শতযজ্ঞ অনুষ্ঠান করে যে বহু ভাগ্য অর্জন করে, সেই তো  
এমন রমণীকে পাবার অধিকারী। আমি কি একে পাব? এ  
আমার আঙুলের ফাঁক দিয়ে অলীক হয়ে চলে যাবে না  
তো!

রাখা আস্তে আস্তে বলল, হে নির্দয় কানু, কেন আমাকে  
এমন ভাবে পাগল করলে? আমাকে কলঙ্ক সাগরে ডুবিয়ে  
তোমার কী লাভ?

কানু বলল, তুমি ডুববে না, আমরা দু'জনেই আনন্দ  
বারিধিতে ভাসব। কিন্তু তুমি কেন আমায় এত দিন দূরে

সরিয়ে রেখেছ? আমি যে আর পারছিলাম না! দেখো আমার কপাল কত জ্বরতপ্ত?

কানু নিজের মাথাটা ঝাঁকিয়ে দিল, কিন্তু লজ্জাবশত রাধা তা স্পর্শ করল না। কানু তখন হাঁটু গেড়ে বসে, দেবীর সামনে ভক্তের মতন ভঙ্গিতে বলল, সুন্দরী রাধা, তুমি সরোবরময়ী। তোমার দেহের লাবণ্যই তোমার জল, কুস্তলদাম যেন তার শৈবাল, তোমার বদন একটি পদ্ম, তোমার নয়ন দুটি নীলকান্ত মণি, নাসিকা যেন শ্রোতে-ভাসা তিলফুল; তোমার দুই গালে মহুয়া ফুলের আভা। তোমার হাসিতে লোধরেণু...রাধা, তুমি তো এখনও একবারও হাসোনি।

রূপবর্ণনায় ও স্তুতিতে রাধার মুখ অরুণবর্ণ। সে ঈষৎ পাশ ফিরে প্রস্তরমূর্তির মতন স্থির।

কানু বলল, পায়ের কাছে একটি কীট এলেও মানুষ তার দিকে দেখে। আমি কি কীটের চেয়েও অধম? বলো, বলো, বলো—

রাধা অস্পষ্ট গলায় বলল, এই ভয়াল রাস্তিরে গৃহশাসন অগ্রাহ্য করে আমি ছুটে এসেছি, কানু, সে কি কোনও কীটাণুকীটের জন্য? কানু, তুমি আমার ইহকাল কেড়ে নিয়েছ!

কানুর মুখ উল্লাসে উদ্ভাসিত হয়ে গেল। অত্যন্ত বেশি আনন্দ যেন কষ্টের রূপ ধরল, সে মাথা ঝাঁকিয়ে আঃ আঃ আঃ শব্দ করতে লাগল। তারপর বলল, তুমি যখন কিষ্কিন্দ্রমাত্রও কথা বলো, তখন তোমার দস্তরুটি ঠিক কৌমুদীর মতন বিকশিত হয়। যেন একটা আলো ফোটে,

এক নিমেষে অতিশয় আঁধারও দূর হয়ে যায়! প্রতীক্ষায় প্রতীক্ষায় অধৈর্য হয়ে আমার শরীর যেন জ্বরে পুড়ে যাচ্ছিল, এমন সময় তুমি এলে স্নিগ্ধ সরোবরের মতন। তোমার বাহুই যেন মৃগাল, করতল রক্তপদ্ম। তোমার স্তনদ্বয় কনক-কলস, নাভিতে ঈষৎ প্রস্ফুটিত শালুক। তোমার ত্রিবলী যেন ঘাটের স্বর্ণ-সোপান, শোভিত জঘনে স্বর্ণপাট—

রাধার মনে হল, কেন একটু চুলটা বেঁধে আসেনি, কেন নয়নে কাজল দেয়নি একটু, কেন কুক্কুম-চন্দনে একটু শরীর-প্রসাধন করেনি! পরক্ষণেই এ-চিন্তার জন্য লজ্জা জাগল তার মনে। কিন্তু তার অঙ্গ থরথর করে কাঁপছে। তাঁর কুচ-যুগের ওপর সূক্ষ্ম বসনও যেন গুরুভার বোধ হচ্ছে। তার শরীর যেন তার নিজের বশে নেই আর। তার এত দিনের নারীজীবনে এমনটি দশা আর হয়নি কখনও।

কানু এবার রাধার হাত ধরে পাতার শয্যার ওপর বসাল। রাধা লজ্জায় মুখ ফিরিয়ে রইল অন্য দিকে। কিন্তু মন মানে না। চোখ চকিতে ফিরে ফিরে আসে কানুর দিকে। তার শরীর যেন অয়স্কাপ্তমণি দিয়ে গড়া। গলায় বাঁধুলি ফুলের মালা। তার ত্বক যেন কালো রঙের দর্পণ। তার দেহের গড়ন সুঠাম-বলিষ্ঠ, একটুও রুক্ষতা নেই। সবচেয়ে বেশি পাগল করে তার মুখ। ভ্রমর-কৃষ্ণ চোখ দুটি সদা চঞ্চল।

কানু জিজ্ঞেস করল, কেন তোমায় আর যমুনার ঘাটে দেখি না? কেন তুমি আর কদমতলায় স্নান করতেও আসো

না? আমি কি এতই বিষ যে আমাকে তোমার চোখে দেখতেও ইচ্ছে করে না?

রাধা উত্তর না দিয়ে চূপ করে রইল। কিন্তু একটু পরেই তার অনুতাপ হল। কানুর এত ব্যগ্রতাকে সে কী করে প্রতিহত করতে পারে?

সে মুখ ফিরিয়ে উত্তর দিল, যদি বলি করে না, তবে সেটা হবে অতি বড় মিথ্যা। সেই মিথ্যেটাই তো আমি আমার মনকে বোঝাতে চাই। কিন্তু মানুষের মনই একমাত্র জায়গা, যেখানে মিথ্যের কোনও স্থান নেই।

অনেক দিন তুমি বাড়ি থেকে বেরোওনি। মাত্র তিনদিন আগে একবার তুমি সখীদের সঙ্গে বেরিয়ে ছিলে, সে-দিনও তুমি আমাকে দেখতে পাওনি। কিন্তু তার আগেই নৌকো বিহারে আমরা পরস্পরকে জেনেছি। তবু তুমি আমাকে ভিনগাঁয়ীর মতন অবহেলা করলে?

দেখেছিলাম তো সেদিন।

আমার সঙ্গে কথা বলোনি।

কানু, তুমি কি লোকসমাজে আমার কলঙ্ক প্রকট করতে চাও?

সেদিন তুমি দেখেছিলে, তোমার অবহেলায় অস্থির হয়ে আমি থাকতে পারিনি। আমি একটা পদ্মকোরকে চুম্বন রেখেছিলাম!

তাও দেখেছি।

তাতেও আমি নিবৃত্ত হইনি। আমি একটি অবনত দাড়িষ লতিকার সুবর্জুল ফলে হাত বুলিয়ে ছিলাম। তাতেও

হয়নি! আমি তখন অশোকপল্লবে দংশন করেছিলাম,  
দেখেছিলে?

সেই দেখে আমি এত অস্থির হয়ে পড়েছিলাম যে মনে  
হয়েছিল সখীদের সমক্ষেই মূর্ছিতা হয়ে পড়ব! কানু,  
আমার শরীর কাঁপছিল, সারা গায়ে শ্বেদ বইছিল, তুমি  
অনেক দূরে ছিলে, তবু আমি লোকসমক্ষে কলঙ্কিনী  
হয়েছিলাম! তাই আর এক দণ্ডও সেখানে থাকিনি। চলে  
এসেছিলাম বাড়িতে। সেই দিনই আবার ঠিক করেছিলাম,  
আর আমি বাড়ির বাইরে যাব না। পিঞ্জরেই আমার  
স্থান।

আজ তুমি এসেছ।

এসেছি?

রাধা, তুমি আমার কাছে এসেছ, আজ তুমি স্বয়মগতা।

আমার চোখে ঘোর লাগছে। কানু, আমার এ কী হল?  
আমি নিজেই জানি না, আমি কখন এলাম, কী করে এলাম।  
এ স্বপ্ন নয় তো!

না, স্বপ্ন নয়। এই যে অনুভব করে দেখো আমার হাত।

হ্যাঁ কানু, এ তোমার হাত।

দাও, রাধা, সেই পদ্মাকোরক, সেই দাড়িঘের সুবর্তুল  
ফল, আর অশোকপল্লব।

তুমি বলের মতো খুঁজে দেখো, ওই সবই আবার  
পাবে।

এও হাতে-এ কাছে সব থাকতে আমি খুঁজতে যাব  
কেনা।

রাধা ওগুন কানুর হাত ছাড়িয়ে উঠে দৌড় লাগাল।

কানু তিন লক্ষ্যে গিয়ে তাকে ধরল। কিন্তু বলপ্রয়োগ করল না, কাতর ভাবে বলল, তুমি যদি দয়া না করো, তা হলে আমি তোমার পায়ে মাথা দিয়ে শুয়ে থাকব—

রাধা সসংকোচে নিজের পা ঢেকে বলল, না, না, না—

কানু বলল, বুঝেছি, তোমার ও শারদ শশীর তুল্য মুখ তুমি আমাকে ছুঁতে দেবে না। তবে থাক, তোমার পায়ের নখে যে কতগুলো চাঁদ পড়ে আছে, সেগুলিতেই আমি ওষ্ঠ স্পর্শ করব—

রাধা বলল, না, কানু, আমার পায়ের নখে লেগে আছে পথের ধুলো আর কাদা!

ধুলো আর কাদাই যার প্রাপ্য, সে আর বেশি কী পাবে?

না, কানু, তোমার জন্যই তো আমার সব!

কী বললে?

আমি এতকাল ছিলাম যেন একটা পাথরের মূর্তি, তুমি এসে ছুঁয়ে দিলে বলেই তো আমি প্রাণ পেলাম। অথচ সেই আমিই কী মুঢ়া দেখো, তোমার কাছে আসতেও আমার লজ্জা? কানু, তুমিই তো আমার সব।

রাধা, তুমিই আমার জীবন, তুমিই আমার ভূষণ। এই ভবজলধিতে তুমিই আমার একমাত্র রত্ন। তুমি সযত্নে আমার হৃদয়ে থাকো।

রাধা নিজেই এবার অত্যন্ত ব্রীড়ার সঙ্গে বসে পড়ে কানুর দুই করতলের মধ্যে তার ঈষৎ শ্বেদযুক্ত কম্পিত মুখখানি বন্দি হতে দিল।

সেই মুখে ওষ্ঠ ছুঁইয়ে কানু বলল, আঃ! রাধার বুকের সূক্ষ্ম বসন সরিয়ে কানু সেখানে মাথা রেখে আবার বলল,



আঃ! সেই স্বরে গভীর তৃপ্তি। যেন বহু কাল পরে ঘর-ছাড়া এক বালক গৃহে ফিরেছে!

...তারপর তরল তিমির যেন প্রচ্ছন্ন করে দিল চন্দ্র ও সূর্য। মেঘের মধ্যে হারিয়ে গেল তড়িৎলতা। চতুর্দিকে ছেট্কাতে লাগল ফুল, যেন আকাশ থেকে ঝরছে তারা। অস্বরও খসে পড়ল। পাহাড়চূড়া বিমর্দিত হল, মেদিনী দুলতে লাগল। সমীরণ উষ্ণ ও খর বেগে বইতে লাগল, পাখির চিৎকারের মতন কিছু শোনা গেল, এবং শেষে প্রলয় পয়োধি জলে সব ডুবে গেল।...

রাধার যখন ঘুম ভাঙল, তখন ভোরের আলো ফুটে উঠেছে। ঝটিতি উঠে বসেই ভাবল, আমি কোথায়? চোখ রগড়ে ভালো করে দেখল, সে এক নিবিড় বন, গাছে গাছে পাখির কাকলি, পাতায় ফাঁকে ফাঁকে হিরের কুটির মতন রোদের ঝিকিমিকি। পাশে ঘুমিয়ে আছে কানু, পরিশ্রান্ত তবু প্রশান্ত তার মুখ।

রাধা ভেবেছিল, সে বুঝি শুয়ে আছে অমরাবতীতে। এক চঞ্চল মেঘ তাকে নিয়ে গিয়েছিল সেখানে। কিন্তু এ যে চেনা অরণ্য। অদূরেই তাদের বাড়ি। দিনের আলোর মধ্যে সেখানে ফিরবে কী করে?

তবু তো ফিরতেই হবে। রাধা ধড়মড় করে উঠে দাঁড়াল। কানুকে একবার ডাকবে ভেবেও জাগাল না। ও ঘুমোক, ওর স্বপ্ন ভাঙিয়ে লাভ কী?

রাধা প্রায় ছুটেই চলল। বন ছাড়িয়ে সে যখন পল্লিতে এসে পড়ল, তখন সেখানে অনেকেই উঠে পড়েছে। কেউ উঠোনে জল-ছড়া দিচ্ছে। কেউ চ্যা-চ্যা শব্দে দুখ

দুইতে বসেছে গোয়ালঘরে। কেউ নিমগাছের ডাল ভাঙছে।

রাধা জানে না, তার মুখ কানুর চোখের কাজলে মাখামাখি। নিপীড়িত ফুলের রস ছোপ ছোপ হয়ে লেগে আছে তার গায়। তার বসন দোমড়ানো। অনেকেই অবাক হয়ে তাকে দেখছে আর ভাবছে, ওই যে আয়ান ঘোষের ঘরনী সুন্দরী রাধা ছুটে চলেছে। কিন্তু এই সাতসকালে সে কোথায়ই বা গিয়েছিল, কোথা থেকেই বা ফিরছে?

বাড়ির দোরগোড়ায় রাধা ধরা পড়ে গেল ননদিনীর কাছে। ননদিনীর চোখ বড় খরশান। সে রাধাকে দেখে প্রায় আঁতকে উঠে বলল, ওমা, কোথায় মরতে গিয়েছিলি!

রাধা বলল, মরতেই গিয়েছিলাম, তবু এমন কপাল, আবার বেঁচেই ফিরে আসতে হল।

দিনের পর রাত আসে, আবার দিন। এই ভাবে সময় যায়। কিন্তু রাধার কাছে দিনরাত্রি এখন সব সমান হয়ে গেছে। কখন কানুর সঙ্গে দেখা হবে, সেটাই একমাত্র চিন্তা। দেখা হয়, দুপুরে, বিকেলে বা মধ্যরাত্রে, তার কোনও ঠিক নেই। রাধা এখন আবার নিয়মিত স্নানের ঘাটে কিংবা হাটের পথে যায়। যদি দূর থেকে কানুকে এক পলকের জন্যও দেখতে পায়। কানুর পীত রঙের বসনের সামান্য আভাসও চোখে পড়ে, অমনি তার শরীর কম্পিত হয়, দৃষ্টি হয়ে যায় স্থির, কপালে দেখা দেয় পুলক-স্বেদ। শুধু দেখাতেই যখন এত আনন্দ, তখন নিভৃত্তে নিবিড় করে পাওয়ার আনন্দ যেন সহ্যেরও অতীত। যেন মৃত্যুর মতন।

এই আনন্দ যে পায়নি, সে জানল না একই জীবনে বার বার মৃত্যুর স্বাদ কী রকম। তার চেয়ে বড় আনন্দ বার বার করে বেঁচে ওঠায়।

যখন কানুর দেখা পায় না, যখন তার বাঁশির সুরও শোনা যায় না, তখন রাধার মনে হয় পৃথিবীতে শুধু আধারও যেন কঠিন পদার্থ, তার একটা শক্ত দেওয়াল উঠেছে চারদিকে। রাধা সেই দেওয়াল ভেঙে বেরিয়ে যায়। এমনকী সে ছুটে যায় গোষ্ঠে, অন্য রাখালদের দিকে চেয়ে থাকে, চোখের পলক পড়ে না, তখন তার সমস্ত শরীরটাই জিঞ্জাসু।

সখীরা বলে, রাই, তুই কি শেষে পাগলিনী হবি?

যেন পাগলিনী হতে তার বাকি আছে? কখনও সে তমাল গাছকে কানু বলে ভুল করে। কখনও স্নান করতে নেমে যমুনার নীল জলকে এমন ভাবে আদর করে কিংবা সেই জলে মুখ রেখে সে এমন মধুরসবাক্য বলে যেন সে কানুর সঙ্গেই আছে!

এদিকে কানুরও সেই একই অবস্থা। এ এমনই এক তৃষ্ণা, যা প্রতি দিনই বাড়ে এবং বেড়েই চলে। এবং যতই বাড়ুক এর আকৃতি কখনও বিরাট বা বেটপ হয় না। এই তৃষ্ণার কোনও ক্ষয়কারী শক্তি নেই, তাই মনপ্রাণ এমন মাতিয়ে রাখে। এক বেলা দেখা না হলেই বেঁচে থাকার আর যা-কিছু সরঞ্জাম, সব তুচ্ছ হয়ে যায়। রাধা যখন কানুকে দেখতে পায় না তখন আসলে কানু দিগভ্রান্ত হয়ে থানা কোথাও রাধাকে খুঁজে বেড়াচ্ছে।

সখীরা বলে, কানু, তুই শুধু এক জনের জন্য আমাদের

সবাইকে ছাড়লি। কিন্তু আমরা তোকে ছাড়ব না।

এখন রাধার সখীরা এবং কানুর সখারাই ওদের দু'জনের জন্য দৃতিয়ালি করে। নিজেরাই তৈরি করেছে নানা রকম সংকেত। খবর পৌঁছোতে আর দেরি হয় না।

সে রকম কোনও কোনও রাতে ওদের দেখা হয় অরণ্যের মধ্যে সেই নিভৃত কুঞ্জে। রাধা সেদিন চুলে ধূপের গন্ধ দিয়ে সুন্দর করে খোঁপা বাঁধে। যদিও জানে, একটু পরেই সব চুল আলুলায়িত হয়ে যাবে। প্রথমে একটা গাঢ় নীল রঙের শাড়ি পরে, তার ওপর একটা অতি সুস্বন্দর লাল রঙের রেশমি বস্ত্র জড়িয়ে নেয়—যাতে লালের মধ্য থেকে নীলের আভা ফুটে বেরোয়। সখীরাই এই ভাবে সাজিয়ে দেয় তাকে। বনপথে ছুটে যেতে যেতে সেই বস্ত্র যে একটু পরেই ছিঁড়ে যাবে সখীরা তা জানে না! কোনও সখী তাকে শিখিয়ে দেয়, শোন রাই, আগেই গিয়ে কানুর কাছে আত্মসমর্পণ করবি নে! মেয়েদের একটু গুমর থাকা ভালো। আগে মুখ ফিরিয়ে বসে থাকবি, কানুকে দিয়ে পায়ে ধরে সাধাবি! বক্রবাক্য বলে তাকে চটিয়ে দিবি, বুঝলি? রাধা শান্ত মেয়ের মতন মাথা নেড়ে বলে, আচ্ছা!

কিন্তু যখন সে কানুর কাছে ছুটে যায়, তখন আর এসব কিছুই মনে থাকে না। কানুর বুকে ঝাঁপিয়ে পড়ে বলে, তুমি আমায় নাও। তুমিই আমার জীবনসর্বস্ব! অন্য মানুষের কত কী থাকে, কিন্তু আমার তো তুমি ছাড়া আর কিছু নেই!

কানু বলে, রাধা, আমি তোমার কাছ থেকে সব নিই,

নিজে ধনী হব বলে! আমি তো নিঃস্ব, তোমার কাছ থেকে না নিলে আমি ধনী হব কী করে? আর ধনী না হলে তোমায় কী দেব? আমি যে তোমাকেই সব দিতে চাই!

এক সময় রাধা আর কানুর যেন একই শরীর হয়ে যায়। একই রকম ব্যথা-বেদনা-আনন্দ। রাধার স্তনে কানুর দাঁত ও নখরে যখন একটা রক্তের ফুল ফুটে ওঠে, রাধা নিজেই তার সৌন্দর্যে মোহাভিভূত হয়ে যায়। কখন রাত কেটে যায় কেউ টের পায় না।

রাধার বাড়িতে এখন ননদিনীর কঠিন প্রহরা। রাধা সম্পর্কে নানা রকম কানাঘুসা সে শুনেছে, নিজেরও সন্দেহ এখন পাকা—সব সময় তাকে তাকে থাকে হাতেনাতে ধরে ফেলার জন্য। কিন্তু বুড়িমা আড়াল করে রাখে রাধাকে। রাধার সখীরা এবং রাখালরা মিলেও ননদিনীর চক্ষে ধুলো দেয় বার বার।

এক মাঝরাতে ননদিনীর ঘুম ভেঙে গেল। কী যেন শোনার চেষ্টা করল কান পেতে। কোনও শব্দ নেই, এমনকী শিঁশির ডাক বা মর্মরধ্বনি পর্যন্ত স্তব্ধ। এই স্তব্ধতাটাই যেন সন্দেহজনক। সন্ধ্যাবেলা থেকে অনেক রাত পর্যন্ত দূরে কোথায় যেন বাঁশি বাজছিল একটানা। এখন সেই বাঁশিও থেমে গেছে কেন?

সন্ধ্যায় কান পেতে সে চলে এল রাধার ঘরে। শূন্য শয়ান। ঘর ঘনান শব্দ তরে পড়েছে তাঁদের আলো, দেখে মানুষ বলে মনে হয়। ননদিনী হাত দিয়ে সেই শূন্যতা স্পর্শ করে দেখল। বাঁশির গায়ের অলাংকারগুলি কেন খুলে বাঁশি আছে নিছকায়? সে 'দাদা' 'দাদা' বলে চেঁচিয়ে

আয়ানের ঘরের দোরে ধাক্কা মারল। নিশ্চিন্ত নিদ্রায় নিমগ্ন ছিল আয়ান। কোনও দিন এই ভাবে কেউ ডেকে তার ঘুমের ব্যাঘাত করেনি। আয়ান দরজা খুলে বাইরে আসবার পর তার বোন বলল, তোমায় বলেছিলাম না? আজ মিলিয়ে দেখো।

এর আগেই ক'দিন ধরে ননদিনী তার দাদার কাছে রাধা সম্পর্কে লাগানিভাঙানি দিতে গিয়েছিল। আয়ান বিশেষ কান দেয়নি। আজ এত রাত্রে বোনের এতখানি গরজ দেখে সে আর উড়িয়ে দিতে পারল না। প্রথমে সারা বাড়ি তন্ন তন্ন করে খুঁজে দেখল। রাধা সত্যিই কোথাও নেই।


তখন আয়ান জিজ্ঞেস করল, সে কোথায় গেছে, তুই জানিস?

ননদিনী বলল, শুনেছি ওরা বনের মধ্যে একটা রমণকুঞ্জ বানিয়েছে! লোকে বলে, আমি তাতে বিশ্বাস করিনি।—

কোথায়? চল।

পদপাতে ভূমি কাঁপিয়ে আয়ান চলল বনের দিকে। তার এক হাতে খড়্গ। অব্যাহত জ্যোৎস্নায় আয়ানের দীর্ঘ শরীরের দীর্ঘতর ছায়া পড়েছে পথে। তার ছোট বোন দৌড়ে দৌড়ে এসেও তার সঙ্গে তাল রাখতে পারছে না।

খানিকটা গিয়ে আয়ান থমকে দাঁড়াল, কুঁচকে গেল ভুরু। যদি সত্যিই দেখা হয়ে যায়? যদি সত্যিই চোখের সামনে প্রমাণিত হয়ে যায় যে রাধা কলঙ্কিনী? না, না, থাক। লোকের মুখে শোনা এক কথা আর নিজের



না, না চল—

আরও একটু দূর যাবার পর আয়ানের বোন আঙুল তুলে দেখাল, ওই যে পর পর কয়েকটা কদম্ব গাছ, ডালপালা দিয়ে বেঁধে মাঝখানটা ঘিরে রাখা হয়েছে, ঠিক যেন একটা ঘর দেখছ, আমি তবে ঠিকই শুনে ছিলাম—একটু একটু শব্দও শোনা যাচ্ছে—

আয়ান কঠোর ভাবে বলল, তুই এখানে দাঁড়া, তোকে আর একটুও যেতে হবে না!

আয়ান মন্থর পায়ে হেঁটে গেল সেই ঝোপের দিকে। বার বার মনে মনে আওড়াতে লাগল, সব যেন মিথ্যে হয়!

ঝোপের কাছে এসে পাতার ফাঁক দিয়ে দেখবার চেষ্টা করল। বেশি চেষ্টা করতে হল না, অচিরেই দেখা গেল।

একটি কদম গাছে হেলান দিয়ে দাঁড়িয়ে আছে এক জন মানুষ। নবীন মেঘের মতন গায়ের রং। একটি পীতরঙের উত্তরীয় জড়ানো। মাথায় চুল চূড়া করে বাঁধা। তার মুখখানা ভালো দেখা যায় না, তার একটি হাত সামনে বাড়ানো। সেই হাতখানাই যেন বিশ্বের সেরা শিল্পীর গড়া। যেমন কোমল তেমনি দৃঢ়। সেই পুরুষের পায়ের কাছে বসে আছে রাধা।

রাধার মাথার চুল খোলা, আঁচল বিস্রম্ব, পুরুষের পা জড়িয়ে ধরে আছে সে ব্যাকুল মিনতির ভঙ্গিতে, মুখখানা ওপরের দিকে তোলা, কুরঙ্গিনীর মতন চোখ দু'টি সেই পুরুষের মুখে স্থির।



আয়ানের প্রথমেই মনে হল, এরকম অপরূপ দৃশ্য সে জীবনে দেখেনি। সে তো সারা জীবনটা শুধু বিষয়কর্ম বা পুজোআচ্চা করেই কাটাল। সে তো জানতেই পারেনি, মানুষ কখনও মানুষের দিকেও অমন করে চায়! এই রাধা তার এতদিনের চেনা, কিন্তু এখন যেন একেবারে অচেনা হয়ে গেছে।

মনে হয় ওদের দু'জনের যেন বাহ্যজ্ঞান নেই। আয়ান বা অন্য কেউ যে এসেছে কাছাকাছি, সে-দিকে কোনও হুঁশই নেই—শুধু সেই বিভোর দৃষ্টিতে পরস্পরের দিকে চেয়ে দেখা। আয়ান অপেক্ষা করল, ওদের মুখ থেকে কথা শোনবার জন্য। আশ্চর্য, মুহূর্ত পল কেটে যায়, ওরা একটাও কথা বলে না। একটু নড়ে না পর্যন্ত!

আয়ানের গা ছমছম করে উঠল। সম্পূর্ণ ব্যাপারটাই অলৌকিক নয় তো? এই নিঝুম মধ্য রাত, জ্যোৎস্নাময় অরণ্য, তার মধ্যে নিখর নির্বাক দুই মূর্তি। প্রাণবন্ত যে তাতে কোনও সন্দেহ নেই; আয়ান ওদের ত্বকের চিক্ণতা পর্যন্ত দেখতে পাচ্ছে, কিন্তু এমন স্পন্দনহীন, শব্দহীন হয়ে স্থির হয়ে আছে কেন? পুরুষটি কি তার হাত বাড়িয়ে অভয় দিচ্ছে রাধাকে? কিন্তু রাধার চোখে তো ভয়ের চিহ্নমাত্র নেই। রয়েছে আকৃতি। সব মিলিয়ে যেন এক পবিত্র সৌন্দর্য।

আয়ানের খড়্গসমেত হাত ওপরে উঠল না। রাধাকে সে ডাকতেও পারল না। পায়ে পায়ে পিছিয়ে এল। খানিকটা পরে সে উলটে দিকে ফিরে গতিবেগ বাড়াল।

তার বোন তাকে প্রায় ঘোরগ্রস্ত অবস্থায় ছুটতে দেখে

ভয় পেয়ে জিজ্ঞেস করল, কী হল? কী দেখলে দাদা?

আয়ান বলল, কিছুই দেখিনি! চল।

যত জ্বরে এসেছিল, তার চেয়েও বেশি গতিবেগে আয়ান ফিরে গেল বাড়িতে। সোজা গিয়ে ঢুকল তার পুজোর ঘরে। কালীমূর্তির সামনে জোড়াসনে বসল চোখ বুজে। তবু তার বন্ধ চোখ দিয়েও টপ টপ করে গড়িয়ে পড়তে লাগল জল। সারা রাত ধরে।



গোধূলির সময় রাখালরা বাড়ি ফিরছে, কোথা থেকে কানু এসে হাজির। সারা দিন তার পাত্তা ছিল না। সে কখন আসে, কখন চলে যায়, তার ঠিক নেই। বলরামই আজকাল বেশির ভাগ যশোমতীর ধেনুগুলির দেখাশুনো করে। নির্বিरोধ বলরাম কানুর কোনও ব্যবহারেই আপত্তি করে না!

রাখালরা সবাই অবাক।

সুবল বলল, তোর কি দিনরাতের জ্ঞানগম্যিও চলে গেছে রে, কানু? দেখছিস না দিনুমণি অস্তাচলে যাচ্ছেন? তুই বুঝি ভেবেছিস, এখন প্রভাত হল?

কানু অদ্ভুত ধরনের হেসে বলল, তাই তো, এখন প্রভাত নয় বুঝি? তা হোক না সন্ধ্যা, এখন আবার গোষ্ঠে যেতে ক্ষতি কী?

কী করবি গোষ্ঠে গিয়ে?

কেন, খেলব?

অংশুমান বলল, সারা দিন ওঁর জন্য হাপিত্যেশ করে বসে থাকি—তখন দেখা নেই, এখন উনি এলেন খেলতে। তোর যদি এত শখ থাকে, তা হলে একা খেল গে যা!

সুদাম বলল, আজ বুঝি শ্রীরাধিকে আসেননি, তাই বাছার আমার খেলার কথা মনে পড়ল!

কানু বলল, সে আজ আসেনি, কাল আসেনি, অনন্ত কাল আসেনি!

তাই তো, বড় ভাবনার কথা! আমাদের বলিসনি কেন, বৃন্দের কাছে সন্দেশ পাঠাতুম!

কানু হঠাৎ কারু নামের বিরাট চেহারার বৃষটির ল্যাজ মুচড়ে দিল। সেটা চমকে গিয়ে, খুরের ধাক্কায় মাটি ছিটকিয়ে লাফিয়ে উঠল। তার ভয়াল শিংসূদ্ধ মাথাটা ঘুরে গেল এদিকে-ওদিকে। তা দেখে অন্য গাভীরাও ভয় পেয়ে ছটফট করে উঠল।

সব রাখালরা হা-হা করে উঠল। আরে কানু, করিস কী। করিস কী?

কিন্তু কানু মজা পেয়ে গেছে। সে দৌড়ে দৌড়ে অন্য ধেনুদেরও ল্যাজ মুচড়ে দিয়ে চ্যাঁচাতে লাগল, ইঃ-রে-রে-রে-রে!

ধেনুদেরও মধ্যে একটা হলস্থূল পড়ে গেল। কোনওটা এদিক-ওদিক ছুটে যায়, কোনওটা একে-তাকে টুঁস মারতে আসে। কানু সেগুলিকে আরও খেপিয়ে দেয়, কোনওটার শিং ধরে দৌড় করায়, কোনওটার কর্ণ মর্দন করে।

রাখালরা প্রথমে দিশেহারা, পরে একেবারে ব্যতিব্যস্ত হয়ে পড়ে। কানু আগে কোনও দিন এমন কাণ্ড করেনি!

ধেনুগুলিকে সে প্রাণের চেয়েও বেশি ভালোবাসত। আজ এমন নির্দয় ভাবে ওদের কষ্ট দিচ্ছে কেন? অবলা প্রাণীগুলি পর্যন্ত যেন বিমূঢ় হয়ে গেছে। ছেলেটা কি সত্যি পাগল হয়ে গেল শেষ পর্যন্ত!

রাখালরা সে-সব ধেনুগুলি সামলাল অতি কষ্টে। অভিমানরুট গলায় তারা বলল, দেখো ভাই কানু, শ্রীরাধিকা আসেনি, সে কি আমাদের দোষ? তবে আমাদের এই বিড়ম্বনা কেন?

কানু বলল, সে আজ আসেনি, কাল আসেনি, অনন্তকাল আসেনি!

সেজন্য আজ আমরা আর কী করব? কাল বরং সন্ধান নেওয়া যাবে!

কানু বলল, আজ আমরা খেলা করি আয়!

আমাদের এখন খেলায় মন নেই ভাই। সারা দিন রোদে কাটিয়েছি, এখন আমাদের ক্ষুধা-তৃষ্ণায় শরীর জ্বলছে!

রাখালরা সত্যিই বাড়ির উদ্দেশে হাঁটা দিচ্ছে দেখে কানু বলল, আয়, তোদের মধ্যে কেউ আমার সঙ্গে মল্লযুদ্ধ করবি?

কানুর সঙ্গে মল্লযুদ্ধে নামার ইচ্ছে কারওরই নেই। কেই-বা এই সন্ধ্যাবেলা হাত-পা ভাঙতে চায়! কানুর যেমন অদ্ভুত শখ।

কেউ কোনও উত্তর না দিয়ে হাঁটতেই লাগল।

কানু আহত ভাবে বলল, কী রে, তোরা খেলবিও না, লড়বিও না?

রাখালরা তখন প্রায় পল্লির কাছাকাছি এসে পড়েছে।

কানু তেড়ে ছুটে গেল তাদের দিকে। এক এক জনকে ঠেলে ফেলে দিতে লাগল মাটিতে, কারওর উড়নি, কারওর পাচনবাড়ি কেড়ে নিল। কানু আজ দারুণ অস্থির।

মাটিতে কয়েক পাক গড়াগড়ি দিয়ে রাখাল ছেলেরা আবার উঠে দাঁড়াল। এখনও তারা ক্রুদ্ধ হয়নি, তবু দুঃখিত অভিযোগে বলতে লাগল, কানু, কেন আমাদের জ্বালাতন করছিস? আমরা তোঁর কাছে কী দোষ করেছি?

কানু বলল, কেন তোঁরা খেলবি না? কেন তোঁরা লড়বি না?

তবু কেউ লড়তে রাজি নয়। তবু কানু তাদের টানাটানি করতে ছাড়ল না। এক এক জনকে তুলে তুলে ধরাশায়ী করতে লাগল। শুধু বলরামকে ছাড়া। বলরাম এসব দেখেশুনেও একটিও কথা বলেনি। শুধু এক পাশে দাঁড়িয়ে মিটিমিটি হাসছে।

কয়েক জন অকারণ মার খাওয়ার বদলে কানুর সঙ্গে লড়তে গেল। এবং অচিরেই কয়েক আছাড় খেয়ে উঃ আঃ করতে লাগল বসে বসে। কানু হা হা করে হাসতে হাসতে বলল, তোঁরা কেন আমার সঙ্গে ভালো করে লড়তে আসিসনি?

কানুর ঘামে-ভেজা মুখখানা জ্বলজ্বল করছে। মুখে অন্য রকম একটা দ্যুতি। চোখ দুটো অন্য দিনের চেয়েও বেশি উজ্জ্বল। সে আজ দুর্দান্ত চঞ্চল।

সমস্ত রাখালরা যখন কাবু হয়ে কোঁকাম্ছে, তখন কানু কোমরে গোঁজা আড়বাঁশিটা বার করল। তাঁর চাঞ্চল্য

একটুও কমেনি। সে বাঁশিতে এক দারুণ ফুঁ দিল।

এমন সুর কানু নিজেও আগে কখনও তোলেনি। এ যেন এক পাগলের বুকফাটা আর্তনাদ। তবু তার মধ্যে এক অদ্ভুত ছন্দ আছে। বিস্মিত বিহ্বল রাখালদের মাঝখানে নেচে নেচে কানু বাজাতে লাগল সেই প্রাণ-মাতোয়ারা বাঁশি।

যে-হেতু লোকালয় খুব কাছেই, তাই সেই তীব্র বাঁশির নাদ শুনে একে একে খুলে যেতে লাগল বিভিন্ন গৃহের ঝরোক্য। অনেকেই বেরিয়ে এল বাইরে। প্রথমে তারা দূর থেকে বাঁশি শুনল। তারপর আস্তে আস্তে কাছে এগিয়ে এল। আরও কাছে। বিস্ময়িত চোখে দেখতে লাগল কনুকে। একে যেন তারা কেউ চেনে না। এমন বাঁশির সুরও তারা কখনও শোনেনি। সে বাঁশি শুনে চূপ করে দাঁড়িয়ে থাকা যায় না। শরীর দোলে সাপের ফণার মতন। এক সময় তারা সকলেই মন্ত্রমুগ্ধবৎ সেই বাঁশির সুরে গা-ভাসিয়ে নাচতে শুরু করল। তখন দেখা গেল, তারা সকলেই নারী।

এক সময় কানু ঈষৎ অহংকারের সঙ্গে জনান্তিকে সুবলকে জিজ্ঞেস করল, আমার বাঁশি শুনে শুধু নারীরাই আসে কেন? পুরুষরা কোথায়?

সুবল শ্লেষের সঙ্গে বলল, কেন ভাই, নারীদের প্রতিই তো তোমার আসক্তি, পুরুষের খোঁজে কী প্রয়োজন? তারা এলে তো তোমার ব্যাঘাতই হত!

কানু বলল, সে-কথা নয়। তারা আসেনি কেন?

রাজা কংসের ভ্ৰুকুমে সমস্ত পরিবার-প্রধানরা আজ

মথুরায় গেছে। তুই তো আজকাল প্রজাতি বা প্রদেশের কোনও খোঁজই রাখিস না। তাই জানিস না, রাজা কংসের অত্যাচার আজকাল আবার কত বেড়েছে। কত রকম অনুজ্ঞা আর অনুশাসন।

কানু বেশি খেয়াল করল না সুবলের কথা। এখন অনুযোগ শোনার দিকে তার মন নেই। সে হাঁটতে শুরু করল বনের দিকে। এক সময় বনের মধ্যে পৌঁছে ও দেখল, সমস্ত গোপিনীরা তাকে অনুসরণ করে এসেছে। ক্রমশ তাদের দল বাড়ছে। কানুর বাঁশির সুরে তাদের অঙ্গ দোলা লেগেছে। সুখে আবিষ্ট হয়ে নাচছে তারা বনের মধ্যে। সকলেই মধুর স্বরে বার বার বলছে, কানহাইয়া, আমার কাছে এসো। ওগো মুরলীমোহন, তুমি একবার সামনে এসে এই অধীনাকে ধন্য করো।

কানু আবার ফিসফিসিয়ে সুবলকে জিজ্ঞেস করল, এত গোপিনীই যখন এসেছে, তখনও, তবুও, রাধা এল না কেন?

সুবল বলল, কী জানি ভাই! সে তত্ত্ব তো তোমারই ভালো জানবার কথা!

আমি জানি না, সে কেন এল না!

হয়তো এত গোপিনী এসেছে বলেই সে আসেনি!

কেন? এরা এসেছে বলে সে আসবে না কেন? এরা আর সে কি এক? সে-ই তো আমার একমাত্র পুরস্কার। সে কেন এল না? বল সুবল, তুই শিগগির উত্তর দে, রাধা কেন এল না?

এ তো দেখছি মহা জ্বালাতন! এত সব কথা আমি জানব



কী করে? আজ লক্ষ্মীপূজোর দিন, হয়তো ওদের বাড়িতে কোনও ব্রত-পার্বণ আছে—তা ছাড়া জানিস তো ওর ননদিনী কত কুটিলা!

কানুর আর কিছুই ভালো লাগল না। সে আরও জোরের সঙ্গে বাঁশিতে ফুঁ দিয়ে সকলকে খেপিয়ে দিতে চাইল। নাচের নেশায় সকলেই যখন প্রায় উন্মাদ, সেই সময় কানু কাউকে কিছু না বলে চুপি চুপি পালিয়ে গেল বনের মধ্যে। ছুটতে ছুটতে, একলা, বনের মধ্যে আরও ক্রমশ একলা হতে হতে কানু এক সময় হারিয়ে গেল গভীর থেকে গভীরতর বনে।

ক'দিন ধরে রাধার দেখা নেই, তার কোনও সংবাদ নেই, সংকেতকুঞ্জ শূন্যতায় হা হা করে। কানু বার বার স্নানের ঘাটে যায়, খেয়ার ঘাটে যায়, কদম্বতরুর তলায় গিয়ে বসে থাকে, তবু রাধাকে দেখে না। কানুর ইচ্ছে করে সবকিছু লভভন্ড করে দিতে। ক্রুদ্ধ সিংহের মতো সে বনের মধ্যে একা একা গজরায়।

পরদিন দুপুরবেলা কানুকে আবার আবিষ্কার করল সুবল। নিঃসঙ্গ যমুনাतीরে। কদমগাছের নীচে। দীর্ঘশ্বাসবহুল মলিন মুখ নিয়ে বসে আছে। কালীদেহের পাড়ে রাধাকে প্রথম দেখার পরের মতন ঠিক একই অবস্থা।

সুবল প্রথমেই বলল, আমি পাকা খবর নিয়ে এসেছি। রাধা এখন আয়ানের বাড়িতে নেই।

কানু চকিতে মুখ তুলে বলল, কোথায়?

সুবল বলল, রাধা গেছে তার বাপেরবাড়ি। কেউ বলছে, আয়ানই সেখানে তাকে পাঠিয়েছে। আবার কেউ বলছে,

রাজা বৃষভানু মেয়ের স্বাস্থ্য খারাপ হয়ে যাচ্ছে শুনে নিজেরই তাকে লোক পাঠিয়ে নিয়ে গেছেন। আবার এমন কথাও শুনিছি সখীদের মুখে যে, কানু একসঙ্গে অনেক গোপিনীর সঙ্গে লীলা করছে বলেই রাধা অভিমান করে গোকুল ছেড়ে চলে গেছে ব্রহ্মপুরীতে।

হতেই পারে না!

কী হতে পারে না?

রাধা আমার ওপর রাগ করে কখনও যাবে না। সে তো জানে, তাকে এক দিন না দেখলে আমার চোখে দুনিয়া ছারখার হয়ে যায়! সে কি আমাকে এতটা শান্তি দিতে পারে? তাকে নিশ্চয়ই জোর করে পাঠিয়ে দেওয়া হয়েছে।

সে যাই হোক, রাধা যে বৃষভানুপুরীতে গেছে, তাতে কোনও সন্দেহ নেই!

কানু বলল, আমি বৃষভানু রাজার আলয়ে যাব?

সুবল তার হাত ধরে টেনে বলল, আরে পাগল, বোস বোস, এখুনি কোথায় যাবি তুই?

কানু বলল, আমি বৃষভানু রাজার আলয়ে যাব।

যাব বললেই কি যাওয়া যায়? সেখানে তোকে ঢুকতে দেবে কেন?

ঢুকতে দেবে না?

কেন দেবে? আমরা রাখাল ছেলে, ইচ্ছে করলেই কি হটহাট করে রাজার বাড়িতে ঢুকে পড়তে পারি?

আমি ষ্মার ভেঙে ঢুকব!

তা তুই পারিস! কিন্তু তা হলেও সাত্ত্বী আর প্রহরীরা



তোকে ঘিরে থাকবে। দ্বার ভেঙে ঢুকে কি আর রাজনন্দিনীর দেখা পাওয়া যায় ?

কানু একটুক্ষণ চিন্তা করল। তারপর সুবলের যুক্তি মেনে, তাকেই অনুময় করে বলল, ভাই সুবল, তুই তো অনেক রকম কলাকৌশল দেখাতে পারিস, আমাকে দু'-একটা শিখিয়ে দে না !

সুবল বলল, তাতে অনেক সময় লাগবে। ওসব জাদুবিদ্যা কি আর এক-আধ দিনে শেখা যায় !

ওবে আমাকে কোনও একটা ভান শিখিয়ে দে। কিংবা আমাকে অন্য রকম কিছু সাজিয়ে দে !

তুই কী সাজতে চাস ?

আমি নাপতেনি সেজে রাধার পায়ে আলতা পরাতে যেতে পারি, কিংবা চুড়িওয়ালি সেজে গিয়ে রাধার হাতে চুড়ি পরাব !

তুই এর একটাও পারবি না। ধরা পড়ে যাবি।

তা হলে একটা উপায় বলে দে।

চল, আমি তোকে সঙ্গে করে নিয়ে যাচ্ছি !

সুবল জাদুবিদ্যা আর নাট্যরঙ্গ বেশ ভালোই জানে। এর জন্য তার বেশ কিছু সাজসরঞ্জাম আর বাদ্যযন্ত্রও আছে। সঙ্গীও আছে তিন-চার জন। তারা সবাই মিলে সাজপোশাক বদলে নাটুয়া সাজল, মুখে লাগাল শন আর পাটের দাড়িগোঁফ। তারপর ডঙ্কা বাজাতে বাজাতে চলল বৃষভানু রাজার পুরীর উদ্দেশে।

বৃন্দাবনের মাঠ পার হয়ে তারা যখন ব্রজের দিকে যাচ্ছে, তখন দেখল পথের ধারে এক জন সাধুর মতন

লোক চিত হয়ে শুয়ে আছে আর চিৎকার করছে, জল, একটু জল, জ্বলে গেল, বুক জ্বলে গেল...

সুবল তাই দেখে বলল, লোকটা এখনও মরেনি, আশ্চর্য তো!

কানু বিস্মিত ভাবে বলল, লোকটা কে?

কী জানি! ভিনদেশি সাধু। ক'দিন ধরেই শুয়ে শুয়ে ওই রকম চ্যাঁচাচ্ছে।

তা কেউ ওকে জল দেয় না কেন?

ও নেবে না, মহা পাজি, ও-সব ওর ভান। দেখবি?

সুবল রাস্তা ছেড়ে নেমে গেল লোকটার দিকে। খানিকটা কাছাকাছি যেতেই বৃদ্ধ চোখ ঘুরিয়ে দেখল সুবলকে, তারপর ধমক দিয়ে বলল, এই, কাছে আসবি না। ছুঁবি না আমাকে, ছুঁবি না, তা হলে শাপ দেব—

সুবল আবার দৌড়ে পিছিয়ে এসে বলল, দেখলি! ওর কাছে না গেলে ওকে কেউ জল দেবে কী করে? শাপ দেবার ভয় দেখায়? দূর দূর, এই অপয়াটাকে দেখলাম, এখন আমাদের কাজ হলে হয়!

কেউ আর মাথা ঘামাল না বুড়োকে নিয়ে, রাজবাড়ির দিকে ছুটে চলল। তখন সবে সূর্যাস্ত হচ্ছে, সারা আকাশে ছড়িয়ে গেছে পাকা সোনার রং। সেই রং গায়ে মেখে চলে গেল এই আনন্দ-উচ্ছল তরুণেরা।

রাজবাড়ির দ্বারে সাস্ত্রী এসে বাধা দেবার আগেই সুবল গিয়ে বলল, আমরা ভিনদেশি নাটুয়া। আমরা রাজার মনোরঞ্জন করতে এসেছি। আমরা ক্ষুধার্ত, রাজা অনুগ্রহ করলে আমরা আজ রাজপুরীর প্রসাদ খাব।

সাস্ত্রী বলল, রও, তোমরা এখানে রও, আমি আগে রাজাকে জিজ্ঞেস করে আসি।

ব্রজপুরে প্রৌঢ় রাজা-রানির নিস্তরঙ্গ জীবন। সন্ধ্যার সময় আমোদ-প্রমোদের উপকরণ সবই চিরাচরিত হয়ে গেছে। নতুন কৌতূকের সংবাদ পেয়ে রাজা খুশি মনেই সন্মতি দিলেন।

সুবলের দল মহা উৎসাহে রাজসভা মণ্ডপের মধ্যে মঞ্চ নির্মাণ করতে লেগে গেল। মঞ্চের পেছনে একটা গুপ্ত খরও বানাল নিজেদের সাজ পরিবর্তনের জন্য। কানুকে বসিয়ে রাখল সেই ঘরে।

সভামণ্ডপে জ্বালা হয়েছে অনেকগুলি ঝাড়বাতি। তাদের স্বর্ণময় দণ্ডে আলো পড়ে যেন চোখ ধাঁধিয়ে দেয়। মাথার ওপরের চন্দ্রাতপে হিরে-মুক্তোর চুমকি বসানো। মঞ্চের ঠিক সামনেই রাজা বসেছেন পাত্রমিত্রদের সঙ্গে নিয়ে। তাঁর পেছনে রাজবাড়ির অন্য পুরুষরা। খবর পেয়ে বাইরে থেকে কিছু লোক এসে পেছনে ভিড় করেছে। দু' পাশের অলিন্দে অতি সূক্ষ্ম বস্ত্রের যবনিকার আড়ালে বসেছে বাড়ির মেয়েরা। জননী কৃত্তিকার পাশে বসেছে রাধা আর তার সখীরা। তাদের রূপের ছটা ওই যবনিকা ভেদ করে আসে।

যথা সময়ে সংকেত দিয়ে রঙ্গ শুরু হল। প্রথমে একেবারে শূন্য মঞ্চ, আড়ালে নানা রকম বাদ্য বাজছে। হঠাৎ ছড়মুড় করে বৃহৎ একটা বরাহ ঢুকে পড়ল মঞ্চ! এবং ক্রুদ্ধ গর্জন করতে লাগল। মঞ্চের ওপর একটি বন্য বরাহ দেখে প্রথমে চমকে উঠেছিল দর্শকরা। বুঝতে

সময় লাগল যে, ওটা একজনের সাজ।

বরাহের সামনে দুটি তীক্ষ্ণ দাঁত। সেই দাঁত দিয়ে সে মঞ্চের ভূমিতে আঘাত করল। তারপর ঘাড় শক্ত করে এমন চাপ দিল যে একটু বাদেই মনে হল, শুধু মঞ্চ নয়, গোটা সভাগৃহ এমনকী সম্পূর্ণ মেদিনীই দুলছে ওই বরাহের দাঁতের ধাক্কায়। তখন সবাই বুঝল, এটা বরাহ অবতারের অভিনয়। সবাই সাধুবাদ দিল।

এরপর সুবল মঞ্চের পেছনের গুপ্ত ঘরে এসে অচিরেই বরাহের সাজ বদলে এক বামনে রূপান্তরিত হল। কী করে তার দীর্ঘ শরীরটাও খর্ব করে ফেলল, সেও এক বিস্ময়। এদিকে মধুমঙ্গল সেজেছে বলিরাজা। মঞ্চের ওপর বলিরাজা ও সেই বামনের যুদ্ধ শুরু হল। এক সময় সেই বামন অদ্ভুত কৃতিত্বের সঙ্গে বলিরাজার মাথার ওপর এক পা রেখে এমন চাপ দিল যে বলিরাজা শরীরে ঢুকে গেল মঞ্চের নীচে! এই বামন অবতারের রূপ দেখেও সকলে সাধুবাদ দিল।

পরের দৃশ্যে অংশুমান সাজল হিরণ্যকশিপু। সে বালক প্রহ্লাদবেশী শ্রীদামের ওপর নানা অত্যাচার করছে এমন সময় মঞ্চে সদর্পে প্রবেশ করল নৃসিংহ অবতার। কী সাংঘাতিক তার রূপ! নীচের অর্ধেকটা মানুষের মতন, উপরের অংশ যেন প্রকৃত সিংহ, কেশর-ভরতি বিরাট মাথা, ভাঁটার মতন জ্বলন্ত চোখ, হাত দু'টিও সিংহের থাবা। সে অবলীলাক্রমে হিরণ্যকশিপুকে কোলে তুলে নিয়ে তার বুক চিরে দিতে লাগল। এমনই অপরূপ ভেলকি যে সত্যিই মনে হল হিরণ্যকশিপুর বুক চিরে গলগল করে রক্ত

বেরোচ্ছে। সেই সঙ্গে সিংহের হিংস্র গর্জন।

সভামণ্ডপে প্রথমে কিছু অস্থুট ধ্বনি শোনা গেল। তারপর রীতিমতন ভয়ার্ত চিৎকার। রাজা বৃষভানু উঠে দাঁড়িয়ে বললেন, থাক থাক, আর নয়! নাটুয়ার দল, তোমরা চমকপ্রদ খেলা দেখিয়েছ। কিন্তু আর দরকার নেই, আমার লোকেরা ভয় পাচ্ছে।

সুবল তখন সিংহের মুখোশ খুলে ফেলে দুই হাত জোড় করে বলল, মহারাজ, আমাদের আর একটা মাত্র খেলা বাকি আছে, সে-খেলাতে ভয়ের কিছু নেই। তাতে শুধু একটা গীত শুনবেন। সেটা বেখাতে পারি?

রাজা বললেন, তাই হোক।

মঞ্চে যবনিকা ফেলে সুবলরা আড়ালে চলে গেল। একটু পরে যখন যবনিকা উঠল, তখন দেখা গেল, মঞ্চের ওপর একটা কৃত্রিম কদম গাছ, তার নীচে রাখালরাজার বেশে দাঁড়িয়ে আছে কানু। তার মাথায় শিখিপুচ্ছের মুকুট, কপালে রক্ত চন্দনের ফোঁটা, গলায় গুঞ্জাফুলের মালা, পীত রঙের কটি-বসন আর উস্তরীয়। কী অপূর্ব মনোহর তার রূপ! অভিনয়ে অপারগ বলে কানুর লজ্জামাথা মুখখানি নীচের দিকে করা। সে আড়বাঁশিটা নিয়ে আস্তে আস্তে ঘূঁ দিল। এবার রাখালরা তাকে ঘিরে একটা গান গাইবে।

কিন্তু গান আর শুরু হল না। অলিন্দে রীতিমতন একটা অলোড়ন পড়ে গেছে। যবনিকার আড়ালে নারীরা শশব্যস্ত। জননী কৃত্তিকার কোলে মাথা ঢলে অজ্ঞান হয়ে পড়েছে রাধা। তাকে সবাই অন্দরমহলে সরিয়ে নিয়ে গেল



তাড়াতাড়ি। খবর পেয়ে রাজাও উঠে গেলেন। চলে গেল  
অন্যরাও। অভিনয় থেমে রইল।

সোনার করছ থেকে জল ছোটানো হতে লাগল রাধার  
চোখে-মুখে। তবু তার কোনও সাড়া নেই। তার দাঁতে দাঁত  
লেগে গেছে। চোখ দুটি নিম্পলক। অনেকগুলি ব্যাকুল মুখ  
ঝুঁকে আছে তার দিকে। নানা রকম সম্বোধনে জাগাবার  
চেষ্টা করা হচ্ছে তাকে। কিন্তু সে যেন আর এ-পৃথিবীতে  
নেই।

ডাকা হল রাজবৈদ্যকে। তিনি পরীক্ষা করে বললেন,  
নাড়ির গতি ঠিক আছে, শ্বাস সুস্থির আছে, গায়ের বর্ণ  
অবিকৃত আছে, তবে এ কী রোগ?

তার বটিকা রাধার মুখের কশ দিয়ে গড়িয়ে পড়ল। মুখ  
খুলছে না। ওষুধই যদি পেটে না যায়, তা হলে চিকিৎসা  
হবে কী করে?

তখন ডাকা হল দেয়াসিনীকে। সে এল তার জড়িবুটির  
পুঁটলি নিয়ে। সে-ও রাধাকে পরীক্ষা করে বলল, একে তো  
ভূত-প্রেতে পায়নি। আমার চিকিৎসায় এর কোনও ফল  
হবে না। যদি হত কোনও ভূত-প্রেত-দৈত্য-দানো, ঠিক  
আমার মন্তরের জোরে নাকে দড়ি দিয়ে টেনে বার  
করতুম—কিন্তু এ তো অন্য অসুখ, এ-অসুখ আমি চিনি না!

এদিকে মঞ্চের ওপর তখনও দাঁড়িয়ে আছে সুবলরা।  
ফাঁকা মণ্ডপ। হঠাৎ কী যে হয়ে গেল, কিছুই বুঝতে পারছে  
না। কানু ভাবছে, এত পরিশ্রম করে কী লাভ হল? এত  
করেও তো তার দেখা পাওয়া গেল না!

এক সময় বন্দাকে যেতে দেখে সুবল দৌড়ে তার



রাধা একটুও নড়ল না।

সুবল আবার বলল, এক আঙুল মালা গাঁথে, আর এক আঙুল বাঁশি বাজায়। এখন মালাও গাঁথা হয় না, তাই তমালের নীচে কেউ আর বাঁশিও বাজায় না!

এবার রাধার শ্বাস একটু দ্রুত হল, কিন্তু চোখের পলক পড়ল না।

সুবল আবার বলল, কেউ কনকশয্যায় শুয়ে কাঁদে। কেউ ভূমিশয্যায়। কিন্তু চোখের জল এক।

রাধা এবার চোখের পলক ফেলে সুবলের মুখে দৃষ্টি ন্যস্ত করল। তারপর আন্তে আন্তে বলল, সে আমাকে আর মনে রাখেনি।

তবে, সে এখানে এসেছে কেন?

শুধু আমায় দুঃখ দিতে।

শ্রীমতী, তুমি নিজের দুঃখটা বড় করে দেখলে, তার দুঃখটা দেখলে না? জীবনটা বড় ছোট, আর যারা ভালোবাসে, তাদের সময় আরও দ্রুত চলে যায়।

আমায় সে কালসীমার বাইরে ঠেলে দিয়েছিল। আমি জানি না, কেন আমাদের গৃহের দ্বার বন্ধ হয়ে গেল। সে কেন দ্বার ভেঙে আসেনি? আমি জানি না, কেন গোকুল থেকে আমাকে এখানে আনা হল। সে কেন আমার পথ রোধ করল না?

তোমার একদিনের অদর্শনেই তার কাছে দুনিয়া অন্ধকার হয়ে গিয়েছিল, সে আর কিছুই দেখতে পায়নি। তোমরা দু'জনেই অভিমানী, ভালোবাসাই এমন অভিমানের জন্ম দেয়!

সে কি আর কোনও দিনও আমার কাছে আসবে?

সে তো তোমার কাছেই এসেছে।

রাধা শড়মড় করে উঠে বসে বলল, আমি যাব—।

কোথায় যাবে?

তার কাছে।

সুখল তাকে রাধা দিয়ে বলল, এখন না। এখানে তোমাদের দু'জনের দেখা হলে লোকনিন্দা হবে। তুমি তোমার গলার মালা থেকে একটি ফুল ছিড়ে দাও কানুর জন্য। আজ থেকে ঠিক দু'দিন বাদে পূর্ণিমা, সেই পূর্ণিমার রাতে তুমি যমুনার ধারে তমালের নীচে এসো। সে আসবে। তুমি সংকেতের জন্য একটা ছোট দীপ জ্বলে রেখো—

রাধা বলল, আমি আমার সমস্ত দীপ জ্বলে রাখব। আর কেউ দেখবে না। শুধু সে দেখবে!



রান্তিরবেলা রাজবাড়িতে ভূরিভোজ খেয়ে রাখালরা সেখানে ঘুমিয়েছে। ভোরবেলা তারা বাড়ির পথ ধরল। তাদের মনে দারুণ ফুর্তি, তারা অনেক রকম উপহার পেয়েছে। তারা লাফাতে লাফাতে যাচ্ছে। কানুর ফুর্তি সবচেয়ে বেশি, কারণ সে শ্রীধারার মন পেয়েছে আবার।

মাঠের মধ্যে রাস্তার ধারে সেই বৃদ্ধটি তখনও একই জায়গায় শুয়ে আছে, সেই একই রকম ভাবে চোঁচাচ্ছে, জ্বলে গেল, বুক জ্বলে গেল, একটু জল দাও, বুক জ্বলে গেল।

একজন রাখাল বলল, আঃ, এই বুড়োটা কি এ রকম চাঁচাতেই থাকবে? মরবেও না?

আর এক জন বলল, বোধহয় এইটাই ওর সাধনার অঙ্গ। সাধুদের তো এ রকম অনেক কিছু বায়নাঙ্কা থাকে।

সুবল বলল, কাল আমি ওকে ভেবে ছিলাম অপয়া। কিন্তু কাল ওকে দেখে গিয়েছিলাম বলেই বোধহয়

আমাদের এত সুফল হল।

কানু বলল, দাঁড়া, আমি ওর জল তেঁটা মিটিয়ে দিচ্ছি!  
সবাই বারণ করল, যাসনি কানু, যাসনি, ও অভিশাপ  
দেবে।

কানু বলল, দেখিই না, কেমন অভিশাপ দেয়!

কাছাকাছি একটা পুকুরিণী থেকে একটা মৃৎভাণ্ডে  
খানিকটা জল নিয়ে কানু এগিয়ে গেল সেই বৃদ্ধের দিকে।  
তখনও কানু জানে না, এই প্রতিটি পদক্ষেপের সঙ্গে সে  
তার জীবনের এক বিরাট পরিবর্তনের দিকে যাচ্ছে।

বৃদ্ধের চুল দাড়ি সব পাকা, পরনে টকটকে লোহিত  
বর্ণের এক টুকরো বস্ত্র, সে বাণবিন্দু পশুর মতন ছটফট  
করছে, তার কশের পাশ দিয়ে বেরিয়ে আসছে ফেনা।

কানু তার কাছে এসে বলল, এই নিন, আপনার জন্য  
আমি জল এনেছি!

ছটফটানি থামিয়ে বৃদ্ধ রক্তবর্ণ চোখে তাকাল কানুর  
দিকে। তারপর কর্কশ ভাবে বলল, কাছে আসবি না। ছুঁবি  
না আমাকে, ছুঁবি না, তা হলে শাপ দেব—

কানু বলল, আপনার কাছে না এলে আপনাকে জল পান  
করান কী করে?

ছুঁব না আমায়, দূর হয়ে যা। অভিশাপ দেব—

কানু একটু বিচারাগস্ত হয়ে দাঁড়াল। কিন্তু বৃদ্ধকে জল পান  
করাবার গৌ তার মাথায় চেপেছে, সে নিবৃত্ত হল না।  
আবার এগিয়ে গেল।

বৃদ্ধ বলল, কাছে আসবি না! সাবধান! একবার  
অভিশাপ দিলে আর ফেরানো যাবে না।

কানু বলল, আপনি চিৎকার করে জল চাইছেন, আপনাকে জল দেওয়া আমার কর্তব্য। আপনি অভিশাপ দেবেন কি দেবেন না—সে আপনার কর্তব্য, বুঝে দেখুন!

জলের পাত্রটি নিয়ে কানু বৃদ্ধের মুখের সামনে হাঁটু গেড়ে বসল।

ছুঁবি না আমায়। আগে তোর পরিচয় দে।

আমি বৃন্দাবনের নন্দ ঘোষের নন্দন, আমার নাম কৃষ্ণ, আমি ধেনুপালক...

তুই একটা মিথ্যুক! তোর হাতের জল খেলে আমি মহাপাতকী হব।

কানু প্রথমে অবাক হল। লোকটা তাকে মিথ্যুক বলে কোন সাহসে? এর মধ্যে মিথ্যেটা কোথায়!

তারপরই তার রাগ হল। বৃদ্ধের এতটা বাড়াবাড়ি সহ্য করা যায় না।

সে বলল, দেখো বুড়ো। যদি স্বেচ্ছায় এই জল খেতে চাও তো খাও। নইলে আমি জোর করে তোমার চোয়াল ফাঁক করে তারপর মুখের মধ্যে জল ঢেলে দেব, কিংবা তোমায় পঁজাকোলা করে তুলে নিয়ে ফেলে দেব পুষ্করিণীতে।

বৃদ্ধ এবার হাত তুলে কানুকে থামতে বলে নিজেই উঠে বসল। তারপর একেবারে বদলে গিয়ে, খুব শান্ত ভাবে বলল, আমি তিন দিন ধরে এখানে শুয়ে চিৎকার করছি, এর মধ্যে কেউ আমাকে জোর করে জল পান করাতে আসেনি।

আপনিই বা অভিশাপের ভয় দেখাচ্ছিলেন কেন?

তৃষ্ণার্তকে জলদান মানুষের কর্তব্য কিংবা করুণা। তা কতখানি প্রবল? অলীক ভীতির কাছে তা তুচ্ছ হয়ে যায়। অর্থাৎ অধিকাংশ মানুষই আত্মরক্ষণে যত্নবান। নির্ভীক ভাবে পররক্ষণের কাজ একজন বা দু' জনই পারে।

হঠাৎ বৃদ্ধের মুখে এ রকম গুরুগভীর কথা শুনে কানু চুপ করে বসে রইল।

বৃদ্ধ তখন মুচকি হেসে নিজেই ভাণ্ডের সবটুকু জল পান করে তৃপ্তমুচকি আঃ শব্দ করলেন, তারপর বললেন, হে বাসুদেব, আমি তোমারই প্রতীক্ষায় এখানে ছিলাম।

কানু আরও অবাক হয়ে গেল। জিজ্ঞেস করল, আপনি কে?

বৃদ্ধ বললেন, আমি সান্দীপনি ঋষি। তোমারই জন্য আমি এসেছি।

আপনি আমাকে বাসুদেব বলছেন কেন? আমার নাম তো --

বৃদ্ধ ৬৬সনার দৃষ্টিতে বললেন, ছিঃ!

বৃদ্ধের অভিশাপে কানু পুড়ে ছাই হয়ে যায়নি কিংবা ভেড়া বা গাভী হয়ে যায়নি দেখে অন্য রাখালরা ভরসা করে এবার কাছে চলে এল। বৃদ্ধ তাদের বললেন, তোমরা গান্ড, এই মুনকের সাথে আমার কিছু গুঢ় কথা আছে।

তারা গেতে চায় না। কানুকে ফেলে রেখে তারা যাবে কেন। বৃদ্ধ গাভীর ভাবে বললেন, যাও! এর জন্য ভয় পেয়ো না। এর সঙ্গে আমার এমন কথা আছে যা তোমাদের সামনে এলা যাবে না!

তারা চলে গেলে, সান্দীপনি মুনি কৃষ্ণের জানু স্পর্শ



করে বললেন, তুমি আত্মবিস্মৃত, তুমি নিজের পরিচয়ও জানো না! বাসুদেব, তুমি পৃথিবীতে অনেক বড় কাজের জন্য জন্মেছ, সামান্য যৌষিৎ-সংসর্গে নিমজ্জিত হয়ে থাকা তোমায় মানায় না!

কানু বলল, আপনি কী বলছেন, আমি এখনও বুঝতে পারছি না!

বৎস, তুমি কৈশোর থেকে যৌবনে উদ্ভীর্ণ হয়েছ। তোমার বাবা-মা কংসের কারাগারে পচছে। এবার তুমি তাদের উদ্ধার করে তোমার পুরুষকার প্রমাণ করো।

আমার বাবা-মা কংসের কারাগারে? কালও তো দেখে এসেছি বৃন্দাবনের ঘোষপল্লিতে—

ওরা নয়! নন্দ আর যশোদা তোমার পালক পিতা-মাতা মাত্র! তোমার মা রাজপুত্রী দেবকী, তোমার বাবা বিশিষ্ট গোষ্ঠী-নেতা বসুদেব। তুমি ঋত্রিয়। গোপবালকের ছদ্মবেশ ছেড়ে এবার বাইরে এসো।

কানু বিমূঢ় হয়ে গেল। নন্দ-যশোমতী তার বাবা-মা নয়? এ-কথা এত দিন কেউ তাকে বলেনি? সে কিম্ব হয়ে বসে রইল কিছুক্ষণ।

সান্দীপনি মুনি আবার বললেন, তোমার জন্মরহস্য বিশেষ কেউ জানে না। তোমার জন্মরাত্রেই তোমাকে কারাগার থেকে লুকিয়ে এনে গোকুলে যশোদার কোলের কাছে শুইয়ে রাখা হয়েছিল। যশোদা তখন ঘুমন্ত, কিছুই জানতে পারেনি। সেই রাতে যশোদারও একটি কন্যাসন্তান হয়েছিল, তোমার বদলে সে-ই কংসের জল্লাদদের হাতে প্রাণ দেয়। এবার তুমি সেই অত্যাচারের শোধ নাও,

ধরণীকে পাপমুক্ত করো। তুমি এখানে সামান্য নারীর রূপের মোহে ডুলে আছ। কিন্তু পৃথিবীতে তোমার আরও অনেক বড় কাজ আছে। আর কালবিলম্ব না করে তুমি মথুরায় চলো। রাজা কংসও এত দিনে তোমার কথা টের পেয়ে গেছে, তুমি আর বেশি দিন আত্মগোপন করে এমনিতেও থাকতে পারবে না।

অনেকক্ষণ বাদে কানু নিচু গলায় প্রশ্ন করল, আমাকে কি আমার এই পালক পিতা-মাতাদের ছেড়ে যেতে হবে?

তোমাকে আরও অনেক কিছুই ছেড়ে যেতে হবে।

কিন্তু এত স্নেহ, এত ভালোবাসা।

স্নেহ, মায়া, ভালোবাসা—এসব বন্ধন তোমার জন্য নয়। তুমি যে নির্দিষ্ট! তুমি মহৎ কাজের জন্য নির্বাচিত।

কানু তবু সবকিছু অস্বীকার করার শেষ চেষ্টায় বলল, যদি আমি না যাই? কে আমাকে জোর করে নিয়ে যেতে পারে? যদি আমি এখানেই রাখাল হয়ে সুখে থেকে যাই বাকি জীবন? রাজচক্রাঙ্গ, হানাহানি এ-সবের মধ্যে যদি নিজেকে না জড়াই কখনও?

ঋষি বললেন, তা আর হবার উপায় নেই, কানু! সেইজন্যই মথুরা থেকে আমি এসেছি তোমার বিস্মৃতি ভাঙাতে। তোমার অন্তরাত্মা জ্বালিয়ে দিতে। তুমি জোর করে এখানে থেকে যেতে পারো, কিন্তু সুখে আর কখনও থাকবে না। তোমার ভেতর সব সময় ধিকিধিকি আগুন ঝলবে। তুমি কিছুতেই ডুলতে পারবে না যে তুমি বন্দি পিতা-মাতার সন্তান। রাজরক্ত রয়েছে তোমার শরীরে, তোমার ওপর একটা মহৎ কাজের ভার ছিল...

আরও অনেকক্ষণ ঘোর-লাগা অবস্থায় বসে রইল কানু। সান্দীপনি মুনি যুদ্ধবিদ্যা থেকে শুরু করে রাজ্য-পরিচালনা পর্যন্ত নানা বিষয়ে শ্লোক ও মন্ত্র শোনাতে লাগলেন তার কানে।

এরপর ঘটনা অতি দ্রুত ঘটতে লাগল।

সেদিন গৃহে ফিরে আসতে আসতেই কানু দেখল একটি রাজপতাকালাঙ্কিত রথ দাঁড়িয়ে আছে তাদের কুটিরের সামনে। মহার্ঘ পোশাকে ভূষিত এক রাজদূত গভীর ভাবে পায়চারি করছে সেখানে। উঠোনে অনেক ভিড়। রোহিণী, বলরাম এবং অন্যান্য গোপদেরও দেখা যাচ্ছে।

রাজদূত কানুকে দেখে সবিনয়ে বলল, আমি সংবাদবাহী অক্রুর। রাজা কংস আপনাকে নিমন্ত্রণ জানিয়েছেন। আমি রথ নিয়ে এসেছি।

কানু চমৎকৃত হয়ে গেল। মাত্র এই এক-দু' দণ্ড আগে সে জেনেছে তার জন্মরহস্য, আর এর মধ্যেই রাজা কংসের দূত এসে গেছে। গতকাল যদি অক্রুর আসত, কানু হয়তো দূর থেকে ওই রথ দেখেই পালিয়ে বনের মধ্যে আত্মগোপন করে থাকত। কিন্তু আজ আর উপায় নেই। কংসের মুখোমুখি হওয়াই তার নিয়তি।

যশোমতী ব্যাকুল ভাবে ছুটে এসে কানুকে জড়িয়ে ধরে বলল, না কানু, তুই কিছুতেই যাবি না! কোথাও যাবি না! আমি তোকে আগলে রাখব! দুরাচার কংস কত বার তোকে মারবার চেষ্টা করেছে। আমাকে না মেরে সে কিছুতেই তোকে নিতে পারবে না।

ঘরের দাওয়ায় বসে নীরবে চোখের জল ফেলছে নন্দ।

সে জানে, আর কোনও উপায় নেই। কয়েক দিন আগে তাকেও হাজিরা দিতে হয়েছে রাজা কংসের দরবারে। কংস বৃন্দাবনের প্রত্যেকটি পুরুষকে নিয়ে গিয়ে জেরা করেছে। রাজা কংস জেনে গেছে কানুর প্রকৃত পরিচয়। সেই দিন নন্দও জানল যে কানু তার নিজের সন্তান নয়! মুখ ফুটে যশোদাকে বলতে পারেনি এ-কথা!

কানু যশোমতীকে খানিকটা শাস্ত করার চেষ্টা করে বলল, মা, ডাক যখন এসেছে, আমাকে যেতেই হবে।

যশোমতী আরও শক্ত করে তাকে ধরে চৌঁচিয়ে উঠল, না, না, না, কেউ তোকে আমার কাছ থেকে নিয়ে যেতে পারবে না। তুই গেলে আমার মরা দেহের ওপর দিয়ে যেতে হবে!

রোহিণী এসে যশোমতীকে জোর করে ছাড়িয়ে নিয়ে কঠোর ভাবে বললেন, ছিঃ, বোন! এমন ব্যাকুল হলে কি চলে? তোমাকে আমি বলেছিলাম না, একদিন কানুকে ছাড়তেই হবে। সে তো সারা জীবন রাখালি করার জন্য জন্মায়নি।

যশোমতী বলল, কেন, ছাড়তে হবে কেন? তুমি তা বলবার কে? কানু আমার ছেলে, আমি তাকে ছাড়ব না।

কানু তোমার ছেলে নয়!

আঁ? কী বললে?

যশোমতী তক্ষুনি সংজ্ঞাহীনা হয়ে পড়ে যাবে দেখে রোহিণী তাড়াতাড়ি বললেন, কানু শুধু তোমার একার ছেলে নয়, সে সকলের। সে আমাদের সকলের কত বড় গর্ব। সে কংসের বিজয়ে যাচ্ছে।

কানু যশোমতীর হাত ধরে বলল, মা, আমি তোমার !  
তুমি আশীর্বাদ করো, আমি ঠিক জয়ী হব !

রোহিণী বললেন, কানু তো একা যাচ্ছে না। বলরামও  
ওর সঙ্গে যাবে। ওদের আরক্ৰ কাজ নিষ্পন্ন করার সময়  
এসেছে। ওরা দুই ভাই জগৎ জয় করবে !

ধীর সুস্থির বলরাম কানুর কাছে এসে বলল, চল কানু,  
তুই আর আমি পাশাপাশি থাকলে ভয় কী ? পাগলা হাতিও  
আমাদের আটকাতে পারবে না !

রথের অশ্ব দুটো অস্থির হয়ে মাটিতে ক্ষুর ঠুকছে।  
অক্রুর আকাশের দিকে তাকিয়ে নির্ণয় করছে সময়। বেলা  
বেড়ে যাচ্ছে। অনেক দূরের পথ।

কানু বুঝল, আর দেরি করে লাভ নেই। গুরুজনদের  
প্রণাম করে সে বিদায় নেবার জন্য তৈরি হল !

তখন সুবল কোথা থেকে দৌড়ে এসে বলল, দাঁড়া কানু,  
তুই মথুরায় যাবিই যখন, তখন এত সামান্য বেশে যাবি  
কেন ? তুই তো আমাদের রাজা ! রাজার মতন যাবি !

সুবল কানুকে রাজা সাজাতে লাগল। পীত বস্ত্রের বদলে  
আজ পরিয়ে দিল সুদৃশ্য মখমলের পোশাক। গলায়  
ঝুলিয়ে দিল মুক্তামালা। বাহুতে বেঁধে দিল সুবর্ণ-তাবিজ।  
কোমরবন্ধে ঝুলিয়ে দিল তলোয়ার। কিন্তু মাথায় পরাল  
সেই ময়ূর পালকের মুকুট।

রাজবেশে কানু প্রণাম করল যশোমতীকে। তার কম্পিত  
শরীর ধরে বলল, মা, চোখের জল নয়, আজ আশীর্বাদ দাও  
মা !

তারপর নন্দ, রোহিণী এবং অন্য বয়োজ্যেষ্ঠদের প্রণাম

করে কানু বলরামকে সঙ্গে নিয়ে রথে উঠতে গেল।

শেষ মুহূর্তে সুবল কানুকে জনান্তিকে টেনে নিয়ে গিয়ে বলল, কানু, তুই তো শ্রীমতী রাধিকার জন্য কিছু বলে গেলি না? তোকে আমি কী সাঙ্গনা দেব? তাকে যে আমি তোর হয়ে কথা দিয়ে এসেছি!

গলায় বাষ্প এসে গিয়েছিল, অতি কষ্টে তা সংযত করে কানু বলল, রাধাকে বলিস, আমার কাজ শেষ করে আমি ঠিক ফিরে আসব। আমি রাধার কাছে ফিরে আসব। দেখা হবে সেই যমুনার তীরে, তমাল গাছের তলায়, পূর্ণিমা রাত্রে...

ঘর্ঘর শব্দে রথ চলে গেল বৃন্দাবন ছেড়ে মথুরার দিকে।



কানু আর আসেনি। দ্বন্দ্বযুদ্ধে কংসকে নিহত করে সে মথুরার রাজা হয়েছে। যাদবদের লুপ্ত গৌরব ফিরিয়ে আনার ভার পড়েছে তার ওপর। সে এখন সদাব্যস্ত। কত প্রার্থী, গ্রহীতা, অসহায় ব্যক্তির আশে তার কাছে সাহায্য চাইতে। রাজ্যে ন্যায়, শান্তি ও শৃঙ্খলা স্থাপনের কাজে সে অষ্টপ্রহর ব্যাপ্ত। তা ছাড়া আরও শত্রুদমনের কাজ বাকি আছে। মহাবল জরাসন্ধের ক্রোধ থেকে মথুরাকে রক্ষা করাও কম কথা নয়। শোনা যায়, সে নাকি রাজধানী মথুরা থেকে সরিয়ে অনেক দূরে, দ্বারকায় নিয়ে গিয়ে সুদৃঢ় করতে চাইছে।

বৃন্দাবনে সে আর আসেনি। এতদিন যেমন সে তার জন্ম-পরিচয় বিস্মৃত ছিল, এখন সে যেন তার বাল্য-কৈশোরের এই অধ্যায়টিও সম্পূর্ণ বিস্মৃত হয়েছে। কত পূর্ণিমা, এসেছে, তারপর অমাবস্যা, আবার পূর্ণিমা। অমাবস্যা হয়েছে চন্দ্রাভুক, আবার চন্দ্রকিরণ ভক্ষণ করেছে

আঁধার। আকাশে দেখা দিয়েছে নবীন মেঘ, মাটিতে পড়েছে নীলবর্ণ ছায়া, তখনও কানু আসেনি। কদম গাছগুলো ফুলে ফুলে ছেয়ে গেছে, তমাল গাছের নীচে জ্বলছে দীপ, কানু আসেনি। চোখের জলে একটি নদী বানিয়ে রাখা তার পাশে শুয়ে থেকেছে।

একবার বৃন্দা আর সুবল গিয়েছিল দূত হয়ে কানুর কাছে। কানু ফিরিয়ে দিয়েছে তাদের। রাজার অনুচর-প্রতিহারীরা এইসব গায়ের লোকের সঙ্গে সহজে দেখাই করতে দিতে চায় না। কংসের কী বিশাল প্রাসাদ— তার মধ্যে যেন পথ হারিয়ে যায়। প্রতিটি ঘরের মেঝে দর্পণের মতো ঝকঝকে, বিরাট বিরাট অলিন্দ, তার মধ্যে মধ্যে রত্নখচিত মিনার। আজ কানু এই সবকিছুর অধিপতি। সে যেখানেই যায় তার সঙ্গে সঙ্গে রক্ষীরা ফেরে। তবু কানু বৃন্দা আর সুবলকে নিয়ে গিয়ে বসিয়েছে রাজপ্রাসাদের নিম্নতম ঘরে। প্রথমে কেউ কোনও কথা বলতে পারেনি। একটু পরে কানুই প্রথমে মৃদু গলায় প্রশ্ন করেছিল, ওখানে মনাই ভালো আছে?

সুবল আর বৃন্দা দু'জনেই মাথা ঝাঁকিয়ে বলে, না!

তারা দু'জনে ডেবেই পায় না কানুকে কী বলে সন্বেধন করবে। এক মিন তারা কানুর নাম ধরে যে ডেকেছে সে কথা ডেবেই লক্ষ্য পায়। সে কানু তো আর নেই। সে এখন রাজা, এখানে তাকে দেখলে সবাই ভক্তি-সম্মানে সবে দাঁড়ায়, কেউ তার নামও উচ্চারণ করে না।

ঘুরারের পাশ দিয়ে রাজমাতা দেবকীকে দেখে সুবলরা অকারণেই শঙ্কিত হয়ে পড়ে। যেন তারা কানুকে চুরি করে



নিয়ে যেতে এসেছে। বাইরে থেকে অমাত্যরা উঁকি দেয় মাঝে মাঝে। তারা ব্যস্ত হয়ে পড়ছে। রাজাধিরাজ কৃষ্ণের জন্য রাজকার্য অপেক্ষা করে আছে।

এক সময় সংকোচ ঝেড়ে ফেলে সুবল জিজ্ঞেস করল, ভাই কানু, তুমি কি আর একবারটিও আমাদের ওখানে যাবে না? কানু সুবলের হাত চেপে ধরে কম্পিত গলায় বলতে লাগল, ভাই সুবল, বৃন্দাবনের জন্য আমার মন কাঁদে, সেখানকার সকলের জন্য আমার মন কাঁদে, কিন্তু সে-বৃন্দাবন আর আমার জন্য নয়! আমি আর ফিরতে পারি না। আমার ফেরার পথ নেই। যদি বৃন্দাবনে যাই, আর কি তা হলে গোষ্ঠে গিয়ে ধেনু চরাতে পারব? আর কি তোদের সঙ্গে ধুলো মেখে খেলতে পারব স্নায়ের মতন মাটিতে? আর কি কখনও যমুনায় একা নৌকো বাইব? স্নানের ঘাটে গিয়ে সংকেতবাঁশি বাজাতে পারব রাখার জন্য? আমি রাজা, কোনও রাজার পক্ষে কি এসব মানায়? তা হলে যে শাসন দুর্বল হয়ে যাবে? আর ওই সবই যদি না করতে পারি, তা হলে বৃন্দাবনে যাব কোন সাধে? আমার বুক ছ-ছ করবে না? এই রাজপোশাকের পিঞ্জরে আমাকে আটকে দিয়েছে সবাই। সুবল, তোরা দেখে যা আমাকে, সবাইকে গিয়ে বলিস!

মা যশোদার জন্য আমার প্রাণ কাঁদে। কিন্তু মা দেবকীকে কাঁদিয়ে কী করে আমি যশোদার কাছে ফিরে যাই? একজন অনেক বছর কাছে পেয়েছে, আর একজন যে এক দিনও পায়নি।

আর রাখা?

সুন্দর, তোরা রাধাকে বলিস, আমি মন-পবন গগনে  
রেখেছি। এখন দশমী দুয়ারে কবাট। আমি মূল কমলে মধু  
পান করেছি, আমার ব্রহ্মজ্ঞান হয়েছে, তাই জ্ঞানবাণে  
মদনবাণ ছিন্ন না করে পারিনি। আমি অহর্নিশ যোগধ্যান  
করি, আমার মেহে আর বিকার নেই। তবু তোরা বলিস,  
সেই সুন্দরের প্রতিমাকে আমি কখনও ভুলব না!

এরা ফিরে এসে রাধাকে সাস্ত্রনা দেবার চেষ্টা করে।  
রাধা এসব কথা কিছুই কানে নেয় না। কেউ কাছে এলে সে  
শূন্য দৃষ্টিতে তাকিয়ে থাকে। এখন আর সে কাঁদে না।

প্রতি পূর্ণিমার রাতে সে সাজতে বসে। কুঙ্কুম চন্দনের  
আলিপন দেয় শরীরে। হাতে, পায়ে, গলায় পরে নেয় ফুলের  
গহনা। তারপর চুপি চুপি চলে যায় যমুনা তীরে। তমাল  
গাছের নীচে দীপ ছেলে দাঁড়িয়ে থাকে। সে আসবে বলে  
কথা দিয়েছিল, তাই রাধাকে যে অপেক্ষায় থাকতেই হবে।

এক সময় মনে হয়, যেন দূরে কোথাও বেজে ওঠে সেই  
পাগল-করা বাঁশি। সেই সুর বাতাসে কাঁপে এবং রাধাকে  
কাঁপায়। যমুনার জল কাঁপে, তমালের পাতা কাঁপে।  
তারপর এক সময় মনে হয়, সেই দুরন্ত দুর্দান্ত মেঘবর্ষ  
ছেলেটি ছুটে ছুটে আসছে বন-পাথার পেরিয়ে! এক সময়  
সে রাধার বুকের ওপর ঝাঁপিয়ে পড়ে। তারপর  
হাসিতে-কানায় আদরে-সোহাগে মানে-অভিমানে রাত  
জোর হয়ে যায়। এ রাধার একান্ত নিজস্ব কানু, এ তাকে  
ছেকে থাকবে কী করে?

মথুরায় যে রাজত্ব করছে, সে রাজত্ব নিয়েই থাকুক। সে  
অন্য কৃষ্ণ। সে রাধার কেউ নয়।

এই কাহিনী রচনায় শ্রীশ্রীভাগবত, শ্রীশ্রীব্রহ্মবৈবর্ত পুরাণ, রাস পঞ্চাধ্যায়, শ্রীকৃষ্ণ কীর্তন, চণ্ডীদাস, বিদ্যাপতি ও অন্যান্য পদকর্তাদের পদাবলী, বিভিন্ন লোক সঙ্গীত এবং দীনেশচন্দ্র সেন মহাশয়ের রচনাবলী থেকে প্রভূত উপকরণ গ্রহণ করা হয়েছে।